

LUK

Yesu Kilisi xolac wê Luk kivuu ge

Kiyang tyo kehe

1 ¹⁻²Xe levac Tiopilas, ông xovô pyap bê ilage kiyang val le seac vac xe mahigun mi xomxo mangwe yê vô buc taxlee, om he nêl xolac wê he yê ge kitong vô xe. Nang dèc xomxo tibeac mangwe nêb he ob kituc kiyang ge vihati mi kivuu vac kipihac, om he toto kivuu kiyang tiyi wê xomxo taxlee nêl di i val vô il ga hixôn. ³Om a êno nêb a ob kivuu kiyang ge vac kipihac mi vông i loc vô ông, ên buc tibeac a kinêg mi xovô kiyang ge vihati kehe. Om a kivuu vihati bôbac yuu nivîha vac kipihac, ⁴ên a nêb ông kitong mi xovô bê xolac wê xomxo nêl mi ông ngô ge, nôn vixôhilôg.

Angela nêl Jon kitong vô ma Sekalaia

⁵Vô buc wê Helot tu king mi viac vigwe Judia ge, xomxo ti dô lê nêbê Sekalaia di vinê lê nêbê Ilisabet. Sekalaia ge xomxo wê mi si daa vô Anutu ge ti, vac kidu ti wê lê nêbê Abaisa ge, di vinê kehe vac Elon. ⁶Mêd yuu ge, Anutu yê manôn nivîha lec yuu, nêb yuu xomxo nivîha lee, ên yuu timu vô Apumtau kiyang yuu xolac vihati di o vông ti so lêm. ⁷Lêc yuu nu ma, ên Ilisabet o kô nipwo ti lêm, di yuu liya vô kipwoc yuu vêxta.

⁸Sekalaia he lie daa siên la vông yuac vac Anutu xumac ngîbua, ên ge he nêl buc wê ob vông yuac lec ge, om Sekalaia la si daa vô Anutu. ⁹Môp wê he mi vông ge, he mi tide ên nêb i nêl kitong vô he bê he tina ob la vac xumac ngîbua nilô ên la si daa nivîvea nivîha vô Apumtau. Om he tide, lêc nêb Sekalaia, om Sekalaia la vac xumac ngîbua nilô, ¹⁰di xomxo tibeac kitaa vô Anutu mi dô vixun, di Sekalaia si daa nivîvea nivîha vô Anutu. ¹¹Mêd Apumtau angela ti val le vô alta wê si daa lec ge vô vigê

hiyôv, ¹²di Sekalaia yê mi yetac ên di xona ên. ¹³Lêc angela tige nêl vô i ên nêbê, “Sekalaia, xonaên i ma, ên Anutu ngô kitaaên wê ông kitaa ge pyap. Om vinêm Ilisabet obêc kô num vux ti di ông ob nêl lê nêbê Jon. ¹⁴Mêd ông obêc pîmil di ông nilôm obêc vô nivîha, di buc wê num tige obêc yubac ge od obêc vông xomxo tibeac xêyaa vô nivîha. ¹⁵Ên num tyo, Anutu obêc yê nêb i tu xomxo levac, di i o lêc num mia wain yuu mia xêkizêc lêm. Buc wê obêc gên dô vac ta xêyaa ge od Myakilôhông Ngibua obêc hivun i xôn pyap, ¹⁶di timuên ge od obêc pilepac xomxo Islel tibeac nilô lax vô he Apumtau Anutu. ¹⁷Xomxo tige ob kô xovôên yuu xêkizêc i tiyi xocbê Ilaija kô ge di i mug Apumtau môp, om obêc pilepac mae nilô lax vô nue, di obêc pilepac he wê pwooo kiyang vac ge nilô di he i loc kô xovôên yuu piyôp nivîha wê xomxo vông vinên vông ge. Om môp ge wê ob viac xomxo nilô pyap, êdêc he i dô hixôn nilô nivîha di Apumtau i val.”

¹⁸Angela nêl pyap, mêd Sekalaia kinêg vô i ên nêbê, “Kiyang wê ông nêl ge ob vô nôn lec bêna? Ên xii vô kipwoc yuu vêxta ga mê.”

¹⁹Mêd angela nêl vô i ên nêbê, “A ga Gebliel wê a mi le vô Anutu manôn ge, lêc Anutu vông a lam ên nêb a lam nêl kiyang nivîha tiga vô ông. ²⁰Om kiyang wê a nêl ga obêc vô nôn lec vô buc wê Anutu nêl ge. Lêcom ông o vông i vin kiyang tyo lêm, om ông ngô lê. Ông obêc dô tiyi xocbê yac ge di keacên ob ma, di i miloc vô buc wê kiyang obêc vô nôn lec ge lê.”

²¹Xomxo wê kitucma mi dô vixun ge dô bin Sekalaia, di kinêg vôma ên nêbê, “Sekalaia la vô va, lêc la dô gwêba ta vac xumac nilô?” ²²He dô dêc Sekalaia lop mi lôm, lêc keacên ma vô he, ên mya viyin, om he xovô nêbê mêd yê vatya ti vac xumac ngibua nilô. Lêc Sekalaia hilung kiyang ya vigê vô he, ên mya viyin. ²³Mêd buc wê Sekalaia yuac daa siên ge tiyôô, om lax ben viyangtôv.

²⁴Mêd lax dô ben di vinê Ilisabet, nu tuc dô vac xêyaa di i mi dô vac xumac lôma tiyi dentuc vigê vilu, di nêl ên nêbê, ²⁵“Anutu xo vigwe pisiv ên a ên wê a mi le top di nipwo ma ge, om vông nivîha vô a mi vô a nig yocên vêl.”

Angela Gebliel nêl Yesu kitong vô Malia

²⁶Ilisabet nu dô vac xêyaa tiyi dentuc vigê vilu di sec ti, lêc Anutu vông angela Gebliel la vac vigwe Nasalet vac vigwe levac Galili, ²⁷di i la vô vêxwo ti lê Malia. Malia ge, tae mae nêl i lê lec Josep ên nêb yuu i iima, lêc yuu gên dô teva. Josep ge, kehe vac king Devit. ²⁸Mêd Gebliel la nêl vô Malia ên nêbê, “Ông wê Anutu yê ông nivîha ge, kiyang malehe i hivun ông xôn, ên Apumtau dô hixôn ông.”

²⁹Malia ngô kiyang tyo, lêc vông i nilô vô viyin levac, di i xo ên nêbê, “Kiyang malehe ga, kehe bêna?”

³⁰Mêd Gebliel nêl vô i ên nêbê, “Malia, xonaên i ma, ên Anutu yê ông nivihã. ³¹Om ngô lê. Ông obêc vivi num vux ti dêc obêc yubac ge, di ông nêl lê bê Yesu. ³²Num tyo ob tu xomxo levac di xomxo ob nêl i lê nêbê Anutu lag puunê nu, di Apumtau Anutu obêc vông i tu king mi viac xomxo tîyi xocbê bu Devit ilage, ³³om obêc tu xomxo Islel wê Jekop nue bue gee nêl king mi viac he luta lêc luta, di i lê king obêc tîyôlêm.”

³⁴Mêlêc Malia kinêg vô angela tyo ên nêbê, “Kiyang ga obêc vô nôl lec bêna? Ên a gên o kô vux ti lêm.”

³⁵Mêd angela luu i vya ên nêbê, “Myakilôhò Ngibua obêc lam vô ông, di xêkizêc wê Anutu lag puunê vông ge obêc lam hivun ông xôn, om nipwo ti wê ông obêc kô ge, xomxo ob nêb i ngibua di i Anutu nu.

³⁶“Ngô lê. Gônã Ilisabet wê vô vêxta di mi le top di nu ma ge, gwêbaga vivi nu vux ti, lêc gên dô di dentuc vigê vilu di sec ti lam la vêl, om obêc kô nu tige. ³⁷Ên kiyang yuu yuac ti o vô viyin vô Anutu lêm. Nge, Anutu tîyi wê ob vông susu vihati vô nôl lec ge.”

³⁸Om Malia nêl vô angela ên nêbê, “Apumtau nu yuac a, om kiyang wê ông nêl vô a ge i vô nôl lec.” Pyap dêc angela sea i di lax.

Malia la yê Ilisabet

³⁹Vac buc tige mahigun ti, Malia kidi di tup la vac vigwe kitôn ti wê yêp vac vigwe Judia ge, ⁴⁰di la vac Ilisabet yuu Sekalaia ben xumac lôma di la pul Ilisabet vigê di nêl kiyang malehe vô i. ⁴¹Mêd Ilisabet ngô Malia vya di nu wê dô vac i xêyaa ge yetac di ngigax i, mêd Myakilôhò Ngibua lam hivun Ilisabet xôn, ⁴²di i nêl vya levac vô Malia ên nêbê, “Anutu vông vizid nivihã vô ông luu vêx baba ge vêl. Di num wê ông ob kô ge, vizid nivihã wê Anutu vông ge obêc hivun i xôn. ⁴³A ga bêna lê, lêc a Apumtau ta val vô a? ⁴⁴Om ngô lê. A ninyag gên ngô ông vyam wê ông val nêl vô a ge, lêc a nug wê dô vac a xêgyaa ga yetac mi ngigax i di pimil. ⁴⁵Ông vông i vin pyap om ông hi vixam i pec, ên kiyang wê Anutu nêl vô ông ge obêc vô nôl lec timuên.” Ilisabet nêl bêge.

Malia kiyang pimilên

⁴⁶Malia nêl ên nêbê,

“A nilôg pimil Apumtau lê, ⁴⁷di a kinug hi vixa ên Anutu wê ngidu a xôn ge. ⁴⁸Ên a ga Anutu nu yuac pileva, lêc Anutu xêyaa vin lec a, om gwêbaga di timuên ge, xomxo vihati obêc nêl a lêg la bê Anutu vông vizid nivihã vô a, ⁴⁹ên Anutu xêkizêc kehe vông do levac tige vô a, di i lê ngibua. ⁵⁰Anutu xêyaa vin lec xomxo wê la vac i kwa ngibi ge, om môp bêge wê ob yêp vô xomxo tibeac tibeac vihati di i loc vô myahipu. ⁵¹Anutu vigê vông yuac xêkizêc, om tii xomxo wê nilô yong he ge moo sea mi la. ⁵²Di Anutu vô xêkizêc vêl ên xomxo levac wê kô lê king ge, di hóm xomxo pileva lê lec. ⁵³Mêd

xomxo susu maên wê vip den he ge, Anutu vông susu nivihã vô he, ði xomxo wê susu tibeac ge Anutu vông he la nêñ ya vigê pileva. 54-55 Anutu ngidu nue yuac Islele xôn, êñ xovô kiyang wê nêñ pyap vô buge ilage êñ nêbê i xêyaa ob vin lec Eblaham he nue bue timuên ði i loc tiyi buc myahipu.” Malia nêñ bêge.

56 Malia dô hixôn Ilisabet tiyi dentuc yon dêc lax mi la ben.

Ilisabet kô nu tuc Jon

57 Buc wê Ilisabet nu ob yubac ge, om nu tyo yubac lêc nu tuc. 58 Mêd Ilisabet ngidêe lie hixôn xomxo vac ben viyangtôv ge ngô wê Apumtau vông nivihã vô i ge, om he la pimil Anutu hixôn Ilisabet.

59 Buc vigê vilu ði sec yon la vêl, lêc he kituc la nêb ob gôl nu tyo ninivi ði nêñ i lê. Om he nêb he ob nêñ lê lec ma Sekalaia vaci, 60 lêc ta nêñ êñ nêbê, “Maê! Il ob nêñ i lê bê Jon.” 61 Lêc he nêñ vô i êñ nêbê, “Letya lê tige? Lime ngidême ti lê o bêge lêm.” 62 Om he vô hilung hilung ya vigê kinêgên vô ma Sekalaia êñ nêb i nêñ bê he ob nêñ nu tyo lê bêna. 63 Mêd Sekalaia vông he la kô taple nipwo ti ði i kivuu lê lec êñ nêbê “Jon”. Mêd he yê ði yetac êñ. 64 Mêd lutibed Sekalaia kwa tyip ði get vô xêlehe ði i keac, mêgem pimil Anutu. 65 Om xomxo wê dô vac vigwe tige xona, ði kiyang tige la vac vigwe kitôn Judia vihati, 66 om xomxo vihati wê ngô kiyang tige xo kiyang tibeac vac nilô ði nêñ êñ nêbê, “Nipwo tige obêc dô bêna timuênê?” He nêñ bêge, êñ he xovô êñ nêb xêkizêc wê Anutu vông ge ngidu i xôn.

Sekalaia pimil Anutu

67 Myakilôhê Ngibua hivun Sekalaia xôn ði i nêñ kiyang tiyi xocbê plopete ti bêga êñ nêbê,

68 “Il ob pimil Apumtau wê tu il Islele nêd Anutu ge, êñ i ge wê lam ngidu il wê il tu i nue ge xôn ði vô il vêl êñ nipaên, 69 om vông xomxo xêkizêc ti kidi vac kehe Devit wê i nu yuac ge, êñ nêb i ngidu il xôn ði vông il dô vac nivihã, 70 i tiyi xocbê Anutu nêñ vô i plopete ngibua ilage mi he nêñ kitong ge. 71 Kiyang tige, Anutu nêñ nêb ob vô il vêl êñ tibii vevac wê ob hi il gee yuu tibii wê xêyaa vô myavinê vô il gee. 72 Om Anutu xo vigwe pisiv êñ il buge mi ngidu he xôn, ði xovô i kiyang wê zôo i tu ngibua ilage. 73-74 Kiyang tige wê Anutu hilu vô il bug Eblaham ilage, om ob vô nôn lec vô il bêga bê Anutu ob vô il vêl êñ xomxo vevac wê nêb ob kitya il vêl ge, êñ nêb il vông i yuac mi dô vac, ði xonaên i ma, 75 ði il le ngibua yuu nivihã vô Anutu manôn ði vông i yuac i tiyi buc vihati wê il dô kibun ga ge.

76 Ông nipwo tige, timuên xomxo ob nêñ bê ông plopet wê Anutu kisii ganê vông ge, êñ ông ob mug Apumtau ði titô i nêñ môp i vô

bôbac, ⁷⁷di ông ob nêl kitong vô xomxo wê tu Anutu nue ge ên he i xovô bê Anutu ob kitya he nêl nipaên vêl di vông he i dô vac nivîha. ⁷⁸Il Anutu ob vông bêge ên wê xêyaa vin lec il ge, om ob vông xomxo ti wê xêseac lag puunê ge i lam vô il, ⁷⁹ên i lam linac lec xomxo wê dô vac mapitoc ta di he xona ên yibên ge. Om obêc didii il di il la timu vô kiyang malehe.” Sekalaia nêl bêge.

⁸⁰Om nipwo tige lig mi vô levac di i piyôp xovô kiyang nivîha, di i la dô vac vigwe mahigun pileva wê xomxo dô vacên ma ge di i mila vô buc wê lam hilung i vô xomxo Islel ge.

Malia kô nu tuc Yesu

(Matyu 1:18-25)

2 ¹Vô buc tige King Sisa Ogastas vông kiyang ti la vô xomxo vac vigwe vihati ên nêb he vihati i loc ên tibii i kivuu he lê. ²Buc tige, ge wê he kivuu xomxo vihati lê taxlee, di Sailinias tu gavman levac mi viac vigwe Silia vac buc tige mi dô. ³Om xomxo toto lax ben ben ên nêb tibii i kivuu he lê. ⁴Josep ge, kehe vac king Devit, mêd kidi vac Nasalet vac vigwe levac Galili mi la, di mila vac vigwe levac Judia di la bu Devit ben luta lê nêbê Betlehem. ⁵Om Josep yuu xôn vinê Malia la Betlehem ên nêb gavman i kivuu yuu lê. Malia ge, nu dô vac i xêyaa, ⁶mêd yuu gên dô Betlehem di buc vô kwabo lec wê Malia nu ob yubac ge. ⁷Lêc xomxo pup lec xumac wê vitevac nêl ge vihati, om yuu la dô vac bulmakau ben, mêdec nu tyo yubac lêc nu tuc, mêd Malia viyum vac nivîmihi di la lii i yêp vac bulmakau dipac wê mi ya vac ge.

Angela nêl Yesu kitong vô xomxo wê viac bwoc sipsip ge

⁸Vac vigwe tige xomxo wê viac bwoc sipsip gee dô vô vigwe ninya di viac he bwoc sipsip vô bucên mi dô. ⁹Mêd Apumtau angela ti val vô he, di xêseac wê

Apumtau vông ge lam linac lec he, om he yê di xona mabu. ¹⁰Lêc angela tyo nêl vô he ên nêbê, “Xonaên i ma. Di xam ngô lê. A ob nêl kiyang nivîha ti vô xam, di kiyang tyo wê ob vông xomxo vihati xêyaa vô nivîha yang. ¹¹Om a ob nêl vô xam bêga bê vô buc gwêbaga vac vigwe wê king Devit mi dô vac ilage, nu ti yubac. Ge xam nêl xomxo wê ob vô xam vêl ên nipaên. Ge Apumtau Kîlisi. ¹²Om do wê xam ob xovô i lec ge bêga bê xam obêc wê nipwo tyo wê ta viyum vac nivîmihi di i diyêp vac bulmakau dipac wê mi ya vac ge.”

¹³Angela nêl bêge vô he, di lutibed angela lag puunê tibeac hiwocên val le hixôn angela tyo di pimil Anutu ên nêbê, ¹⁴“Anutu lê i vô levac gê lag puunê, di kiyang malehe i lam kibun ga vô xomxo wê Anutu yê nivîha ge.”

Xomxo bwoc viacên la yê Yesu

¹⁵Angela tige sea he di lax mi la lag puunê, mêd xomxo bwoc viacên tige nêl voma ên nêbê, “Xam kidi lec ên il ob la Betlehem ên la xê

kiyang ti wê Apumtau vông vô angela mi he val nêl vô il ge nôh.”¹⁶ Om he kidî lec di tup lutibed di mila yê wê Josep yuu Malia xeedô di nu tuc diyêp vac bwoc dipac wê mi ya vac ge.¹⁷ He yê pyap di nêl kiyang lec nipwo tyo tiyi wê angela nêl kitong vô he ge.¹⁸ Mêd xomxo vihati wê ngô kiyang wê xomxo bwoc viacên tigeê nêl ge ngô di yetac ên di xo kiyang tibeac lec.¹⁹ Mêlêc Malia ngô kiyang di viac i yêp vac nilô di xovô i tiyi buc vihati.²⁰ Mêd xomxo bwoc viacên tigeê lax mi la, di lax pimil Anutu di hi vixa pec ên kiyang vihati wê he ngô di yê nôh tiyi kiyang wê angela nêl vô he ge.

He nêl Yesu lê

²¹Buc vigê vilu di sec yon la vêl, om he gôl nipwo tige ninivi di nêl i lê ên nêb Yesu. Lê tige wê Yesu gên o lam la vac Malia nilô lêh di angela nêl tax vô Malia.

Simion yuu Ana yê Yesu vac Anutu xumac ngibua

²²Buc wê Malia yuu nu tuc ob la lipac ningeac vêl i tiyi kiyang wê yêp vac Moses xolac ge, om Josep yuu Malia kô Yesu mi la vac xumac ngibua Jelusalem, ên nêb ob vông i loc vô Apumtau,²³ i tiyi Apumtau kiyang wê yêp vac kîpihac xolac bêga ên nêbê vêx ti obêc kô nu tuc taxlee ge od he ob vông i loc tu Anutu xe ngibua.²⁴ Di yuu nêb yuu ob vông daa hixôn i tiyi Apumtau kiyang wê nêl ên nêbê yuu i léc kô dea yuu me tucluu nu yuu mi loc si daa vô i ge.

²⁵Xomxo ti dô Jelusalem lê nêbê Simion. Simion ge, xomxo vông vinên nôh wê mi kitaa vô Anutu di dô bin xomxo ti wê ob lam vô viyin vêl ên Islel ge, di Myakilôhô Ngibua hivun Simion xôn.²⁶ Ilage Myakilôhô Ngibua nêl kitong vô i ên nêb i ob yib lutibed lêh. Nge, nêb ob dô mi yê Kilisi wê Apumtau ob vông i lam ge lec manôn lê, léc yib timuên.²⁷ Mêd Myakilôhô Ngibua kidu Simion nêb i loc vac Anutu xumac ngibua, om Simion la dô, dêc Yesu ta yuu ma kô i mi la vac xumac ngibua ên nêb ob vông i tiyi môp wê Moses xolac nêl ge.²⁸ Mêgem Simion yê di hêm Yesu mi kiva lec, di pimil Anutu ya vya tibêga ên nêbê,

²⁹“O Apumtau, gwêbaga a nêb ông kô ông num yuac a mi loc vô ông hixôn nilôg nivihia, i tiyi kiyang wê ông nêl vô a ilage,³⁰ ên gwêbaga a magnôn yê xomxo ti wê ông vông i lam ên ông nêb i vô xe vêl ên nipaên ge.³¹ Ge ông viac pyap mi vông i lam le seac vô xomxo manôn ên ông nêb vihati i yê,³² ên i ge xêseac wê ob linac lec tibii madiluhu ên he i xovô ông, di i wê ob vông nume Islel lê i vô levac.”

³³Yesu ta yuu ma yetac ên kiyang wê Simion nêl lec i ge,³⁴ mêd Simion kitaa lec yon, di nêl vô ta Malia ên nêbê, “Ngô lê. Num tiga wê obêc vông xomxo Islel tibeac tô mi la, di obêc hêm xomxo tibeac lec mi he le nivihia.

Num tyo tiyi do wê ob hilung Anutu môp vô xomxo ge, léc xomxo tibeac obêc so vya vô i, ³⁵om xomxo nêb kiyang wê xo vac nilô ge obêc lam le seac. Di ôcông va nilôm, viyin obêc kitiv ông xocbê yii kitiv ông di la vac ông nilôm ge.” Simion vya bêge.

³⁶Plopete vêx ti dô lê nêbê Ana. Ana ge, ma Panyuel di kehe Asa. Léc kô vux ti di yuu dô klismas vigê vilu di sec yuu, ³⁷léc liya yib om tu vêxôv mi dô di vô vêxta di i klismas 84. Mêd Ana mi dô vac Anutu xumac ngibua di mi ngibua yaên di mi kitaa vô Anutu tiyi lec bucên yuu vidiiên vihati. ³⁸Léc buc tya ge Ana val yê Yesu yon ta yuu ma, om pimil Anutu di lax nêl Yesu kitong vô xomxo vihati wê dô bin buc wê Anutu ob vô Jelusalem vêl ên viyin ge.

Josep yuu Malia yon Yesu lax mi la Nasalet

³⁹Josep yuu Malia vông môp vihati tiyi xocbê Anutu xolac nêl ge. Pyap mêd yon nu tuc lax mi la ben Nasalet vac vigwe levac Galili. ⁴⁰Yon dô dêc nu tuc lig levac di vô xêkizêc lec hixôn piyôp levac, di Anutu vizid hivun i xôn.

Yesu dô vac xumac ngibua Jelusalem

⁴¹Yesu ta yuu ma mi la Jelusalem tiyi klismas vihati, ên nêb ob la yê buc Pasova ên xovô buc wê he sea Isip ilage. ⁴²Mêd Yesu klismas vigê yuu di tô mi la yuu, om yon ta yuu ma la Jelusalem ên nêb ob la yê buc Pasova tyo nang. ⁴³Buc Pasova vihati pyap, di he nêb ob lax ben, léc Yesu dô Jelusalem di ta yuu ma lungên i. ⁴⁴Yuu xo ên yuu nêb mêd Yesu la hixôn lie ya mi he la, om vidiiên tige yuu myag i di kinêg i vô lie hixôn nipipu wê he xôn la ge, ⁴⁵léc yuu o yêvô lêm, om yuu lax mi la Jelusalem mi lax myag i. ⁴⁶Yuu myag i tiyi buc yon, léc la yêvô i vac Anutu xumac ngibua nilô wê xeedô hixôn Yuda levac levac wê kitucma ge, di ngô he kiyang di le kinêg kiyang kehe vô he. ⁴⁷Mêd xomxo wê ngô Yesu kiyang ge yetac ên i kiyang yuu piyôp nivîha wê luu he vya ge. ⁴⁸Mêd Yesu ta yuu ma val yê di yetac ên i, om ta nêl vô i ên nêbê, “Tuce, ông vông bêna vô xii ga lê, léc ông vông

xii mam myag ông yoo mi xulac hixôn nilôm viyin mabu?” ⁴⁹Mêd Yesu nêl i lax vô yuu ên nêbê, “Muu myag a ên va? Muu o xovô bê a ob dô vac Mag xumac ga lêmê?” ⁵⁰Léc yuu o xovô Yesu kiyang ge kehe lêm.

⁵¹Mêd Yesu kidi mi la hixôn yuu di yon lax mi la ben Nasalet. Yon milax dô Nasalet ge od Yesu vô ninya lehe vô ta yuu ma kiyang tiyi buc vihati, mêgem ta Malia xovô kiyang tige vihati yêp vac nilô tiyi buc vihati. ⁵²Yesu lig hixôn piyôp nivîha, om Anutu hixôn xomxo vihati xêyaa vin lec i.

Jon Lipacên nêl xolac vô xomxo

(*Matyu 3:1-12; Mak 1:2-8; Jon 1:19-28*)

3 ¹Vô buc tige Taibilias Sisa tu king mi viac xomxo vac klismas vigê yuu di vixa vilu (15) mi dô, di xomxo ya tu gavman levac di viac

vigwe ya ya, he lê bêga, Pontias Pailat viac vigwe levac Judia di Helot viac vigwe levac Galili di li Pilip viac vigwe yuu lê Itulia yuu Tlakonaitis, di Laisenias viac vigwe Abilini. ²Di Anas yuu Kaiapas tu xomxo wê mi si daa gee nê n bazub mi dô. Vô buc tige Anutu kiyang la vô Jon wê Sekalaia nu ge vac vigwe mahigun pileva. ³Om Jon kidi mi la mia Jodan di la vac vigwe viyang viyang di la nêl xolac vô xomxo ên nêbê he i pilepac he di lipac mia êdêc Anutu i kitya he nê n nipaên vêl. ⁴Om kiyang wê plopete Aisaia kivuu ilage mi i yêp ge vô nôn lec bêga ên nêbê,

“Xomxo ti tyuc vya levac vac vigwe mahigun pileva ên nêbê, ‘Xam viac Apumtau môp wê obêc lam vac ge di vông i vô bôbac. ⁵Om xam hivun vigwe madia xôn ên i vô bôbac, di den kitôn levac yuu nipwo vihati vêl mi vông i vô nivihã, di titô môp nigecên i vô bôbac lec, di hôm ngidax wê dô vac môp ge vêl ên môp i vô nivihã lec, ⁶ên xomxo vihati i yê Anutu môp wê ob vô xomxo vêl ên nipaên ge.’”

⁷Xomxo tibeac la vô Jon ên nêb i lipac he, lêc Jon nêl vô he ên nêbê, “Myel nipaên nue xam. Letya nêl vô xam ên nêbê xam ob pec ên Anutu xêyaa myavinê wê ob tulec xam ge? ⁸Xam pilepac xam di vông môp nivihã ên i nêl xam kitong bê xam pilepac xam pyap. Di le i lêc yong xam di nêl bê xam bum Eblaham lêm. A ob nêl vô xam bê Anutu tiyi wê ob vông ngidax tigae i tu Eblaham nue bue ge. ⁹Xam tiyi xocbê xax wê xomxo hôm kov ên nêb ob vuv vêl ge, ên kov vô manôn mi yêp vô xax kehe. Ên xax wê o vuac nôn nivihã lêm ge, xomxo ob vuv vêl di nêx i loc vac ngwax.”

¹⁰Jon nêl bêge vô he, om he vihati kinêg vô i ên nêbê, “Om xe ob vông bêna?” ¹¹Om Jon nêl vô he ên nêbê, “Xomxo ti, siot yuu obêc dô ge, od i vông ngwe vô xomxo ngwe wê nê n siot ma ge. Di xam ti yaên obêc dô vô xam ge od ông vông bêge vô xomxo wê xen yaên ma ge êno mêge.” ¹²Mêd xomxo wê mi kô takis gee, ya val vô Jon ên nêb i lipac he, om kinêg vô i ên nêbê, “Xolac kehe, xe ob vông bêna?” ¹³Mêd Jon nêl vô he ên nêbê, “Mone takis wê xam mi kô ge, xam kô i tiyi wê gavman nêl ge, di le i lêc kô i nginoo loc lêm.” ¹⁴Di tibii vevac ya kinêg vô Jon ên nêbê, “Di xe gae obêc vông bêna?” Lêc Jon nêl vô he ên nêbê, “Xam o lêc hi xomxo vax vax mi vun he mone lêm. Di le i lêc vông kot kityooên vô xomxo lec he mone lêm. Nge, xam kô mone lec yuac wê xam vông ge di i pyap.”

¹⁵Xomxo tigege dô bin Kilisi wê ob val ge om he ngô Jon kiyang wê nêl ge di nilô vô hinyoma hinyoma dêc he kinêg vôma ên nêbê, “Mêd ga Kilisi tyo mê, me?” ¹⁶Lêc Jon nêl vô he ên nêbê, “A lipac xam ya mia pileva, di timuên xomxo ngwe obêc val, lêc i xêkizêc luu xêkizêc wê a vông ge vêl, di a o nigvihã tiyi wê a ob piwelac yihi vêl ên su wê i vông ge lêm. Ên obêc val lipac xam ya Myakilôhô Ngibua yuu ngwax. ¹⁷I vigê

vinoo vô ngec nôn wê nêb ob tung vac xumac wê nôn nivihâ ob dô vac ge, di ninivi pileva ge wê obêc nêx i la vac ngwax wê mi tum luta ge ên ngwax i ya vêl.”

¹⁸Mêd Jon nêl kiyang tibeac hixôn ên nêb i vông xovôen vô he, di nêl Anutu xolac vô he vihâti.

Helot tung Jon vac xumac kalabuhu

¹⁹Jon kunac gavman levac Helot wê viac vîgwe Galili ge, ên Helot kô li tuc vinê Helodias di vông môp nipaên tibeac hixôn. ²⁰Lêc Helot vông nipaên levac ti hixôn wê vông Jon vac kalabuhu.

Jon lipac Yesu

(Matyu 3:13-17; Mak 1:9-11)

²¹Buc wê xomxo lipac mia ge od Yesu lipac mia hixôn. Lipac mia pyap di lôm kitaa, dêc vîgwe kisii ganê tax, ²²di Myakilôhô Ngibua tu xocbê tuclu u manôn di lam dô lec Yesu. Mêd vya ti lam gê lag puunê ên nêbê, “Ông a nug wê a xêgyaa vin lec ông di a xê ông nivihâ ge.”

Yesu bue tivae lê

(Matyu 1:1-17)

²³Yesu klismas 30, di i nêl xolac vô xomxo taxlee. Di xomxo mi nêl Yesu nêb i Josep nu. Di Josep mae bue tivae he lê bêgae:

Josep ma Hilai, ²⁴di Hilai ma Matat, di Matat ma Livai, di Livai ma Melkai, di Melkai ma Janai, di Janai ma Josep,

²⁵di Josep ma Matataias, di Matataias ma Emos, di Emos ma Neam, di Neam ma Eslai, di Eslai ma Nagai,

²⁶di Nagai ma Meat, di Meat ma Matataias, di Matataias ma Semen, di Semen ma Josek, di Josek ma Joda,

²⁷di Joda ma Joanan, di Joanan ma Lesa, di Lesa ma Selababel, di Selababel ma Sialtiel, di Sialtiel ma Nelai,

²⁸di Nelai ma Melkai, di Melkai ma Edai, di Edai ma Kosam, di Kosam ma Elmadam, di Elmadam ma El,

²⁹di El ma Josua, di Josua ma Eliesa, di Eliesa ma Jolim, di Jolim ma Matat, di Matat ma Livai,

³⁰di Livai ma Simion, di Simion ma Yuda, di Yuda ma Josep, di Josep ma Jonam, di Jonam ma Elaiakim,

³¹di Elaiakim ma Melia, di Melia ma Mena, di Mena ma Matata, di Matata ma Netan, di Netan ma Devit,

³²di Devit ma Jesi, di Jesi ma Obet, di Obet ma Boas, di Boas ma Salmon, di Salmon ma Nason,

³³di Nason ma Aminadap, di Aminadap ma Atmin, di Atmin ma Anai, di Anai ma Heslon, di Heslon ma Peles, di Peles ma Yuda,

34 di Yuda ma Jekop, di Jekop ma Aisak, di Aisak ma Eblaham, di Eblaham ma Tila, di Tila ma Neho,
 35 di Neho ma Selak, di Selak ma Leu, di Leu ma Pelek, di Pelek ma Ebe, di Ebe ma Sela,
 36 di Sela ma Kenan, di Kenan ma Apaksat, di Apaksat ma Siem, di Siem ma Nôa, di Nôa ma Lamek,
 37 di Lamek ma Metusala, di Metusala ma Inok, di Inok ma Jalet, di Jalet ma Mahalalel, di Mahalalel ma Kenan,
 38 di Kenan ma Inos, di Inos ma Set, di Set ma Adam, di Adam kehe Anutu.

Seten yaxên Yesu

(*Matyu 4:1-11; Mak 1:12-13*)

4 ¹Myakilôhô Ngibua hivun Yesu xôn mêd i sea mia Jodan di lax mi la. Lêc Myakilôhô Ngibua didii i mi la vac vigwe mahigun pileva wê xomxo dô vacên ma ge. ²Mêd Yesu la dô buc kehe yuu di Seten yaxên i.

Yesu yaên ti ma di buc tibeac tige la vêl om vip den i. ³Mêgem Seten nêl vô Yesu ên nêbê, “Ông obêc Anutu nu nôn ge od ông nêl ên ngidax tiga i tu yaên ti ên ông wa.” ⁴Lêc Yesu nêl vô i ên nêbê, “Xolac nêl bêga ên nêbê, ‘Susu yaên vaci o tiyi wê xomxo ob dô maviha ya ge lêm.’ ”

⁵Mêd Seten didii Yesu mi yuu lec mi la lec kitôn kisii mêd Seten hilung vigwe wê yêp kibun ga ge vihati vô Yesu lutibed, ⁶di nêl vô i ên nêbê, “A ob vông vigwe gee vihati hixôn xêkizêc yuu lê levac wê he vông ge vô ông. Ên susu vihati ge tu axe pyap, om a obêc nêb vông vô xomxo ti ge od a ob vông. ⁷Mêgem ông obêc yev vixam kitu vô a di pimil a ge od vihati obêc tu ông xe.” ⁸Lêc Yesu nêl vô i ên nêbê, “Xolac nêl bêga nêbê, ‘Ông yev vixam kitu vô ông Apumtau Anutu tibed, di vông yuac wê ici va vông ge.’ ”

⁹Mêd Seten didii Yesu mi yuu la Jelusalem, di i mila lax Yesu la lec Anutu xumac ngibua myahipu kisii, di nêl vô i ên nêbê, “Ông obêc Anutu nu nôn ge od ông sox loc kibun. ¹⁰Ên xolac nêl bêga ên nêbê,

‘Anutu obêc vông i angela lam viac ông, ¹¹om he obêc hôm ông kisii ya vigê, êdêc ông o lèc vinux vixam lec ngidax lêm.’ ”

¹²Lêc Yesu nêl vô i ên nêbê, “Xolac nêl bêga ên nêbê, ‘Ông o lèc yaxên Apumtau ông Anutu lêm.’ ”

¹³Seten yaxên Yesu ya môp vihati ge pyap, dêc sea i di la, ên nêb ob la dô di buc ngwe nang lê.

Yesu vông yuac xolac taxlee gê Galili

(*Matyu 4:12-17; Mak 1:14-15*)

¹⁴Xêkizêc wê Myakilôhô Ngibua vông ge hivun Yesu xôn di i lax mi la Galili, di xomxo nêl i kitong vac vigwe gee vihati mi i la tiyi vigwe

myahipu. ¹⁵Mêd Yesu la nêl Anutu xolac vac he xumac lilo vihati om xomxo pimil di vông i lê vô levac.

Xomxo Nasalet vô nimi vô Yesu
(*Matyu 13:53-58; Mak 6:1-6*)

¹⁶Yesu milax Nasalet vac ben wê i nipwo di i dô vac léc lig mi vô levac vac ge. Yesu lax dô, di buc sabat ge od la vac xumac lilo tiyi môp wê mi vông ge, mêd kidi lec ên nêb ob kitong xolac vô he, ¹⁷om he vông kipihac wê plopete Aisaia kiyang yêp vac ge vô i, mi i tidii léc yêvô kiyang ti wê yêp bêga ên nêbê,

¹⁸“Myakilôhô Ngibua wê Apumtau vông ge lam lec a, ên Anutu vinoo a ên nêb a nêl i xolac kitong vô xomxo wê nêl susu maên ge. Om vông a lam ên nêb a vô viyin vêl ên xomxo wê dô vac kalabuhu ge, di vông xomxo wê manôn toc ge manôn i seac, di vông a lam ên nêb a vô viyin levac wê hivun xomxo xôn ge vêl. ¹⁹Di nêb a nêl Apumtau buc wê ob vông vizid nivîha vô xomxo ge kitong.”

²⁰Yesu kitong pyap, mêd vilun kipihac xôn di vông i lax vô xomxo ti wê viac xumac lilo ge di tô mi dô ên nêb ob nêl kiyang vô he, om xomxo vihati wê dô vac xumac tige manôn la vô i tibed.

²¹Mêd Yesu nêl vô he ên nêbê, “Xolac ti wê a kitong mi xam ngô ga, vô nôn lec gwêbaga.” ²²Mêd he pimil Yesu di yetac ên kiyang nivîha wê Yesu nêl ge di nêl vôma ên nêbê, “Ga bêna? Xomxo tiga Josep nu mê?”

²³Mêd Yesu nêl vô he ên nêbê, “Vixôhilôg, xam obêc nêl kiyang pilepacên bêga vô a bê, ‘Docta, ông vông ôcông va nimnivi i vô nivîha lec lê. Ên yuac yuu do wê ông la vông vac vigwe Kapaneam mi xe ngô ge, xe nêb ông vông vac il bed ga êno bêge lê.’ Xam obêc nêl bêge vô a lê, ²⁴lêc a ob nêl hixôn nôn vô xam bê plopete ti obêc nêl kiyang vac ici va ben ge, od lie ob vông i vin i kiyang lêm. ²⁵I tiyi xocbê môp wê bume tivame vông vô plopet Ilaija ilage. Vô buc tige lun valên ma tiyi kliskas yon di dentuc vigê vilu di sec ti, om vip mabu yêp vac vigwe Islel vihati. Di vêxôv tibeac dô Islel wê he xen yaên ma ge, ²⁶lêc Anutu o vông Ilaija la vô vêxôv ti vac ici ben Islel ên nêb i loc ngidu i xôn lêm. Nge, vông i la vigwe Salepat vac tibii Saidon ben ên nêb i loc vô vêxôv Saidontige ên i ngidu i xôn. ²⁷Nang dêc buc wê plopete Ilaisa dô ge, od xomxo wê kityax mahizihizi ge tibeac dô vac vigwe Islel, léc Ilaisa o vông he ti vô nivîha lec lêm. Nge, la vac tibii Silia ben di la vông Neman tibed vô nivîha lec.”

²⁸Yesu nêl bêge, mêd he wê dô vac xumac lilo mi ngô i kiyang ge, he xêyaa vô myavinê mabu vô i, ²⁹om he kidi lec di kô i mi la ninyawehe. Vigwe tige yêp lec kitôn ti om he kô Yesu mi la vigwe ninya wê madia ge, ên nêb ob tiyot i loc vac madia. ³⁰Lêc Yesu la vac he mahigun di loc mi la.

Yesu tii vimwo nipaên vêl ên xomxo ti
(*Mak 1:21-28*)

³¹Yesu loc mi la Kapaneam vac vigwe levac Galili, di buc sabat ge od nêl xolac vô he vac he xumac lilo. ³²Mêgem he yetac ên kiyang wê Yesu nêl ge, ên Yesu nêl kiyang hixôn xêkizêc. ³³Vac xumac lilo tige xomxo wê vimwo nipaên dô vac nîlô ge ti dô hixôn, om keac vya levac ên nêbê, ³⁴“Yesu Nasalet, ông lam ên ông nêb ông ob vông bêna vô xe? Ông nêb ông ob kitya xe vêlê? Ên a xovô ông ên a nêbê ông ge xomxo ngîbua wê Anutu vông ông lam ge.”

³⁵Lêc Yesu keac xêkizêc ên nêbê, “Ông keacên i ma, di lop mi loc vêl ên xomxo tige.” Mêgem vimwo nipaên tige vô makikun vac xomxo tige mêd hivip i di vixog i la vac xomxo tibeac mahigun, dêc sea i di la vêl, lêc o vông xomxo tyo ninivi vô nipaên lêm. ³⁶Mêd xomxo tibeac tige yê di yetac mabu di nêl vôma ên nêbê, “Xomxo tige va nêl kiyang bêna, lêc nêl kiyang hixôn xêkizêc vô vimwo nipaên tiyi xocbê i xomxo levac ge om vimwo nipaên ngô di pec mi la vêl.” ³⁷Mêgem xomxo vông Yesu lê vô levac vac vigwe buhu toto ge di i la tiyi myahipu.

Yesu vông Saimon Pita yen vêxta vô nivîha lec
(*Matyu 8:14-15; Mak 1:29-31*)

³⁸Yesu kidi vac xumac lilo di la vac Saimon Pita ben. Lêc Saimon yen vêxta vông yidac levac ngwax tum, om he nêb Yesu i loc vông i vô nivîha lec. ³⁹Om Yesu la le kwabo vô i di piping i yidac ên nêbê, “Loc vêl.” Om yidac tip la lutibed di vêx tyo vô nivîha lec mi kidi lec, di vông yebac vô he xen yaên hixôn.

Yesu vông xomxo yidac tibeac vô nivîha lec
(*Matyu 8:16-17; Mak 1:32-34*)

⁴⁰Hiyôv hoo la, dêc xomxo tibeac kô lie wê yidac kehe toto ge mi la vô Yesu, om Yesu vyax vigê lec he toto di vông he vô nivîha lec. ⁴¹Di xomxo tibeac wê vimwo nipaên dô vac he ge, vimwo nipaên tige lop mi la vêl ên he di tyuc vya levac ên nêbê, “Ông ge Anutu nu.” Lêc Yesu keac levac lec he nêbê, “Xam keacên i ma,” ên he xovô pyap ên nêbê Yesu ge Kilisi ti wê Anutu vông i lam ge.

Yesu la nêl xolac vac vigwe ya
(*Mak 1:35-39*)

⁴²Vigwe vidiiên pitoc yang tya ge, Yesu kidi mi sea vigwe tige di la vac vigwe mahigun pileva wê xomxo maên ge. Lêc xomxo myag i, lêc mila vô i om nêl i xôn nêb i dô hixôn he di seaên he i ma. ⁴³Lêc Yesu nêl vô he ên nêbê, “Mêlêc a ob la nêl Anutu ben kehe kitong vô xomxo vac vigwe baba

hixôn. Ên yuac ga wê Anutu vông a lam ên nêb a vông ge.”⁴⁴ Om Yesu la nêl xolac vac Yuda xumac lilo viyang viyang ge vihati.

Yesu nêl dêc Saimon Pita hi pis tibeac
(*Matyu 4:18-22; Mak 1:16-20*)

5¹ Buc ti Yesu mila le vô mia luaên Genesalet ninya, di xomxo tibeac la dô di hivun i xôn, ên nêb ob ngô Anutu xolac wê Yesu ob nêl ge.² Mêlêc Yesu yê dipac yuu wê yêp vô mia ninya ge, lêc xomxo wê mi kô dipac ge dô lecên ma, ên he la dilipac he leac wê mi hi pis vac ge.³ Mêd Yesu lec la lec dipac ngwe wê Saimon vông ge di nêl vô Saimon ên nêbê, “Vông dipac i du mi loc mahigun tya.” Om he vông i du mi la mahigun di Yesu dô lec dipac di nêl xolac vô xomxo wê dô kehe ge.

⁴ Yesu nêl xolac pyap, dêc nêl vô Saimon ên nêbê, “Vông dipac i loc vac gwec madia di tung leac i loc vac mia ên hi lilii.”⁵ Lêc Saimon luu i vya ên nêbê, “Xolac kehe, vihevage buc xuhu dia tiga xe vông yuac levac lec lilii myagên, vivuatitôv di vigwe vidii lec, lêc xe o hi ti lêm. Lêc ga mô ông nêl om a ob lax tung leac i loc vac mia.”⁶ Om he tung leac la, lêc lilii tibeac vac leac mi i pup lec xocbê ob tax i tip ge,⁷ om he tyuc lie dipac ngwe ên nêb he i lam kô lilii hixôn he. Om he lam di he tung lilii vac dipac yuu xôn mi i pup lec tiyi xocbê ob vông dipac tô mi la vac mia nilô ge.⁸ Mêd Saimon Pita yê di la yev vixa kitu vô Yesu di nêl ên nêbê, “Apumtau, loc vêl ên a, ên a ga tibii nigpaên.”⁹ Saimon nêl bêge, ên i hixôn lie wê dô hixôn i ge yetac mabu ên wê Yesu nêl di he hi lilii tibeac ge.¹⁰ Di Sebedi nu Jems yuu Jon wê yuu mi vông yuac lilii hixôn Saimon ge, yuu yê di yetac ên êno. Mêd Yesu nêl vô Saimon ên nêbê, “Xonaên i ma. Ên timuên ge od ông obêc vông yuac bêga bê ông obêc kituc xomxo i lam vô a.”¹¹ Mêd he soo mia mi la le kehe, pyap dêc susu vihati ge dô di he la timu vô Yesu.

Yesu vông xomxo wê kityax mahizihizi ge ti vô nivihha lec
(*Matyu 8:1-4; Mak 1:40-45*)

¹² Yesu la dô vac vigwe ti, lêc xomxo wê kityax mahizihizi dô lec i ninivi ma vêl ge ti yê Yesu om lam yev vixa kitu vô i di kitaa i ên nêbê, “Xomxo levac, ông obêc nêb vông a nignivi i vô nivihha lec ge od ông tiyi wê ông ob vông i vô nôn lec ge.”¹³ Mêgem Yesu titô vigê la vyax lec i di nêl ên nêbê, “A nêb ông vô nimvihha lec.” Yesu nêl di kityax mahizihizi tige wax la vêl di i ninivi vô nivihha lec lutibed.¹⁴ Mêgem Yesu nêl kiyang xêkizêc vô i ên nêbê, “Ông o lêc nêl kitong vô xomxo ti lêm. Di loc hilung nimnivi mô vô xomxo wê mi si daa vô Anutu ge di vông daa i tiyi Moses xolac wê nêl ge, ên xomxo vihati i yê di xovô bê ông nimnivi vô nivihha lec.”¹⁵ Yesu nêl bêge lê, lêc xomxo nêl i lê vô levac la vac vigwe viyang viyang ge, om xomxo tibeac mi kituc la vô i, ên nêb ob ngô kiyang wê i

nêl ge, di he nêb i vông he ninivi yidac i vô nivihalec. ¹⁶Lêc buc ya Yesu le sea he di la vac vigwe mahigun pileva di la kitaa.

Yesu vông xomxo ti wê vixa len vô xêlehe ge vô nivihalec
(*Matyu 9:1-8; Mak 2:1-12*)

¹⁷Buc ti Yesu nêl xolac vô xomxo tibeac, lêc Palisi yuu xomxo wê xovô Moses xolac gee lam vac vigwe Jelusalem di Galili yuu Judia vihati mi lam dô hixôn. Di xêkizêc wê Apumtau Anutu vông ge lam hivun Yesu xôn ên nêb i vông yidac i vô nivihalec ya. ¹⁸Mêd xomxo ya ken xomxo ti wê len vô xêlehe ge lec pêt di mila, ên nêb ob vông i loc vô Yesu manôn ên i vông i vô nivihalec. Lêc Yesu dô vac xumac nilô, ¹⁹di xomxo tibeac pup lec, om môp ti o yêp wê he ob kô i mi la vô Yesu ge lêm. Om he lec xumac mi la kisii mi la dii xumac mya ti di vông xomxo tyo tô mi la hixôn pêt vac tibii tibeac mahigun di la yêp vô Yesu manôn. ²⁰Mêd Yesu yê wê he vông i vin ge om nêl vô xomxo tyo ên nêbê, “Lig, a kitya ông nêm nipaên vêl pyap.”

²¹Mêlêc xomxo wê xovô Moses xolac gee yuu Palisi gee ngô di nêl vômâ ên nêbê, “Xomxo tige letya lêc so vya vô Anutu? Ên xomxo ti o tiyi wê ob kitya xomxo nêl nipaên vêl ge lêm. Nge, Anutu vaci tived ge wê ob kitya vêl ge.” ²²Mêd Yesu xovô kiyang wê he nêl vac nilô ge om nêl vô he ên nêbê, “Bêna lêc xam xo kiyang bêge vac nilômê? ²³Xam xovô lê. Kiyang ngwe na wê obêc vô viyin maên ge? Kiyang wê nêbê, ‘A kitya ông nêm nipaên vêl’ ge, me kiyang wê nêbê, ‘Ông kidi lec mi loc’ ge? ²⁴Mêlêc a nêb a ob vông xovôên vô xam bê a, Xomxo Nu, a xêkizêc tiyi wê a ob kitya xomxo nêl nipaên vêl gê kibun ga, om xam lêc wê.” Mêdêc Yesu nêl vô xomxo tyo wê len vô xêlehe ge ên nêbê, “A nêl vô ông bê ông kidi lec mi hôm ông guhu lec di lôc bom.” ²⁵Mêdec lutibed xomxo tyo kidi lec vac he mahigun di hôm

i guhu lec di la ben hixôn nilô pimilên. ²⁶Mêgem xomxo gee vihati yê di yetac mabu, di he pimil Anutu hixôn nilô yetacên di nêl vômâ ên nêbê, “Gwêbaga il xê mad lec do nivihalec viyonên ti.”

Yesu keac Livai la hixôn i
(*Matyu 9:9-13; Mak 2:13-17*)

²⁷Yesu la, lêc mila yê xomxo ti lê nêbê Livai wê xeedô vac xumac wê he mi kô mone takis vô tibii vac ge, om Yesu la nêl vô i ên nêbê, “Kidi mi lam hixôn a.” ²⁸Mêgem Livai kidi lec di sea i yuac yuu susu vihati dô xel di la timu vô Yesu vixa mi he la.

²⁹Mêd Livai myêl vizid levac vô Yesu vac ben, di xomxo wê mi kô takis gee hixôn xomxo yaya la dô hixôn yuu mi he ya. ³⁰Lêc he Palisi hixôn he lie wê xovô Moses xolac gee yê tiyiên ma, om nêl vô Yesu nue ngivihalec ên nêbê, “Bêna lêc xam la wa di num hixôn tibii wê mi kô mone takis

gee yuu tibii nipaênê?” ³¹Mêd Yesu ngô wê he nêl bêge, om nêl vô he ên nêbê, “Xomxo nivîha obêc la vô docta lêm. Nge, tibii yidac ge wê obêc la vô docta. ³²Om a ob nêl vô xam bê a o lam ên a nêb a ob tyuc xomxo nivîha lêm. Nge, a lam ên tibii nipaên, ên a nêb he i pilepac he.”

Kiyang lec môp tikwê yuu paha
(*Matyu 9:14-17; Mak 2:18-22*)

³³Mêd he nêl vô Yesu ên nêbê, “Jon nue ngivîhi mi ngîbua yaên di mi kitaa tiyi buc vihati, di Palisi nue ngivîhi mi vông bêge êno. Mêd ông va ge, nume ngivîhi mi ya di mi num di o ngîbua lêm.” ³⁴Mêlêc Yesu nêl vô he ên nêbê, “Buc ti wê tibii viyang ti lie ti obêc ii vêx ti lêc gên dô hixôn he ge, od he obêc ngîbua yaên, me? Maê. ³⁵Lêc obêc buc timuên wê tibii ob kô li tige vêl ên he ge, od ge wê he obêc dô hixôn viyin di ngîbua yaên.”

³⁶Mêd Yesu nêl kiyang pilepacên ti vô he bêga ên nêbê, “Xomxo ti nên ngakwi obêc tip ge, od obêc kiping ngakwi paha myahîpu ti vêl mi la duu lec tikwê lêm. Ên obêc vông bêge ge od obêc vông ngakwi paha vô nipaên, di myahîpu paha tige obêc la tiyi ngakwi tikwê lêm. ³⁷Di kiyang ngwe, xomxo ti obêc too mia wain paha vac bwoc ninivi tikwê lêm. Ên obêc too vac ge od wain obêc vuac di tax ninivi tikwê tip di wain too la. ³⁸Om wain paha ge, xomxo i too vac bwoc ninivi paha. ³⁹Di xomxo wê num wain tikwê ge obêc nêb num wain paha nang lêm, ên he nêl ên he nêbê wain tikwê nyen nivîha luu vêl.”

Yesu nêl kiyang lec môp sabat
(*Matyu 12:1-8; Mak 2:23-28*)

6 ¹Vô buc sabat ti, Yesu he nue ngivîhi la vô môp wê la vac yuac yaên ge ti. Mêd he mila lê, lêc nue ngivîhi le yul wit nôn wê tiyi xocbê pidi nôn ge di hilii ninivi la vêl di ya nôn. ²Lêc Palisi ya yê di nêl vô he ên nêbê, “Gwêbaga buc sabat wê Moses xolac ngîbua nêb il ob vông yuac ti lec lêm ge, lêc bêna lêc xam vông yuac lecê?” ³Lêc Yesu luu he vya bêga ên nêbê, “Môp wê bug Devit vông ilage, xam kitong, me xam lungên? Ên Devit he lie dô lê, lêc vip den he, ⁴om Devit la vac Anutu xumac ngîbua di la hôm blet ti wê he tung vô Anutu manôn ge. Blet tige, xomxo pileva o tiyi wê ob ya ge lêm. Nge, xomxo wê mi si daa vô Anutu ge, heche va ob ya. Lêc Devit kô mi lax ya dêc vông mi lie ya hixôn. Lêc Devit o vông i so lêm, ên xomxo wê mi si daa ge vaci vông mi i ya.” ⁵Di Yesu nêl hixôn vô he ên nêbê, “Om xam xovô bê a, Xomxo Nu, a tu buc sabat kehe hixôn.”

Yesu vông xomxo wê vigê nipaên ge ti vô nivîha lec vô buc sabat
(*Matyu 12:9-14; Mak 3:1-6*)

⁶Mêd sabat timuên ngwe Yesu la vac Yuda xumac lîlo mi la nêl xolac vô he. Lêc yê xomxo wê vigê hiyôv len yuu kilôhô xêlehe ge ti dô hixôn he.

7Lêc Yuda wê xovô Moses xolac gee hixôn he Palisi dô di yê Yesu xôn ên nêb ob yê bêc obêc vông xomxo tige vô nivaha lec vô sabbat ge od he ob vông kiyang vô i. 8Lêc Yesu xovô he nilô ge om nêl vô xomxo vigê nipaên tige ên nêbê, “Kidi mi lam le mahigun tinê.” Mêgem xomxo tyo kidi lec mi la le vac he mahigun. 9Om Yesu nêl vô he vihati ên nêbê, “A ob kinêg vô xam bê xolac wê il Yuda vông ge, nêb il vông bêna lec sabbatê? Nêb il vông nivaha me nêb il vông nipaên? Om il ob vông xomxo i vô nivaha, me il ob vông he i vô nipaên xel lec sabbat?” 10Mêd Yesu vô yê yê he vihati di nêl vô xomxo vigê nipaên tige ên nêbê, “Titô vigêm.” Mêd xomxo tyo titô vigê, lêc vigê vô nivaha lec. 11Om xomxo wê xovô Moses xolac gee yuu Palisi, he xêyaa vô myavinê mabu di he nêl voma ên nêbê, “Om il ob vông bêna vô Yesu?”

Yesu vînoo aposolo vigê yuu di tô mi la yuu

(Matyu 10:1-4; Mak 3:13-19)

12Vô buc tige Yesu la lec kitôn ti ên nêb ob la kitaa vô Anutu, om bucên tige yadiluhu Yesu kitaa vivuatitôv mi dô di vigwe vidii lec. 13Vigwe vidii mêd Yesu tyuc nue ngivihi vihati lam vô i mêd vînoo he vigê yuu di tô mi la yuu wê ob kô lê aposolo ge. 14Om he lê bêga, Saimon, wê Yesu nêl lê ngwe nêbê Pita, di Pita li Andlu, di Jems yuu Jon, di Pilip yuu Batolomyu, 15di Matyu yuu Tomas, di Jems ngwe wê ma Alpias ge, di Saimon Selot, 16di Judas wê ma Jems ge di Judas Iskaliot wê obêc hilung Yesu vô tibii vevac timuên ge.

Yesu vông xomxo tibeac vô nivaha lec

(Matyu 4:23-25)

17Pyap dêc Yesu he nue ngivihi sea kitôn tyo di lop mi lôm tô lec vigwe hibuhu ngwe. Di xomxo wê mi timu vô Yesu gee hixôn xomxo Judia vigwe nipwopwo hixôn vigwe levac Jelusalem, di Taia yuu Saidon wê yêp kwabo vô gwec ninya ge, he tibeac val kitucma mi dô, 18ên he nêb he ob ngô Yesu kiyang, di he wê yidac ge nêb Yesu i vông he ninivi i vô nivaha lec. Di xomxo wê vimwo nipaên vông he vô nipaên ge, Yesu tii vimwo vêl ên he di vông he vô nivaha lec. 19Mêgem xomxo gee vihati nêb obêc hóm lec Yesu ninivi, ên he yê wê xêkizêc wê Yesu vông ge la vông xomxo tibeac vô nivaha lec ge.

Kiyang xêyaa nivaha yuu kiyang viyin

(Matyu 5:1-12)

20Mêd Yesu yê ma la nue ngivihi di nêl vô he ên nêbê, “Xam wê xam xo ên xam nêbê xam o nivaha lêm ge, xam xêmyaa i nivaha, ên xam tu Anutu nue pyap.

21“Xam wê vip den xam ge, xam xêmyaa i nivaha, ên timuên ge od xam obêc wa i den xam.

“Di xam wê xam nilôm viyin di xam byag gwêbaga ge, xam nilôm i vô nivihā, ên xam obêc nap hixôn xêmyaa nivihā timuên. ²²Buc wê xomxo obêc yê xam nipaên ên wê xam vông i vin Xomxo Nu ge di obêc tii xam di nêl kiyang nipaên lec xam di so vya vô xam ên nêb xam tibii nipaên ge od xam nilôm i nivihā. ²³Om buc wê he obêc vông bêge vô xam ge od xam pimil di xêmyaa i vô nivihā lee, ên nôn nivihā wê xam obêc kô ge yêp vac Anutu ben lag puunê. Môp bêge wê he bue vông vô plopete ilage êno.

²⁴“Dom xam wê mone levac yuu susu tibeac ge, xam xona nêb, ên xam kô susu nivihā mi dô hixôn xêmyaa nivihā pyap, om xam obêc kô nivihā ti timuên nang lêm.

²⁵“Di xam wê xam wa i den ge, xam xona nêb, ên vip obêc den xam timuên.

“Di xam wê xam nap mi dô gwêbaga, xam xona nêb, ên xam obêc byag di dô hixôn nilôm viyin timuên.

²⁶“Om xomxo viyang viyang obêc pimil xam ge, od xam xona nêb, ên he bue vông bêge vô plopete kityooên ilage êno mêngê.”

II xêdyaa i vin lec xomxo wê vông vevac vô il ge

(Matyu 5:38-48)

²⁷Yesu nêl vô he ên nêbê, “A ob nêl vô xam wê xam ngô a kiyang ga bêga bê xam xêmyaa i vin lec xomxo wê vông vevac vô xam ge, di xam vông nivihā vô xomxo wê he xêyaa vô nipaên vô xam ge. ²⁸Di xam kitaa lec xomxo wê nêl vya vô xam ge, di xam kitaa vô Anutu bê i vông nivihā vô xomxo wê so vya vô xam ge. ²⁹Xomxo ti obêc pitap ông lia vilu ge od ông vông viluo hixôn vô i, di xomxo ti obêc kô ông saket ge od ông o léc kol siot lêm. Nge, ông vông vô i hixôn. ³⁰Di xomxo ti obêc kitaa susu ti vô ông ge od ông vông vô i, di xomxo ti obêc kô ông nêb susu ti mi la ge od le i léc kidu bê i vông i lôm vô ông lêm. ³¹Môp nivihā wê xam nêb xomxo i vông vô xam ge, od xam vông nivihā vô he êno bêge.

³²“Ên xam xêmyaa obêc vin lec xomxo wê xêyaa vin lec xam ge vaci di xêmyaa o vin lec xomxo baba hixôn lêm ge od xam ob kô pimilên nivihā lec môp tibêge tibêna? Ên tibii nipaên xêyaa vin lec xomxo wê xêyaa vin lec he ge êno. ³³Di xam obêc vông nivihā vô xomxo wê vông nivihā vô xam ge vaci ge od xam ob kô pimilên nivihā lec môp tibêge tibêna? Ên tibii nipaên êno mi vông môp tibêge. ³⁴Di xam obêc vông susu pileva vô xomxo léc xam nêb he i vông myaviwen vac ge od xam ob kô pimilên nivihā lec môp tibêge tibêna? Ên tibii nipaên mi vông susu pileva vô xomxo nêb he i vông myaviwen vac êno mêngê. ³⁵Om a ob nêl vô xam bê xam xêmyaa i vin lec xomxo wê vông vevac vô xam ge di vông nivihā vô he, di xam vông susu vô xomxo di le i léc xo bê he i vông myaviwen vac vô xam lêm. Xam obêc vông bêge ge od xam ob kô nôn nivihā luu vêl

timuên di xam ob tu Anutu lag puunê nue. Ên Anutu ge wê vông nivihavô tibi nipaên wê o mi pimil i lêm ge. ³⁶Mêgem xam êno xo vigwe pisiv ên xomxo di vông nivihavô he i tiyi xocbê Mag Anutu xo vigwe pisiv ên il ge.”

Kiyang wê ob yaxên xomxo ge
(*Matyu 7:1-5*)

³⁷Yesu nêl vô he ên nêbê, “Xam o lêc yaxên xomxo nêl kiyang lêm, êdêc Anutu i yaxên xam nêl kiyang êno lêm. Di xam o lêc nêl vyam nipaên lec xomxo bê he i kê myaviwen nipaên lêm, êdêc Anutu i nêl vya nipaên lec xam lêm. Di xam piwelac kiyang nipaên wê xomxo vông ge vêl êdêc Anutu i piwelac vêl ên xam êno. ³⁸Om xam vông susu vô xomxo lê, êdêc Anutu i vông vô xam êno. Ên Anutu obêc vông tibeac vô xam tiyi xocbê ob vông vac xam sepac mi i pup lec dêc kitiv i tô mi la, dêc kipyax ya lec hixôn mi i pup lec di kipyax sea ge. Ên môp wê xam vông vô xomxo ge od Anutu obêc vông i tiyi wê xam vông vô he ge vô xam.”

³⁹Mêgem Yesu nêl kiyang pilepacên ti vô he bêga ên nêbê, “Xomxo manôn tocên ngwe o tiyi wê ob didii xomxo ma tocên ngwe ge lêm. Ên ge od yuu xôn ob la tô madia. ⁴⁰Di nipwo xumac xulacên ti ob luu ma wê tixuu he ge vêl lêm. Lêc he obêc kê xovôên nivihavac xumac kipihac mi la tiyôd lec myahipu ge od he obêc tiyi xocbê ma wê tixuu he ge.

⁴¹“Om ông ge, bêna lêc ông wê xax mavigen wê le vac lim manôn ge di lungên levac mabu ngwe wê le vac ôcông va mamnôn ge? ⁴²Bêna lêc ông ob nêl vô lim bê, ‘Lige, a ob vông xax mavigen wê le vac ông mamnôn ge vêl,’ dom dilungên levac ngwe wê le vac ôcông va mamnôn ge? Ông xomxo kityooên, ông pul xax levac wê le vac ôcông va mamnôn ge vêl tax di mamnôn i seac nivihavô lê, êdêc pul nipwo tya wê le vac lim manôn ge vêl.”

Kiyang pilepacên lec xax nôl nivihavuu nipaên
(*Matyu 7:16-20; Matyu 12:33-35*)

⁴³Yesu nêl nang ên nêbê, “Xax nivihavô ti obêc vuac nôl nipaên lêm, di xax nipaên obêc vuac nôl nivihavô lêm. ⁴⁴Xax vihati ge il ob xovô lec nôl toto. Ên xomxo ob yul hîguc nôl lec hizap yatôv lêm, di xomxo ob yul viyodac nôl lec kipomac yatôv lêm. ⁴⁵Di il xomxo tiyi lec bêge. Ên xomxo wê piyôp nivihavô yêp vac he nilô ge od ob vông môp nivihavô di xomxo wê nipaên yêp vac he nilô ge od mi vông môp nipaên. Ên kiyang yuu xovôên wê pup vac xomxo nilô ge, xomxo mya nêl i lam seac.

Kiyang pilepacên lec xumac yuu
(*Matyu 7:24-27*)

⁴⁶“Bêna lêc xam nêl a ên xam nêbê, ‘Apumtau, apumtau,’ lêc xam o vông a vyag wê a nêl vô xam ge vô nôl lec lêmê? ⁴⁷Xomxo wê lam vô a

mì lam ngô a kiyang di vông a vyag vô nôn lec ge, a ob nêl he kitong vô xam. ⁴⁸He tiyi xocbê xomxo ti nêb ob lox xumac om yev lôva madia ta dêc hoo teac vac dêc tung ngidax la nêb ngidax i hôm teac xôn, dêc lox xumac lec, lêc lun val om mia butac mabu, lêc xumac tige o kipê lêm, ên xomxo tige lox i xumac xêkizêc ta. ⁴⁹Lêc xomxo wê ngô a kiyang lê, lêc o vông i vô nôn lec lêm ge, ge tiyi xocbê xomxo ti lox xumac lec kibun pileva di o yev hipu la vac kibun lêm, om mia butac mì val mabu ge od dii i nêb xumac sea.”

Yesu vông Lom tibii vevac ti nu yuac ti vô nivîha lec
(*Matyu 8:5-13*)

7 ¹Yesu nêl kiyang vihati mì xomxo ngô, pyap di i loc mì la vîgwe Kapaneam. ²Mêd Lom tibii vevac levac ti dô vac vîgwe tige, lêc i nu yuac ti vông yidac levac tiyi wê ob yib ge. Tibii vevac tyo xêyaa vin lec nu yuac tige, ³lêc ngô wê Yesu val vîgwe tige, om vông Yuda levac ya la vô Yesu ên nêb he i loc nêl vô Yesu ên i lam vông nu yuac tyo i vô nivîha lec. ⁴Om he mila vô Yesu dêc mila kitaa i xêkizêc ên nêbê, “Vô ninyam lehe vô tibii vevac tiganê vya, ên i ge xomxo nivîha, ⁵wê xêyaa vin lec il Yuda di i lox il xumac lilo ge.”

⁶Mêd Yesu ngô he vya di la hixôn he mì he la, mêd he mila kwabo vô tibii vevac tyo ben, lêc tibii tyo vông lie ya lam nêl i vya vô Yesu bêga ên nêbê, “Xomxo levac, a xomxo nigpaên, om ông o tiyi wê ông ob vac lam vac a bog xumac lôma ge lêm, ⁷om a xovô ên a nêb a ob loc le vô ông mamnôn lêm. Lêc a nêb ông le teva di vyam pileva i nêl, ên a nug i vô nivîha lec. ⁸A xovô bêge, ên a ga êno wê a la vac xomxo levac vilu kwa ngibi, di a nuge vevac ge wê la vac a kwa ngibi. Om a obêc nêl vô he ti bê i loc ge od ob la, di a obêc nêl vô ti bê i lam ge od ob lam, di a obêc nêl vô a nug yuac ti bê i vông yuac tige ge od ob vông. Om a xovô ên a nêbê ông ge xomxo xêkizêc om ông obêc le teva di nêl ge od a nug ge ob vô nivîha lec.”

⁹Yesu ngô kiyang wê xomxo tige nêl hixôn vông vinên ge om yetac ên di pop manôn lax vô xomxo tibeac wê ditimu vô i vîxa ge di nêl vô he ên nêbê, “Xame, a ob nêl vô xam bê a o xê Islel ti vông i vin xêkizêc tiyi xocbê tibii tiga vông ge lêm.” ¹⁰Om xomxo wê tibii levac tige vông he la ge lax mì la tibii levac tyo ben, lêc milax yê wê nu yuac tyo vô nivîha lec ge.

Yesu tipi vô vêxôv ti nu kidi lec maviha

¹¹Nang dêc buc ti lêc Yesu la vîgwe Nen, di nue ngivîhi hixôn xomxo tibeac hiwocên la hixôn. ¹²Mêd Yesu mila kwabo vô vuayen wê ob la vac vîyangtôv ge, lêc xomxo ken xomxo yibên ti mì val ên nêb ob kô mì la yev. Vêx vêxôv ti nu tîbed tige, om xomxo vîyang tige tibeac lam hixôn

i. ¹³Mêd Apumtau Yesu yê vêx tige di xo vigwe pisiv ên i om nêl vô i ên nêbê, “Byagên i ma.” ¹⁴Mêd la vyax vigê lec pêt wê yibên yêp lec ge di xomxo wê ken ge le, dêc Yesu nêl vô yibên tyo ên nêbê, “Nug, a nêl vô ông bê ông kidi lec.” ¹⁵Om yibên tyo kidi lec mi dô di keac vô he, dêc Yesu vông i lax vô ta. ¹⁶Mêgem xomxo tigege yê di xona mabu, di pimil Anutu ên nêbê, “Il nêd plopete levac ti kidi vac il mahigun ga mê.” Di he ya nêbê, “Gwêbaga Anutu val le seac vô il madnôn ên nêb ob hôm il wê il tu ixê ge lec.” ¹⁷Mêd xomxo nêl Yesu lê kitong mi i vô levac mi la vac vigwe Judia vihati di la vac vigwe ninya ninya hixôn.

Jon Lipacên vông nue ngivihi la kinêg Yesu kehe
(*Matyu 11:2-19*)

¹⁸Mêd Jon Lipacên nue ngivihi lax mi la nêl Yesu do levac wê vông ge kitong vô Jon, ¹⁹om Jon keac nue ngivihi yuu lam vô i di nêl vô yuu nêbê yuu i loc vô Apumtau Yesu ên loc kinêg vô i bê, “Xomxo ti wê plopete ilage nêl ên nêb obêc val ge, ông xomxo tyo tiga mê, me xe ob dô bin xomxo ngwe?” ²⁰Mêgem yuu mila vô Yesu di la nêl vô i ên nêbê, “Jon Lipacên vông xii lam ên nêb xii lam kinêg ông bê xomxo ti wê plopete ilage nêl ên nêb obêc val ge, ông xomxo tyo tiga mê, me xe ob dô bin xomxo ngwe lê?”

²¹Vô buc tya ge Yesu dô di vông xomxo yidac kehe toto tibeac vô nivîha lec di tii vimwo nipaên vêl ên xomxo tibeac, di vông xomxo wê manôn tocên ge, manôn seac. ²²Mêgem Yesu nêl vô yuu ên nêbê, “Muu lôc mi loc di nêl môt wê muu ngô yuu wê ge kitong vô Jon bê xomxo manôn tocên, manôn seac, di xomxo vixa nipaên, vixa vô nivîha lec mi he la nivîha, di xomxo wê kityax mahizihizi ge, kityax yôv di he vô nivîha lec, di xomxo wê ninya vô kitu ge, ngô kiyang, di xomxo yibên kidi lec maviha tii vac nang, di xomxo wê nêc susu maên gee ngô xolac nivîha. ²³Xomxo wê nilô o vông yuu lec a lêm ge wê obêc dô hixôn xêyaa nivîha.”

²⁴Jon nue ngivihi yuu ge lax mi la vêl, dêc Yesu nêl Jon kehe kitong vô xomxo tigege ên nêbê, “Ilage wê xam la vô Jon vac vigwe mahigun pileva ge, xam nêb xam ob la wê va? Xam nêb xam ob la ên la wê duvac wê lea kilê i la di i hivip lec nang ge, me? ²⁵Xam la ên xam nêb xam ob la wê vatya? Xam nêb xam ob la wê xomxo wê vinyum ngakwi nivîhaviha ge ti, me? Lêc xomxo wê vinyum ngakwi paha wê nivîha ge wê mi dô vac king ben. ²⁶Xam la ên xam nêb xam ob la wê plopete ti? Vixôhilôg, a nêl vô xam bê i plopete ti, lêc luu plopete vihati vêl. ²⁷Ên Anutu nêl Jon kitong mi i yêp vac kipihac xolac bêga ên nêbê,

‘Ngô lê, a ob vông xomxo ti i kô a kiyang mi loc mug ông nêc môt, ên i viac môt wê ông obêc mila vac ge.’

²⁸Anutu kiyang bêge, di a ob nêl vô xam bê Jon ge xomxo levac luu xomxo kibun ga vihati vêl. Vixôhilôg, lêcom xomxo vihati wê vô nipwo lec vac Anutu ben ge obêc luu Jon vêl.”

²⁹Mêd xomxo wê mi kô takis gee hixôn xomxo vihati, he ngô Yesu kiyang tige di vô ninya lehe vô ên nêbê Anutu môp ge nivihã, ên ilage he pilepac he di Jon lipac he. ³⁰Lêc Palisi yuu xomxo wê xovô Moses xolac gee, he vô nimi vô Anutu môp nivihã wê hilung vô he ge, om he nêb Jon i o lêc lipac he lêm.

³¹Mêd Yesu nêl nang ên nêbê, “Xomxo buc gwêbaga, he va bêna? A ob tixuu he môp lec kiyang ti. ³²He tiyi xocbê nue nipwo wê dô lec wetôv di tyucma ên nêbê, ‘Xame, xe hi vyang lêc xam o yoo lêm, nang di xe vông tilôt lê, lêc xam o byag lêm.’ He môp tiyi xocbê môp wê xam nêl vô xii Jon ge, ³³ên Jon Lipacên val, lêc mi ngibua yaên di numên wain ma, lêcom xam nêl ên xam nêbê vimwo nipaên dô vac i nilô. ³⁴Nang dêc a, Xomxo Nu, a val lêc a mi xa di num vô, di a o ngibua ti lêm, lêc xam nêl ên xam nêbê, ‘Wê lê. Xomxo tige va mi ya levac di mi num wain levac mi vô mavmav, di mi dô hixôn xomxo wê mi kô takis lêc mi vun mangwe ge yuu tibii nipaên.’ ³⁵Xam mi nêl bêge, lêcom a ob nêl vô xam bê xomxo wê timu vô piyôp nivihã di kô xovôên vô Anutu ge, he nêl ên nêbê xovôên wê Anutu vông ge nôn vixôhilôg.”

Vêx nipaên ti lipac wel nivivea lec Yesu vixa

³⁶Palisi ti lê nêbê Saimon nêl vô Yesu ên nêb i loc vac i ben ên yuu ob ya. Om Yesu la vac i ben di yuu dô di ya. ³⁷Mêd vêx nipaên ti wê mi dô vac vigwe tige ngô wê Yesu la dô vac Palisi tyo ben di la ya hixôn i ge, om kô butol nivihã ti wê wel nivivea le vac ge di la vac Palisi tyo ben, ³⁸di la le kwabo vô Yesu vixa di byag mi dô, di maluc yuc lec Yesu vixa pitehe. Om vêx tyo kitya maluc ya bazub lihi, di hiwaa Yesu vixa pitehe di lipac wel nivivea tyo lec Yesu vixa.

³⁹Mêd Palisi ti wê nêl Yesu lam vac i ben tige yê môp wê vêx tyo vông ge, om xo bêga ên nêbê, “Xomxo tige obêc plopete ti vixôhilôg ge od obêc xovô vêx tige wê lam hôm vigê lec i ge di obêc xovô i môp wê mi vông ge bê i vêx nipaên ti.”

⁴⁰Mêd Yesu nêl vô Palisi tyo ên nêbê, “Saimon, a ob nêl kiyang ti vô ông.” Mêd Saimon nêl lax vô ên nêbê, “Om ông nêl kiyang ti wê ông ob nêl ge.” ⁴¹Om Yesu nêl ên nêbê, “Xomxo yuu la kô mone vô xomxo ti, ngwe kô mone yul ti (K100) di ngwe kô mone kipihac ti (K10). Om yuu xôn myaviwen yêp vô xomxo tige. ⁴²Lêcom yuu xôn o tiyi wê yuu ob lax hi myaviwen vêl ge lêm, om xomxo tyo vaci hi yuu myaviwen vêl. Om a ob kinêg vô ông bê xomxo yuu ge, ngwe na xêyaa ob vin lec xomxo tyo luu vêlê?” ⁴³Mêd Saimon nêl ên nêbê, “Mêd obêc ngwe wê i myaviwen levac ge.” Mêd Yesu nêl vô i ên nêbê, “Ông nêl lec bôbac.”

⁴⁴Mêd Yesu pilepac i vô vêx tige di nêl vô Saimon ên nêbê, “Om wê vêx tiga. A lam dô vac ông bom ga lê, lêc ông o timu vô môp wê il Yuda mi vông ge lêm di vông mia ên a lipac vixag vac lêm. Dom vêx tiga lipac

a vixag ya maluc di kitya vël ya bazub lihi. ⁴⁵Di buc wê a lam vac ông bom ga ge, od ông o pul a vigêg di hôm a lec nivihâ lêm. Dom vêx tige val lê, léc hôm a lec nivihâ di le hiwaa a vixag. ⁴⁶Di ông o lipac wel lec a bagzub lêm. Dom vêx tiga val lipac wel nivivea lec a vixag. ⁴⁷Om a ob nêl vô ông bê vêx tiga xêyaa vin lec a luu vël om nêl i kitong ên nêbê i nêl nipaên tibeac lê, léc Anutu kitya vihati vël om i xêyaa vin lec a luu vël. Léc xomxo ngwe wê Anutu kitya i nêl nipaên yuutyabed vël ge od xêyaa obêc vin lec Anutu nipwo tya.” ⁴⁸Mêd Yesu nêl vô vêx tyo ên nêbê, “A nêl vô ông bê a kitya ông nêl nipaên vël pyap.” ⁴⁹Mêd xomxo wê dô mi ya hixôn Yesu gee xo bêga ên nêbê, “Xomxo tige letya léc kitya xomxo nêl nipaên vêlê?” ⁵⁰Mêd Yesu nêl vô vêx tyo ên nêbê, “Vông vinên wê ông vông ge, ge wê kitya ông nêl nipaên vël di vông ông vô nimvihâ lec. Om ông lôc hixôn xêmyaa nivihâ.”

Vêx wê mi la hixôn Yesu gee

8 ¹Nang dêc Yesu he nue ngivihî vigê yuu di tô mi la yuu tup vac vigwe levac yuu nipwo toto, di Yesu nêl Anutu ben kehe kitong vô xomxo. ²Mêd vêx ya mi la hixôn Yesu he nue ngivihî ên nêb ob viac he. Vêx tige wê ilage Yesu tii vimwo nipaên vêl ên mangwe di vông he mangwe yidac kehe toto ge vô nivihâ lec. Om he lê bêga, Malia Makdala ti wê Yesu tii vimwo nipaên vigê vilu di sec yuu la vêl ên i ge, ³di Joana wê liya Susa mi viac King Helot xumac ge, di ti lê Susana, di vêx tibeac yaya hixôn. Om vêx tige wê viac Yesu he nue ngivihî ya he mone di ngidu he xôn ên yuac wê he vông ge.

Kiyang pilepacên lec xomxo ti wê liloo vê vac yuac ge (Matyu 13:1-9; Mak 4:1-9)

⁴Om buc ti léc xomxo tibeac vac vigwe toto toto ge kituc la vô Yesu, mêgem Yesu nêl kiyang pilepacên ti vô he bêga ên nêbê, ⁵“Xomxo ti kidi mi la ên nêb ob la liloo ngec vê vac yuac. Om liloo i la lê, léc vê mangwe tô vac môp om xomxo kê di menac lam ya. ⁶Di ya tô lec ngidax wê kibun nipwo tya dô lec ge, om tyip lutibed léc kibun niluc ma om hiyôv ya i vilôvac di i yib. ⁷Di mangwe tô mi la dô vac hivu kehe om hivu tyip hixôn di hi i yib. ⁸Di mangwe tô mi la dô vac kibun nivihâ om tyip nivihâ di vuac nôn nivihâ 100 100 tiyi kehe toto ge.” Yesu nêl bêge vô he dêc nêl ên nêbê, “Xomxo ti ninya obêc yêp ge od i ngô di xovô.”

Yesu nêl kiyang pilepacên kehe kitong (Matyu 13:10-23; Mak 4:10-20)

⁹Mêd Yesu nue ngivihî kinêg kiyang pilepacên tige kehe vô Yesu. ¹⁰Om Yesu nêl vô he ên nêbê, “Kiyang lec Anutu môp yuu ben ge yêp xôpacên lê, léc Anutu nêb ob hilung kehe vô xam ên xam xovô. Di xomxo baba ge

ngô kiyang tiyi xocbê kiyang pilepacên pileva, om he yê lê, léc yêvôên nôn ti ma, di he ngô kiyang lê, léc xovôên kehe ma.

¹¹“Kiyang pilepacên tyo kehe bêga nêbê vê ge Anutu kiyang. ¹²Di vê wê tô vac môp ge, ge tiyi xocbê xomxo ngô Anutu kiyang lê, léc lutibed Seten lam vô vêl ên he nilô, ên nêb he i o léc vông i vin Anutu di i vô he vêl ên nipaên lêm. ¹³Di vê wê tô mi la dô lec ngidax wê kibun nipwo tya dô lec ge, ge tiyi xocbê xomxo ngô xolac di vông i vin lutibed hixôn xêyaa nivihha tax tyaa, léc he tiyi xocbê ngec wê ngilôhô maên ge, ên he vông i vin nipwo tya léc Seten yaxên he ge od he sea vông vinên lutibed. ¹⁴Di vê wê tô mi la dô vac hivu kehe ge, ge tiyi xocbê xomxo ngô xolac mi dô lê, léc he nilô xovô susu nivihaviha kibun ga yuu mone hixôn viyin ya wê ob tulec he ge om hivun xolac xôn di nôn ma. ¹⁵Di vê wê tô mi la dô vac kibun nivihha ge, ge tiyi xocbê xomxo wê ngô xolac mi xovô di hôm pilihhi hixôn nilô yuu xovôên nivihha, om he le xêkizêc ta di vô nôn tibeac.

Kiyang pilepacên lec lam

(Mak 4:21-25)

¹⁶“Xomxo ti obêc byêx ngwax vac lam ge od ob lax dêg lec me vun vac pêt ngibi lêm. Nge, ob yu i yux seac ên xomxo wê ob lam vac xumac nilô ge, he i lam yê xêseac. ¹⁷Ên kiyang vihati wê yêp xôpacên ge obêc lam le seac, di kiyang vihati wê yêp vac nilô ge obêc hivelac lec mi nôn lam le seac.

¹⁸“Mêgem kiyang wê xam ngô ge, xam vyac xovô nivihha lê. Ên xomxo wê xovô kiyang mi hôm pilihhi ge od Anutu obêc kipyax tibeac lec hixôn vô i. Léc xomxo wê o xovô kiyang mi hôm pilihhi lêm ge od nipwo tya wê dô vô i ge, Anutu obêc vô vêl.”

Yesu tae lie

(Matyu 12:46-50; Mak 3:31-35)

¹⁹Yesu tae lie val ên nêb ob la vô Yesu, léc tiyiên ma ên tibii tibeac kitucma om kisuu Yesu lec. ²⁰Om xomxo ya nêl vô Yesu ên nêbê, “Tame lime val le vixun ên nêb ob yê ông.” ²¹Léc Yesu nêl vô he ên nêbê, “Xomxo wê ngô Anutu xolac di vông i vô nôn lec ge, ge wê tu a tage lige ge.”

Yesu nêl om lea viyiiên tip la

(Matyu 8:23-27; Mak 4:35-41)

²²Buc ti lê léc Yesu he nue ngivihi lec dipac ti di Yesu nêl vô he ên nêbê, “Il ob la mia luaên vilu ganê.” ²³Om he la lê, léc Yesu yêp mêd lea viyiiên mabu ti val om vông mia vuac mabu tiyi wê ob pup lec dipac di kipyax he la vac mia ge. ²⁴Om nue ngivihi la tipi vô Yesu di nêl ên nêbê, “Xomxo levac, il ob la xib ga.” Om Yesu

kidi lec di pipping lea yuu mia vuacên di i tip la di mia vô malehe lec. ²⁵Mêgem Yesu nêl vô nue ngivihi ên nêbê, “Xam vông vinên tyo nôn tina?” Mêgem he xona di yetac mabu di nêl vôma ên nêbê, “Xomxo tiga letya léc nêl vya lec lea yuu mia di i vô ninya lehe vô i di tip la lutibedê?”

Yesu tii vimwo nipaên vêl ên xomxo ti
(*Matyu 8:28-34; Mak 5:1-20*)

²⁶Yesu he nue ngivihi loc mi la tibii Gegesa ben wê yêp mia luaên vilu ganê ge di Galili ge yêp mia vilu. ²⁷He mila lop vêl ên dipac di xomxo ti vac vigwe tige val vô Yesu. Vux tige vimwo nipaên dô vac i nilô mi vông i piyôp vô yacyac om buc mahigun dia tige o mi vinyum vinyumên ti lêm, di sea ben viyangtôv yuu xumac wê ob yêp vac ge di la mi yêp vac vigwe wê xomxo yev yibên vac ge. ²⁸⁻²⁹Om xomxo mi ku i vigê yuu vixa xôn ya sen di yê i xôn mi dô lê, léc buc tibeac vimwo nipaên ngigax i xêkizêc di tax sen tip sea di kô i mi la vac vigwe myadongên. Mêd xomxo tyo yê Yesu di la yev vixa vô i, di Yesu pipping vimwo nipaên nêb i loc vêl ên xomxo tyo. Om xomxo tyo iac mabu di nêl ên nêbê, “Yesu, ông ge Anutu lag puunê nu ông, lêcom ông ob vô va vô a? A kitaa ông bê ông o léc vông a vô nipaên lêm.”

³⁰Mêd Yesu kinêg vô i ên nêbê, “Ông lêm le?” Léc tyo nêl ên nêbê, “A lêg kehe nêbê kidu levac.” Nêl lê bêge, ên vimwo nipaên tibeac dô vac i nilô. ³¹Mêd vimwo nipaên tigeê kitaa Yesu ên nêbê, “Ông o léc tii xe la vac Seten ben nipaên lêm.”

³²Bwoc kidu levac diya mi le lec kitôn tige, om vimwo nipaên tigeê kitaa Yesu ên nêb i vông he la dô vac. Om Yesu tyuc lec, ³³di vimwo nipaên tigeê lam la vêl ên xomxo tyo di la dô vac bwoc tyoe nilô, mêd bwoc tyoe tup mi la di la vac vigwe madia di la tô vac mia luaên di num mia mi yib mima vêl.

³⁴Mêd xomxo wê mi viac bwoc tyoe ge yê wê bwoc la yib mima vêl ge, om pec mi la, di mila nêl kitong vô tibii vac vigwe levac hixôn vigwe nipwo viyang viyang ge. ³⁵Om tibii wê ngô kiyang ge la ên nêb ob la yê han, mêgem he mila vô Yesu léc yê wê xomxo ti wê vimwo nipaên dô vac i ge, vimwo nipaên lop mi la vêl di i dô hixôn piyôp nivihâ di vinyum ngakwi lec di xeedô kwabo vô Yesu di ngô Yesu kiyang. Om he yê tige di xona mabu. ³⁶Mêgem xomxo wê dô mi yê wê Yesu tii vimwo nipaên vêl ên xomxo tige mi vông i vô nivihâ lec ge, nêl i tyi wê he yê ge kitong vô tibii wê val gee hixôn. ³⁷Om tibii Gegesa vihati kitaa Yesu ên nêb i loc vêl ên he ben. He nêl bêge ên he xona mabu, mêgem Yesu lec dipac ên nêb ob lax mi la. ³⁸Léc xomxo ti wê Yesu tii vimwo nipaên vêl ên i ge, lam kitaa Yesu ên nêb ob la hixôn, léc Yesu vông i lax mi la ben di nêl vô i ên nêbê, ³⁹“Ông lôc mi loc bom di loc nêl do levac wê Anutu vông vô ông ge kitong vô xomxo vihati.” Mêgem xomxo tyo lax mi la ben di la nêl kiyang wê Yesu vông i vô nivihâ lec ge kitong vô xomxo vihati.

Jailas nu vêx, di vêx yidac ngwe, yuu kiyang
(*Matyu 9:18-26; Mak 5:21-43*)

⁴⁰Yesu lax mi la mia luaên vilu Galili ge nang, léc xomxo tibeac dibin i mi xeedô, om he xêyaa vô nivihã ên wê Yesu vena ge. ⁴¹Mêd xomxo levac ti lê nêbê Jailas val vô Yesu. Jailas ge wê tu levac di mi viac lie Yuda hixôn xumac lilo ge, léc lam yev vixa kitu vô Yesu di kitaa i ên nêbê i loc vac i ben, ⁴²ên nu byac vông yidac levac ti mi vô kwabo lec wê ob yib ge. Nu byac tige tibeac di i klismas 12.

Om Yesu la hixôn Jailas mi yuu la, léc xomxo tibeac lam vuac lec Yesu. ⁴³Mêd vêx ti dô vac he mahigun, léc vêx tige, yidac kwatuacên vông i tiyi klismas 12, léc o ma lêm, di vêx tyo vông i mone la mima vô docta lê, léc ti o tiyi wê ob vông i vô nivihã lec ge lêm. ⁴⁴Mêgem vêx tyo val le vô Yesu nimi di vyax vigê lec Yesu ngakwi myahipu mêgem lutibed hi tyo kwep lec. ⁴⁵Mêd Yesu nêl ên nêbê, “Letya vyax vigê lec a?” Léc xomxo vihati nêl lax ên nêbê, “Maê, xe ga maê.” Mêgem Pita nêl ên nêbê, “Xolac kehe, xomxo tibeac le i ngivina ông di vigwe tocên ma, om letya yêvô ti wê vyax vigê lec ông ge?” ⁴⁶Léc Yesu nêl lax ên nêbê, “Ti vyax vigê lec a, om a yaxên léc xêkizêc la vêl ên a.” ⁴⁷Mêgem vêx tige xovô nêbê o tiyi wê ob yax i vun ge lêm, om la hixôn ni yetacên mi la yev vixa vô Yesu di nêl i kehe wê vyax vigê lec Yesu ge kitong di nêl lec wê i yidac ma lutibed ge kitong hixôn, di xomxo tige vihati yê hixôn. ⁴⁸Mêgem Yesu nêl vô i ên nêbê, “Nuge, vông vinên wê ông vông ge, ge wê vông ông vô nimvihã lec. Om ông lôc hixôn nilôm nivihã.”

⁴⁹Yesu gên dinêl kiyang mi dô, di xomxo ti vac Jailas ben val nêl vô Jailas ên nêbê, “Num byac yib gwêba, mêgem le i léc vông yuac levac vô xolac kehe mi i lam lêm.” ⁵⁰Mêd Yesu ngô kiyang tige di nêl vô Jailas ên nêbê, “Le nilô i vô viyin lêm. Nge, ông vông i vin mô, ên num ge ob vô nivihã lec.” ⁵¹Mêgem Yesu mila Jailas ben léc nêl vô xomxo vihati ên nêbê he i dô vixun, dec kô Pita yuu Jon di Jems di nu tige ta yuu ma hixôn di he la vac xumac lôma. ⁵²Mêd xomxo vihati byag mi vông tilôt ên vêx tyo mi dô, léc Yesu nêl vô he ên nêbê, “Byagên i ma, ên vêx ge o yib lêm. Nge, ici va yêp.” ⁵³Léc xomxo tige nap lec Yesu kiyang ên he xovô ên he nêbê vêx ge yib vêl. ⁵⁴Mêléc Yesu la hôm lec vêx tyo vigê di nêl vya levac ên nêbê,

“Byac, kidi lec.” ⁵⁵Mêgem vêx tyo myakilôhô lax mi la vac ninivi di i kidi lec lutibed mi dô, di Yesu nêl ên nêbê, “Xam vông yaên ti mi i ya.” ⁵⁶Mêd vêx tyo ta yuu ma yetac mabu ên wê nu kidi lec ge, léc Yesu nêl vô yuu ên nêbê, “Muu o léc nêl ga kitong vô xomxo ti lêm.”

Yesu vông yuac vô nue ngivihã
(*Matyu 10:5-15; Mak 6:7-13*)

9 ¹Yesu tyuc nue ngivihã vigê yuu di tô mi la yuu la vô i di vông xêkizêc wê i vông ge vô he ên nêbê he i loc tii vimwo nipaên vêl ên

xomxo di vông xomxo yidac i vô nivihalec. ²Mêd Yesu vông he la ên nêb he i loc nêl Anutu ben yuu môp kitong vô xomxo i tiyi vigwe vihati di vông he wê yidac gee i vô nivihalec. ³Mêd nêl vô he ên nêbê, “Xam o léc kô susu ya hixôn léc loc vô môp lêm, xocbê pitoa yuu vixec di yaên yuu mone di vinyumên yuu lêm. Nge, xam loc ya vigêm pileva di vinyumên tibed. ⁴Di xam obêc mila vac vigwe ti mi la dô vac xumac ti ge od xam dô vac xumac tige tibed i tiyi buc wê xam ob dô ge. Pyap dêc xam sea vigwe tige di loc bangwe. ⁵Lêc xam obêc mila vac vigwe ti lêc xomxo viyang tige o hôm xam lec nivihalec lêm ge od xam liloo vijuva vêl ên vixam ên i nêl he nêl nipaên kitong vô he di loc.” ⁶Om Yesu nue ngivihi la vac vigwe viyang viyang ge di la nêl xolac vac vigwe toto ge di vông xomxo yidac vô nivihalec.

Helot ngô kiyang lec Yesu
(*Matyu 14:1-2; Mak 6:14-16*)

⁷Hizap levac Helot ngô kiyang wê xomxo mi nêl lec Yesu ge léc vông i nilô vô juda juda, ên xomxo ya nêl ên nêbê Yesu ge Jon Lipacên wê yib ge léc kidi lec nang, ⁸di xomxo ya nêl ên nêbê ge plopete Ilaija wê dô ilage om vena nang, di he ya nêl ên nêbê ge plopete ilage ti kidi lec vac yibên. ⁹Mêd Helot nêl ên nêbê, “Jon Lipacên ge wê a kitov i kwa ilage, lêcom xomxo letya tiganê léc tibii dinêl kiyang tibêge lec i?” Om Helot myag ên nêl ob yê Yesu.

Yesu vet xomxo 5,000
(*Matyu 14:13-21; Mak 6:30-44; Jon 6:1-13*)

¹⁰Mêd nue ngivihi wê Yesu vông he la yuac ge vena nêl he yuac kitong vô Yesu. Om Yesu kô heche va dêc sea xomxo baba dô di he la vac vigwe ti lê nêbê Betsaida. ¹¹Lêc xomxo ngô wê he la ge om timu vô Yesu he nue ngivihi vixa dêc mila vô he, mêd Yesu xêyaa vô nivihalec ên wê he mila ge, om nêl Anutu ben yuu môp kitong vô he di vông he wê yidac ge vô nivihalec. ¹²He dô di vigwe huc om nue ngivihi vigê yuu di tô mi la yuu la nêl vô Yesu ên nêbê, “Vông xomxo tigae i loc, ên he i loc vac vigwe viyang viyang ge ên loc kisuu yaên di loc yêp, ên vigwe ga, vigwe myadongên.” ¹³Lêc Yesu nêl vô he ên nêbê, “Xacxam va ob vông yaên vô he mi he i ya.” Lêc he nêl lax vô Yesu ên nêbê, “Xe xom yaên ga o tibeac lêm, blet vigê vilu di beac yuutyabed. Lêcom ông nêb xe la kisuu yaên vô xomxo tibeac tigae, me?” ¹⁴He nêl bêge ên xomxo tige tibeac hiwocên mêgem vux vaci, he 5,000.

Mêgem Yesu nêl vô nue ngivihi ên nêbê, “Xam vông he i loc dô kidu kidu i tiyi xomxo kehe yuu di vigê yuu (50).” ¹⁵Om he vông tibii la dô i tiyi wê Yesu nêl ge. ¹⁶Mêgem Yesu hôm blet vigê vilu ge hixôn beac yuu ge di lax ma la lag kisiinê dêc kitaa lec blet yuu beac di hibû mi vông vô

nue ngivihi ên nêb he i kô mi loc titang vô xomxo tyoe. ¹⁷Mêd xomxo vihati ya i den he dêc nue ngivihi la kituc myapipu wê gên dô ge mi su vac sepac vigê yuu di tô mi la yuu mi i pup lec.

Pita nêl Yesu kitong nêb i Kilisi

(Matyu 16:13-28; Mak 8:27-9:1)

¹⁸Buc ti Yesu he nue ngivihi la dô vac vigwe ti, mêd Yesu vaci kitaa vô ma Anutu mi dô. Pyap dêc kinêg vô nue ngivihi ên nêbê, “Xomxo mi nêb a letya?” ¹⁹Mêd he nêl lax vô i ên nêbê, “Ya nêbê ông ge Jon Lipacên, di ya nêbê ông Ilaija, di ya nêb ông plopete ilage ti lêc ông kidi lec vac yibên mi dô gwêbaga.” ²⁰Mêd Yesu nêl vô he ên nêbê, “Di xacxam va nêb a letya?” Mêlêc Pita nêl ên nêbê, “Ông ge Kilisi wê Anutu vông ông lam ge.” ²¹Mêd Yesu nêl kiyang xêkizêc vô he nêbê he i o lêc nêl i kitong vô xomxo ti lêm, ²²di nêl vô he ên nêbê, “A, Xomxo Nu, a obêc kô myavinê levac mabu, di he Yuda levac levac hixôn xomxo levac wê mi si daa vô Anutu gee hixôn he wê xovô Moses xolac gee, he obêc vô nimi vô a di hi a xib, di buc yon obêc la vêl lêc a obêc kidi lec magviha i tii vac nang.”

²³Mêd Yesu nêl vô he vihati ên nêbê, “Xomxo ti obêc nêb timu vô a kiyang ge od i vông i vô nipwo lec i tiyi buc vihati di kilê viyin i tiyi xobê kilê xax pola ge mi timu vô a vixag. ²⁴Ên xomxo ti obêc viac ici va ninivi nivihâ ên nêb ob dô maviha ge od kinu hixôn ninivi obêc yib. Lêc xomxo ti obêc sea ninivi lec a lêg ge od obêc dô maviha luta. ²⁵Ên xomxo ti obêc kituc susu kibun ga vihati tu ixê, lêc ici va obêc yib mi la vac nipaên ge od obêc vô nivihâ vô i tibêna? ²⁶Ên xomxo ti obêc vô nimi vô a hixôn a xolac ge od a, Xomxo Nu, a êno obêc vô nimig vô i lec buc wê a obêc lop mi lôm hixôn xêseac wê Mag Anutu yuu angela ngibua vông ge. ²⁷Lêc a ob nêl hixôn nôn vô xam bê xam wê xam le ga, xam ya ob dô mi wê wê Anutu nu ob lam tu king ge lê dêc wib timuên.”

Yesu ninivi pilepac

(Matyu 17:1-13; Mak 9:2-13)

²⁸Yesu nêl kiyang tige pyap dêc da ti la vêl mêd kô Pita yuu Jon yon Jems mi he la lec kitôn ti ên Yesu nêb ob la kitaa. ²⁹Om Yesu kitaa mi dô, lêc ninivi pilepac mi vô bangwe di i ngakwi vô makwem ta di tee lec vigwe. ³⁰⁻³¹Mêd lutibed xomxo yuu lam hixôn xêseac mi lam le hixôn Yesu di yon keac. Ge Moses yuu Ilaija, om yuu nêl lec môp wê Yesu ob la vông gê Jerusalem di nêl lec wê ob sea kibun ga ge.

³²Pita yon li yuu manôn vô yêp yêp lê, lêc yon manôn seac di yon yê xêseac wê Yesu vông ge di yê xomxo yuu wê le hixôn i ge. ³³Pyap mêd xomxo yuu ge nêl vô Yesu ên nêb yuu ob la, lêc Pita nêl vô Yesu ên nêbê, “Xolac kehe, ga nivihâ wê il dô ga, om xen ob lox xumac yon, ông nêb ti, di Moses nêb ti di Ilaija nêb ti.” Pita lungên kiyang wê ob nêl ge om nêl kiyang bêge pileva.

³⁴Pita gên nêl kiyang tige dêc viyobtoc ti lam hivun he xôn om yon xona. ³⁵Mêd vya ti lam vac viyobtoc di nêl ên nêbê, “Ge a nug wê a vinoo i ge om xam ngô i vya.” ³⁶Vya nêl pyap mêd yon yê wê Yesu tibeac xeele ge. Mêd vô buc tige yon o nêl kiyang wê yon yê ge kitong vô xomxo ti lêm.

Yesu tii vimwo nipaên vêl ên xomxo ti
(*Matyu 17:14-21; Mak 9:14-29*)

³⁷Vigwe vidiên titige he sea kitôn di lax mi la, lêc mila vô xomxo tibeac wê dival vô môp ge, ³⁸mêd xomxo ti vac he mahigun tyuc vya levac ên nêbê, “Xolac kehe, a kitaa ông bê ông wê a nug vux tiga lê, ên a nug nô n tibeac ga mê. ³⁹Lêc buc tibeac vimwo nipaên ti hôm i xôn di vông i iac mabu di vô pwoo pwoo i mi hi i lec kibun di mya ngimong lam, om vông i vô nipaên di o sea i lutibed lêm. ⁴⁰Om a kitaa nume ngivihi ên a nêb he i tii vimwo nipaên tiga i loc vêl lêc he tiiyên ma.”

⁴¹Mêgem Yesu nêl vô he ên nêbê, “Xam gwêbaga, xam nê mông vông vinên ma. Xam nilôm gên nipaên. Om a ob dô hixôn xam di i miloc na lê lêc xam vông i vinê? Di a ob kilê viyin wê xam vông ge di i miloc na lê? Om kô num tyo mi lamê.” ⁴²Mêd nu tige gên kidi mi lam lêc vimwo nipaên tige hôm i di nêx i la hi i sea lec kibun. Mêgem Yesu lec ni vô vimwo nipaên tige mi tii i la vêl di vông nipwo tyo vô nivihha lec di vông i lax vô ma. ⁴³Om xomxo tige vihati yê di yetac mabu ên xêkizêc levac wê Anutu vông ge.

Yesu nêl kiyang vông lu yuu lec wê obêc yib ge
(*Matyu 17:22-23; Mak 9:30-32*)

Xomxo yetac mabu ên môp wê Yesu vông ge, dêc Yesu nêl vô nue ngivihi ên nêbê, ⁴⁴“Xam vyac vô ninyam vô kiyang wê a ob nêl ga bê xomxo obêc vông Xomxo Nu la vac tibii vigê.” ⁴⁵Lêc nue ngivihi lungên kiyang tyo kehe, ên kehe yêp xôpacên om he vyac xovôên ma. Lêc he xona ên nêb ob kinêg kiyang tyo kehe vô Yesu lêm.

Letya ob tu levac?
(*Matyu 18:1-5; Mak 9:33-40*)

⁴⁶Yesu nue ngivihi ngaênma ên nêb letya ob tu he nê n levac? ⁴⁷Lêc Yesu xovô he nilô wê he nêl ge om la kô nipwo ti mi lam lax i le pikeb i, ⁴⁸di nêl vô he ên nêbê, “Xomxo ti obêc hôm nipwo bêga lec ên wê vông i vin a lêg ge od ge tiiy xocbê hôm a lec ge. Di xomxo ti obêc hôm a lec ge od ge tiiy xocbê hôm xomxo ti wê vông a lam ge lec hixôn. Ên xomxo wê dô nipwo vac xam mahigun ge, ge wê ob tu xam nê m levac.”

⁴⁹Mêd Jon nêl vô Yesu ên nêbê, “Xolac kehe, xe xê xomxo ti tii vimwo nipaên vêl ên xomxo lec ông lêm, om xe vibu i nêb i vôngên tibêge i ma,

ên o mi dô hixôn xe mi timu vô ông lêm.”⁵⁰ Lêc Yesu nêl vô i ên nêbê, “Xam o lêc vîbu i lêm. Ên xomxo wê o vông vevac vô xam lêm ge, ge xam nêl wê ob ngîdu xam xôn ge.”

Tibii Samelia o hôm Yesu lec lêm

⁵¹Buc vô kwabo lec wê Yesu ob lax mi la lag puunê ge, mêd Yesu nêb ob la Jelusalem, ⁵²om vông xomxo ya le mug la. Mêd he mîla vac tibii Samelia ben, ên he nêb he ob la yê vîgwe ti wê Yesu ob la dô vac ge, ⁵³lêc tibii viyang tige xovô nêbê Yesu ge xomxo Yuda ti wê nêb ob la Jelusalem ge, om he vîbu nêbê Yesu loc vacên he ben i ma. ⁵⁴Mêd nue ngivîhi Jems yuu Jon yê môp wê he vông ge om nêl vô Yesu ên nêbê, “Apumtau, ông nêb xii nêl di ngwax i lam gê kisii ganê ên ya tibii tigae i ma vêl, me?” ⁵⁵Mêlêc Yesu pilepac i di kunac yuu ên kiyang wê yuu nêl ge. ⁵⁶Pyap dêc he la vîgwe bangwe.

Xomxo wê nêb ob timu vô Yesu ge

(Matyu 8:19-22)

⁵⁷He mîla vô môp lê, lêc xomxo ti val nêl vô Yesu ên nêbê, “Vîgwe wê ông ob la vac ge, a ob loc hixôn ông.” ⁵⁸Lêc Yesu nêl vô i ên nêbê, “Le i lêc nêl decdec bê ông ob lam hixôn a lêm. Ên lilii mi yêp vac yen, di menac vông liwîhi lec xax mi yêp lec, lêc a, Xomxo Nu, a bog wê a ob xêp vac ge ti yêpên ma.”

⁵⁹Yesu nêl vô xomxo ngwe ên nêbê, “Lam hixôn a.” Lêc xomxo tige nêl ên nêbê, “Xomxo levac, a ob loc hixôn ông lê, lêc ông vông a lax dô di yev mag vêl lê.” ⁶⁰Lêc Yesu luu i vya di nêl ên nêbê, “Xomxo yibên i yev yibên, di ông loc nêl Anutu ben yuu môp kitong vô xomxo.”

⁶¹Xomxo ngwe nêl vô Yesu ên nêbê, “Xomxo levac, a ob loc hixôn ông lê, lêc ông vông a lax bog mi lax nêl kitong vô lige lê.” ⁶²Lêc Yesu nêl vô i ên nêbê, “Xomxo ti obêc nêb i obêc vông Anutu yuac ge od i o lêc yê manôn i loc nînya nînya lêm, ên ge od o tiyî wê ob tu Anutu nu mi vông i yuac ge lêm.”

Yesu vông xomxo kehe yon di vîgê yuu (70) la vac yuac

10 ¹Nang dêc Yesu vînoo xomxo kehe yon di vîgê yuu (70) hixôn mi vông he yuu yuu la vac vîgwe titi, ên nêb he i mug mi loc vac vîgwe vîhati wê Yesu obêc mîla vac ge. ²Mêd nêl vô he ên nêbê, “Yaên wê dô vac yuac ge vô nôn tibeac pyap lê, lêc xomxo ti wê ob kô nôn tyo gee yuutyabed, om xam kitaa vô yuac tyo kehe bê i vông xomxo i loc vông yuac ên kituc ixê nôn.

³“Om xam locê. Lêc xam xovô bê a ob vông xam loc xochê bwoc sipsip nue wê la vac noo vîmen mahîgun ge. ⁴Om xam o lêc kô mone yuu vîxêc di su hixôn lêm, di xam o lêc keac tôv vô xomxo ti vac môp lêm. ⁵Xam

obêc la vac xumac ti ge od xam nêl kiyang tax bêga bê, 'Kiyang malehe i lam lec xomxo wê dô vac xumac tiga.' ⁶Mêd xomxo kiyang malehe obêc dô vac xumac tige ge od kiyang malehe wê xam kitaa lec he ge ob yêp lec he. Lêc obêc ma ge od kiyang malehe obêc lôm vô xacxam va tii vac nang. ⁷Mêd xumac wê xam obêc dô vac ge, xam dô vac xumac tige tibe, di le i lêc dô tul tul vac xumac tibeac lêm. Nge, xam dô tige mi wa di num wê xomxo ob vông vô xam ge, ên xomxo wê ob vông yuac ge obêc kô nôn lec yuac wê he vông ge.

⁸"Om xam obêc la vac vigwe ti lêc xomxo hôm xam lec ge od xam wa yaên wê he vông vô xam ge, ⁹di xam vông he viyang tige wê yidac vông ge i vô nivaha lec, di xam nêl vô he bêga bê, 'Anutu nu kisiinê val pyap vô xam.'

¹⁰"Lêc xam obêc mila vac vigwe ti lêc xomxo o hôm xam lec lêm ge od xam lôc mi loc le vac môp, di nêl vô he bêga bê, ¹¹'Xam bom vijuva wê pitii lec xe vixam ge, xe ob liloo i lôc mi loc yêp vô xam. Mêlêc xam xovô bêga bê Anutu nu kisiinê val kwabo pyap.' Xam nêl bêge vô he. ¹²Om a ob nêl vô xam bê obêc buc timuên wê Anutu ob yaxên xomxo ge, od xomxo viyang tige obêc kô viyin levac luu viyin wê tibii Sodom ob kô ge vêl."

Viyin lec xomxo wê o vông i vin lêm ge
(*Matyu 11:20-24*)

¹³Yesu nêl ên nêbê, "Xam tibii Kolasin, xam xona nêl ên viyin wê xam obêc kô ge. Di xam tibii Betsaida, xam êno xona nêl. Ên do levac wê a vông vac xam bom ge, xomxo ti obêc vông bêge vac tibii Taia yuu Saidon ben ilage ge od tibii Taia yuu Saidon obêc pilepac he di lipac viwev lec he di dô hixôn nilô viyin ên wê he xovô nêl nipaên ge. ¹⁴Lêc xam o pilepac xam lêm, om buc timuên wê Anutu obêc yaxên xomxo ge, od xam obêc kô myaviwen nipaên i luu wê tibii Taia yuu Saidon ob kô ge vêl. ¹⁵Di xam tibii Kapaneam, xam xo ên xam nêl xam ob kô lêm levac mi la dô vac Anutu ben lag puunê? Ma vêl, xam ob la vac vigwe nipaên."

¹⁶Mêgem Yesu nêl vô nue ngivihî ên nêbê, "Xomxo ti obêc ngô xam vyam ge od tiyi xocbê ngô a vyag. Lêc xomxo obêc vô ninya kitu vô xam vyam ge od tiyi xocbê he vô ninya kitu vô a vyag, di xomxo wê vô ninya kitu vô a vyag ge tiyi xocbê he vô ninya kitu vô xomxo ti wê vông a lam ge vya hixôn."

Xomxo kehe yon di vigê yuu (70) vena vô Yesu

¹⁷Xomxo kehe yon di vigê yuu wê Yesu vông he la yuac gee vena hixôn xêyaa nivaha di nêl vô Yesu ên nêbê, "Apumtau, xe nêl ông lêm ge od vimwo nipaên vô ninya lehe vô mi la vac xe vyam kwa ngibi." ¹⁸Lêc Yesu nêl vô he ên nêbê, "A xê Seten tô gê kisii ganê mi lam xocbê deac hixelac

ge. ¹⁹Om xam ngô lê. A vông xêkizêc vô xam pyap, om xam tiyi wê xam obêc kê myel yuu kipyêc, di xam obêc pwoo xêkizêc wê Seten vông ge i pec, di susu ti o tiyi wê ob vông xam vô nipaên ge lêm. ²⁰Vixôhilôg, lêc xam o lêc pimil xam bê vimwo nipaên la vac xam kwa ngibi lêm. Nge, xam pimil Anutu ên wê kivuu xam lêm yêp lag puunê ge.”

Yesu pimil ma Anutu hixôn xêyaa nivaha
(*Matyu 11:25-27; Matyu 13:16-17*)

²¹Vô buc tige Myakilôhô Ngibua vông Yesu xêyaa vô nivaha di i kitaa vô ma Anutu bêga ên nêbê, “Mag Apumtau, ông lag yuu kibun kehe ông, om a hi vixag pec ên ông, ên ông o vông kiyang tige vô xomxo wê piyôp levac yuu xovôên nivaha ge lêm. Nge, ông hilung vô xomxo wê lê nipwo ge. Mag, ông vông ya xovôên wê ôcông va vông ge.”

²²Pyap dêc Yesu nêl ên nêbê, “Mag vông susu ge vihati vô a. Mêlêc xomxo ti o xovô nu a lêm. Nge, Mag vaci xovô. Di xomxo ti o xovô Mag lêm. Nge, nu aca va wê a xovô, di xomxo wê a nêb a ob hilung Mag vô he ge, he ob xovô Mag.”

²³Mêd Yesu pilepac i vô nue ngivihi di nêl vô heche va ên nêbê, “Xam xêmyaa i vô nivaha ên wê xam wê môp wê a vông ge. ²⁴Ên a ob nêl vô xam bê plopete yuu king wê dô ilage, he tibeac nêb ob yê i tiyi xocbê xam wê ge lê, lêc he yêên ma. Di he tibeac nêb ob ngô kiyang xocbê wê xam ngô ge lê, lêc he ngôên ma.”

Kiyang pilepacên lec tibii Samelia ti

²⁵Buc ti lêc xomxo wê xovô Moses xolac ge ti kidi lec di nêl kiyang vô Yesu ên nêb ob yaxên i, om nêl bêga ên nêbê, “Xolac kehe, a obêc vông bêna êdêc dô magviha luta lêc luta?” ²⁶Lêc Yesu nêl lax vô i ên nêbê, “Kiyang wê yêp vac Moses xolac ge, ông kitong lêc nêbê va?” ²⁷Mêgem xomxo tyo nêl ên nêbê, “Xolac nêl bêga ên nêbê, ‘Ông xêmyaa i vin lec ông Apumtau Anutu di ông vông nilôm yuu kinum di xêkizêc yuu piyôp i loc diluhu vô Anutu, di ông xêmyaa i vin lec xomxo baba i tiyi xocbê ông xêmyaa vin lec ôcông va ge.’” ²⁸Mêgem Yesu nêl ên nêbê, “Ông nêl ge nivaha pyap, om ông obêc vông bêge ge od ông obêc dô mamviha luta lêc luta.”

²⁹Lêc xomxo tige nêb ob viac i nivaha om kinêg vô Yesu ên nêbê, “Kiyang wê nêl ên nêbê il xêdyaa i vin lec xomxo baba ge, ge nêl lec xomxo nae?”

³⁰Om Yesu nêl kiyang pilepacên ti vô i bêga ên nêbê, “Xomxo ti kidi gê Jerusalem ên nêb ob la Jeliko, om la vô môp mi la, lêc tibii yôdac wê mi vun xomxo susu ge hi i vô nipaên di lêx i nên ngakwi sea di kô i susu vihati mi la, dêc xomxo tyo la yêp vac môp di vô kwabo lec wê ob yib ge. ³¹Lêc vô buc tige xomxo wê mi si daa vô Anutu ge ti mila vô môp tige

mi la yê lê, léc sea i yêp di luu vêl mi la. ³²Nang dèc xomxo Livai wê mi vông yuac vac Anutu xumac ngibua ge ti mila vô môt tige mi la yê lê, léc sea i yêp di luu vêl mi la.

³³“Mêd tibii Samelia ti mila vô môt tige om val yê xomxo tyo wê yêp ge, léc xo vîgwe pisiv ên i, ³⁴om la kwabo vô dèc vông malasin wel yuu wain vac xomxo tyo kityax wê tibii vevac hi ge, mi vîyum xôn, dèc tung i la lec i bwoc donki mêd kô mi

la vac xumac wê xomxo kisuu di yêp vac ge ti di viac i. ³⁵Vîgwe vidiiên mêd tibii Samelia tige vông mone kehe ti vô xomxo ti wê viac xumac tige di nêl vô i ên nêbê, ‘Ông viac xomxo tiga nivîha ya mone wê a vông ga, dèc ông obêc vông luu vêl ge od a obêc vena vông vac ông xe wê ông viac xomxo tiga ya ge.’”

³⁶Yesu nêl bêge dèc kinêg vô xomxo xolac kehe tige ên nêbê, “Om ông xo ên ông nêb xomxo yon ge, tina xêyaa vin lec xomxo ti wê tibii yôdac hi ge?” ³⁷Lêc xomxo tyo nêl lax ên nêbê, “Xomxo ti wê xo vîgwe pisiv ên i ge.” Om Yesu nêl vô i ên nêbê, “Om ông lôc, di loc vông môt i tiyi bêge.”

Mata yuu li Malia

³⁸Mêd Yesu he nue ngivîhi la léc mila vac vîgwe ti wê vêx ti dô vac lê nêbê Mata. Om Mata kô Yesu mi la vac i ben. ³⁹Lêc Mata li vêx ngwe dô lê nêbê Malia, om Malia la dô hixôn Apumtau Yesu mi ngô i kiyang. ⁴⁰Lêc Mata vông yuac levaclec yebac mi vô vîlee vîlee mi vông nilô vô vîyin om la nêl vô Yesu ên nêbê, “Apumtau, nii Malia sea a mi vông aca tibed vông yuac lec yaên ga. Lêcom mêd ông wê ge nivîha? Ông nêl ên i lam vông yuac hixôn a.” ⁴¹Lêc Apumtau nêl vô i ên nêbê, “Mata, Mata, ông vông nilôm la vô susu vîyang vîyang ge om vông ông nilôm vô vîyin lec. ⁴²Mêlêc môt tibed wê ông sea ge. Ge môt nivîha wê Malia vông ge, om il obêc vô vêl ên i nang lêm.”

Yesu nêl môt kitaaên kitong vô nue ngivîhi

(*Matyu 6:9-15; Matyu 7:7-11*)

11 ¹Buc ti Yesu la kitaa vac vîgwe ti, pyap dèc nue ngivîhi ti nêl vô i ên nêbê, “Apumtau, xe nêb ông nêl môt kitaaên kitong vô xe i tiyi xochê Jon Lipacên nêl vô nue ge.” ²Mêgem Yesu nêl vô he ên nêbê, “Xam obêc kitaa ge od xam kitaa bêga bê,
 ‘Mag, ông lêm i lam tu ngibua. Ông lam tu Apumtau i tiyi vîgwe vîhati. ³Ông vông yaên vô xe i tiyi buc vîhati. ⁴Xe nêm myaviwen wê yêp vô xe ge ông kitya vêl, xochê xe kitya nêm nipaên vêl vômâ ge. Ông o léc didii xe mi loc vac kiyang wê ob yaxên xe ge lêm.’”
⁵Mêd Yesu nêl vô he ên nêbê, “Xam ti obêc la vô ngidêm ti vô vivuaên mahigun di nêl vô i ên nêbê, ‘Ngidêg, a val ga vô ông ên a nêbê ông

vông blet yon vô a, ⁶ên a ngidêg ngwe val vô vigwe bucên tya ga vô a, lêcom yaên wê a ob vông vô i ge ma.' ⁷Lêc ngidêm dô vac xumac nilô di nêl bêga vô ông ên nêbê, 'Ga vivuaên mahigun di a tung xumac lec pyap di xe nuge xêp ga mê, om o tiyi wê a ob kidi lec mi vông yaên ti vô ông ge lêm. Mêgem ông lôcê.' ⁸Om a ob nêl vô xam bê ngidêm obêc kidi lec mi lam vông yaên vô ông ge od ob vông vô ông ên wê i ngidê ông ge lêm. Nge, obêc vông vô ông ên wê ông kitaa i nginong ge. ⁹Om a ob nêl vô xam bê xam kitaa susu ya vô Anutu ên Anutu i vông vô xam, di xam myag susu êdêc wêvô, di xam kituu vuayen ên Anutu i tax vuayen ên xam. ¹⁰Ên xomxo vihati wê kitaa vô Anutu ge obêc kô nôn tiyi wê he kitaa ge, di xomxo vihati wê myag susu ge obêc yêvô, di xomxo vihati wê kituu vuayen ge od Anutu obêc tax vuayen ên he.

¹¹"Xame, xam nume ti obêc kitaa xam nêb ob ya pis ge od xam obêc vông myel vô, me? ¹²Me nume ti obêc kitaa xam ên nêb xam vông kokilêx nulen vô i ge od xam obêc vông kipyêc vô, me? Maê. ¹³Xam ga xomxo kibun nimpâên, lêc xam mi vông susu nivihaviha vô nume, om xam xovô bêga bê il Mag Anutu lag puunê nêb ob vông susu nivihaviha luu vêl vô il om ob vông Myakilôhô Ngibua vô xomxo wê kitaa i ge."

Xomxo nêl ên nêbê Yesu vông yuac ya xêkizêc wê Seten vông ge
(*Matyu 12:22-30; Mak 3:20-27*)

¹⁴Yesu tii vimwo nipaên ti vêl ên xomxo ti. Vimwo tyo vông xomxo tige dô yac di keacên ma, om buc wê Yesu tii vimwo tyo la vêl ge od xomxo tyo keac, di xomxo wê yê gee yetac mabu. ¹⁵Lêc xomxo ya nêl ên nêbê, "Bielsebul wê tu vimwo nipaên nêl levac ge vông xêkizêc vô Yesu, om Yesu tii vimwo nipaên vêl ya xêkizêc wê Bielsebul vông ge." ¹⁶Di xomxo ya nêb ob yaxên Yesu, om nêl vô i ên nêbê, "Xe nêb ông vông do levac ti mi xe xê ên i nêl kitong bê ông kô xêkizêc vô Anutu lag puunê." ¹⁷Lêc Yesu xovô kiyang wê yêp vac he nilô ge om nêl vô he ên nêbê, "Xomxo viyang ti obêc hibuma sea mi hima ge od ob dô nivihava nang lêm. Me xomxo xumac ti obêc hibuma sea mi hima ge od obêc vông he vô nipaên. ¹⁸Bêge mêgem Seten he lie obêc hibuma sea mi hima ge od xêkizêc wê he vông ge ob yêp nivihava tibêna? Ge he ob dô nipaên. A nêl bêge ên wê xam nêl ên xam nêbê a tii vimwo nipaên la vêl ên xomxo ya xêkizêc wê Bielsebul vông ge. ¹⁹Lêc a ob kinêg vô xam bê a obêc tii vimwo nipaên vêl ya xêkizêc wê Bielsebul vông ge od letya wê vông xêkizêc vô lime lêc he tii vimwo nipaên vêl ya ge? Ge lime vaci ob yaxên kiyang wê xam nêl ge lê. ²⁰Lêc Anutu vaci obêc vông xêkizêc vô a di a tii vimwo nipaên la vêl ge od xam xovô bêga bê Anutu lam tu levac vac xam mahigun pyap.

²¹"Xomxo xêkizêc ti obêc hêm susu vevac vac vigê di dô bin i xumac ge od susu wê i vông ge ob dô nivihava. ²²Lêc xomxo ngwe wê xêkizêc luu vêl ge obêc val vông vevac vô i di nginoo vêl ge od ob vô susu vevac wê

xomxo tige xo nêb ob ngidu i xôn ge vêl, dèc kô susu wê xomxo tige vông ge vihati mi la titang vaxvax vô lie ya.

²³“Om a ob nêl bêga bê xomxo ti obêc dô hixôn a mi ngidu a xôn lêm ge od ge tiyi xocbê vông vevac vô a. Di xomxo wê o vilu vô xomxo hixôn a lêm ge od ge tiyi xocbê tii he moo sea ge.

Vimwo nipaên vena i tii vac nang

(Matyu 12:43-45)

²⁴“Vimwo nipaên ti obêc lam la vêl ên xomxo ti ge od ob la vilee vac vigwe myadongên mi la myag vigwe ti wê ob la dô seac vêl vac ge. Lêc yêvôên vigwe ti obêc ma ge od ob nêl bêga bê, ‘A ob lax mi la dô vac bog wê a sea di lam ge i tii vac nang.’ ²⁵Om vimwo tige obêc lax mi la vô xomxo ti wê i dô vac ilage mi lax yê wê pityep mi viac nivaha ge, ²⁶od obêc la kô vimwo nipaên wê nêl nipaên luu i vêl ge vigê vilu di sec yuu, lêc he xôn lax dô vac xomxo tige, di vông i vô nipaên levac luu viwen tax ge vêl.”

Môp wê xomxo ob dô hixôn xêyaa nivaha ge

²⁷Yesu nêl kiyang tige vô xomxo tibeac, lêc vêx ti tyuc vya levac vac he mahigun ên nêbê, “Ông tam ti wê kô ông mi vông lul vô ông ge, i dô hixôn xêyaa nivaha.” ²⁸Lêc Yesu nêl ên nêbê, “Bêge mêlêc a nêl bê xomxo wê ngô Anutu kiyang mi viac ge wê ob dô hixôn xêyaa nivaha.”

Xomxo nêb he ob yê do levac

(Matyu 12:38-42; Mak 8:12)

²⁹Xomxo tibeac lam kitucma mi dô, mêgem Yesu nêl vô he ên nêbê, “Xomxo gwêbaga, xomxo nipaên nôn. He nêb he ob yê do levac lê, lêc a ob nêl bê he ob yê do tibeac lêm. Nge, do tibed wê he ob yê ge, tiyi xocbê wê Jona vông ilage. ³⁰Ên môp wê Jona la dô vac lilii gwec nilô tiyi buc yon ge, ge Anutu hilung vô tibii Niniva tiyi xocbê do levac ge. Bêge mêgem a, Xomxo Nu, a obêc tu do levac bêge vô xomxo gwêbaga êno.

³¹“Om obêc buc timuên wê Anutu obêc titô xomxo ge, od vêx levac wê tu tibii Siba nêl kwin vac buc ilage ge obêc kidi lec hixôn xam wê xam dô gwêbaga di nêl xam nêl nipaên kitong. Ên vêx tige kidi vac kibun myahipu di lam ên nêb ob lam ngô kiyang wê King Solomon nêl hixôn piyôp nivaha ge. Di gwêbaga a wê a luu Solomon vêl ge a lam dô hixôn xam lê, lêc xam o ngô a vyag lêm. ³²Om obêc buc timuên wê Anutu obêc titô xomxo ge, od tibii Niniva êno obêc kidi lec hixôn xam wê xam dô gwêbaga di nêl xam nêl nipaên, ên ilage tibii Niniva ngô kiyang wê Jona nêl vô he ge di pilepac he, di gwêbaga a wê a luu Jona vêl ge a lam dô hixôn xam, lêc xam o pilepac xam lêm.

Kiyang pilepacên lec lam
(*Matyu 5:15; Matyu 6:22-23*)

³³“Xomxo ti obêc byêx ngwax vac lam ge od ob vun vac pêt ngibi me lax dêg lec xôn lêm. Nge, ob lax i le lec tevol kisii ên xomxo wê ob lam vac xumac nilô ge i lam yê xêseac. ³⁴Xam mamnôn tiyi xocbê lam wê linac lec nimnivi ge, om mamnôn obêc dô nivihha ge od obêc vông nimnivi vihati dô vac xêseac, lêc xam obêc vông mamnôn vô nipaên ge od nimnivi vihati obêc mapitoc. ³⁵Om xam viac xam êdêc xêseac wê dô vac xam ge i o lêc vô mapitoc lêm. ³⁶Ên nimnivi vihati obêc dô vac xêseac di mapitoc ma ge od nimnivi obêc xêseac nivihha xocbê lam xêseac linac lec ông ge.”

Môp nipaên wê he Palisi hixôn xomxo wê xovô Moses xolac gee vông ge
(*Matyu 23:1-36; Mak 12:38-40; Luk 20:45-47*)

³⁷Yesu nêl kiyang tige pyap dêc Palisi ti val nêl vô Yesu nêb i loc ya hixôn i, om Yesu la vac Palisi tyo ben mi la dô hixôn i mi ya. ³⁸Lêc Palisi tyo yê wê Yesu diya ge lê, lêc o lipac vigê tax tiyi xocbê môp wê he Palisi mi vông ge lêm, om yetac mabu. ³⁹Lêc Yesu nêl vô i ên nêbê, “Xam Palisi ge, xam mi lipac nimnivi pileva tiyi xocbê xam lipac kap yuu pile nimi ge, dom xam nilôm ge, môp yôdac yuu nipaên pup lec. ⁴⁰Xam tibii piyôp maên. Anutu ti wê tung il nidnivi ge o tung il nilôd hixôn lêmê? ⁴¹Om a ob nêl vô xam bê xam vông susu wê dô vac pile yuu kap nilô ge vô xomxo wê nêl susu maên ge ên i loc ngidu he xôn. Xam obêc vông bêge ge od xam nêl môp vihati obêc vô paha lec.

⁴²“Om xam Palisi ge, xam xona nêl ên viyin wê ob val vô xam ge. Ên xam nêb xam ob timu vô Moses xolac vihati, om xam obêc tulec susu xocbê lehac yuu ngec nipwopwo ge od xam mi tung kidu vigê yuu lêc mi vông kidu ti la tu daa vô Anutu. Xam mi vông bêge lê, lêc xam sea môp bôbac yuu môp xêyaa vin lecên Anutu. Om a ob nêl bê xam o lêc vông môp ngwe vô nivihha di sea ngwe lêm. Nge, xam vông yuu xôn i vô nivihha.

⁴³“Xam Palisi, xam xona nêl ên viyin wê obêc tulec xam ge. Ên buc wê xam la vac xumac lilo ge, od xam yong xam ên xam nêb xam ob dô lec sia nivihha vô xomxo manôn, di buc wê xam la vilee lec wetôv ge od xam nêb xomxo vihati i pimil xam ya vya nivihha.

⁴⁴“Mêgem xam xona nêl ên viyin wê obêc tulec xam ge. Ên xam nilôm tiyi xocbê lôva wê le vac kibun nilô mi xomxo len yêp vac ge, mêlêc xomxo tibeac lungên di xoc vô kisii mi la om vông he vô nipaên.”

⁴⁵Mêgem xomxo wê xovô Moses xolac ge ti nêl vô Yesu ên nêbê, “Xolac kehe, kiyang wê ông nêl ge, ge ông nêl nipaên lec xe hixôn.” ⁴⁶Lêcom Yesu nêl vô he ên nêbê, “Xam wê xam xovô Moses xolac ge, xam xona nêl ên viyin wê obêc tulec xam ge. Ên xam nêl kiyang tibeac vô xomxo

ên xam nêb he i timu vô, om xam lii viyin levac lec he, lêc xam vigêm o kilê viyin tige hixôn he lu ya lêm.

47“Om xam xona nêb ên viyin wê obêc tulec xam ge. Ên mame bume tivame, he hi plopete yib, lêc gwêbaga xam divunac vô lôva wê plopete yêp vac ge. 48Om môp tibêge nêl xam kitong ên nêbê xam xêmyaa vô nivîha ên môp wê bume vông ilage, ên bume hi plopete yib, lêc gwêbaga xam vunac vô lôva wê plopete yêp vac ge.

49“Mêgem Anutu wê xovôen kehe ge nêl bêga ên nêbê, ‘A ob vông plopete yuu sinale i loc vô he lê, lêc he obêc vông viyin vô he dêc hi he ya yib.’ 50Om xomxo wê dô gwêbaga, he ob kô myaviwen nipaên lec wê he hi plopete yib ge. Ge nêl lec plopete vihati yang, he wê dô vô buc taxlee ilage wê Anutu tung lag yuu kibun ge di i val tyip lec buc gwêbaga hixôn. 51Kiyang tige lec Ebel wê taxlee ge di i val tyip lec plopete Sekalaia ti wê bume hi i yib vac xumac ngîbua yuu alta mahîgun ge. Vixôhilôg, a ob nêl hixôn nôn vô xam bê xomxo gwêbaga ob kô myaviwen nipaên lec môp gee vihati.

52“Om xam wê xam xovô Moses xolac ge, xam xona nêb ên viyin wê xam ob kô ge. Ên môp wê xomxo ob ngô xolac kehe ge, xam le vac xôn, ên xacxam va lungên xolac kehe om xam le vac môp xôn ên xomxo wê nêb ob ngô mi xovô ge.”

53Yesu nêl pyap dêc sea Palisi tyo ben di loc mi la, dêc he wê xovô Moses xolac gee hixôn he Palisi yê Yesu nipaên om he le kinêg kiyang viyang viyang vô i 54ên nêb ob yaxên bêc obêc nêl kiyang ti so ge od ob vông i loc vac kot.

Xona nêb ên kiyang kityooên (*Matyu 10:26-27*)

12 1Vô buc tige xomxo tibeac hiwocên la kitucma vô Yesu, om he la pup lec vigwe xocbê ob dô lecma vîxa hixôn, dêc Yesu nêl vô nue ngivîhi tax ên nêbê, “Xam viac xam ên môp nipaên wê Palisi mi vông ge, ên he mi viyum kiyang nipaên vac kiyang nivîha, om môp tige tiyi xocbê yis wê ob vông blet vuac mi vô levac ge. 2Ên kiyang vihati wê yêp xôpacên ge obêc lam le seac, di kiyang vihati wê yêp vac xomxo nilô ge obêc hivêlac lec di xomxo vihati xovô. 3Om kiyang vihati wê xam nêl vô bucên ge od xomxo obêc ngô vô vidiiên, di kiyang vihati wê xam kimuna voma vac xumac lôma ge od obêc nêl i vô levac lec wetôv.

Xomxo i xona ên Anutu tîbed (*Matyu 10:28-31*)

4“Xam lige, a ob nêl vô xam bê xam o lêc xona ên xomxo wê ob hi xam nimnivi yib ge lêm, ên he o tiyi wê obêc vông viyin yaya vô xam hixôn timuên ge lêm. 5Lêc a ob nêl xomxo ti wê xam ob xona ên ge kitong vô

xam bê Anutu tived wê obêc hi xomxo yib, dèc obêc timuên ge xêkizêc wê i vông ob nêx xomxo la vac vigwe nipaên. Om a nêl vô xam bê xam xona ên i tived.

⁶“Xam xovô ên xam nêbê xomxo ti obêc kisuu menac nipwo vigê vilu ge od obêc kisuu ya mone nipwo tiyi xocbê mone hi yuubed ge. Bêge mêlêc Anutu o lungên menac nipwopwo gee lêm. Nge, xovô gee vihati. ⁷Di Anutu o lungên xam êno lêm. Nge, kitong xam bamzub lihi vihati pyap. Om xam xonaên i ma, ên Anutu xêyaa vin lec xam ngînoo menac vihati vêl.

II ob nêl Yesu kitong vô xomxo
(*Matyu 10:19-20,32-33; Matyu 12:32*)

⁸“A ob nêl vô xam bê xomxo ti obêc nêl a kitong vô xomxo ge od a, Xomxo Nu, a ob nêl i kitong vô Anutu nue angela. ⁹Lêc xomxo ti obêc yax a vun vô xomxo manôn ge od a obêc yax i vun vô Anutu nue angela manôn êno bêge.

¹⁰“Xomxo ti obêc so vya vô a, Xomxo Nu ge od tiyi wê Anutu obêc kitya nipaên tige vêl ge. Lêc xomxo ti obêc so vya vô Myakilôhông Ngibua ge od o tiyi wê Anutu ob kitya i nêl nipaên tige vêl ge lêm.

¹¹“Mêd buc wê xomxo obêc kô xam mi la vô xomxo levac vac xumac lilo me gavman ti me xomxo levac ti ge od xam o lêc xona di xo bêga bê ‘Xe ob luu he vya ya kiyang tina, di xe ob nêl kiyang bêna vô he?’ Le i lêc xo kiyang tibêge lêm. ¹²Ên obêc hiyôv manôn myabo tya ge od Myakilôhông Ngibua ob hilung kiyang wê xam ob nêl ge vô xam.”

Kiyang pilepacên lec xomxo wê mone tibeac ge ti

¹³Xomxo ti vac xomxo tibeac mahigun nêl vô Yesu ên nêbê, “Xolac kehe, ông nêl vô a lig ngwe ge bê i vông susu wê mag vigê ge viwen vô a.”

¹⁴Lêc Yesu nêl vô i ên nêbê, “Letya vinoo a nêb a titô xam nêl kiyang mi vông byed vô xam susu? Ge yêp vô xacxam va.” ¹⁵Mêgem Yesu nêl vô he vihati ên nêbê, “Xam xona nêl ên mamdoên vô susu viyang viyang ge, ên susu tibeac wê xomxo vông ge o tiyi wê ob vông he dô maviha ge lêm.”

¹⁶Mêgem Yesu nêl kiyang pilepacên ti vô he bêga ên nêbê, “Xomxo wê susu levac ge ti dô, lêc yuac wê i vông ge vô nôn tibeac, ¹⁷om xo bêga ên nêbê, ‘A ob vông bêna? Ên xumac wê a ob kituc susu vihati nôn vac ge tiyiên ma.’ ¹⁸Om nêl bêga ên nêbê, ‘A ob vông môp bêga bê a ob dii xumac wê a kituc susu nôn vac ge mi lox xumac levac levac pileva ên kituc yaên nôn yuu susu vihati wê a vông ge i loc dô vac. ¹⁹Pyap dèc a ob xo bêga bê a kituc susu tibeac di obêc dô tiyi klismas tibeac om a ob dô seac vêl mi xa di num hixôn xêgyaa nivîha.’ ²⁰Mêlêc Anutu nêl vô i ên nêbê, ‘Ông xomxo piyôp maên. Bucên hig ge ông obêc wib, om susu tibeac wê ông kituc ge obêc tu letya xe?’ ”

²¹Mêgem Yesu nêl ên nêbê, “Kiyang tige tiyi xocbê xomxo ti kituc susu tibeac tu ici va xe léc o xovô Anutu lêm om Anutu yê i tiyi xocbê xomxo pileva ti.”

Il ob vông il nilôm i vô viyin lêm
(*Matyu 6:25-34*)

²²Yesu nêl vô nue ngivihî ên nêbê, “Bêge mêgem a ob nêl vô xam bê xam o léc vông nilôm i vô viyin lec yaên wê xam ob wa ge yuu ngakwi wê xam ob vinyum ge lêm, ²³ên môt wê il ob dô madviha ya ge luu susu yaên vêl, di il nidnivi luu ngakwi vêl.

²⁴“Om xam xovô menac lê. Ên menac o xin vê vac yuac lêm, di he o kô yaên nôn vac yuac lêm, di he nên xumac wê ob kituc yaên vac ge ti o le lêm. Mêlêc Anutu vet he tiyi buc vihati. Di Anutu xêyaa vin lec xomxo nginoo menac gee vêl om ob viac xam nivîha. ²⁵Xame, xam ti obêc xo kiyang tibeac nêb xam ob dô mamviha ge od tiyi wê xam ob tul lec buc wê ob dô maviha ge i loc dia, me? ²⁶Ma vêl, xam o tiyi wê xam ob vông bêge ge lêm. Om bêna léc xam xo kiyang tibeac lec susu ninivi xen?”

²⁷“Di xam xovô nita wê vuac maviya ge. Maviya o duu nivimihî lêm, di he o vông yuac ti lec ngakwi lêm, léc a ob nêl vô xam bê vunac vunac wê he vông ge luu vunac vunac nivîha wê King Solomon vông ge vêl. ²⁸Nita wê vuac maviya mi le vac yuac gwêba di obêc titige pisaên vêl ge od ob nêx i la vac ngwax, léc Anutu vunac vô he nivîha. Mêgem xam xovô bêga bê Anutu ob viac xam nivîha luu nita maviya vêl. Léc vông vinên wê xam vông ge o xêkizêc lêm. ²⁹Om xam o léc vông nilôm i loc vô susu yaên yuu numên lêm, me xam o léc vông nilôm i vô viyin lec lêm. ³⁰Ên tibii madiluhu ge wê vông nilô la vô susu ninivi xen ge, dom Mag Anutu xovô susu wê ma vô xam ge. ³¹Mêgem xam vông nilôm i loc vô Anutu xolac yuu ben tived lê, ge od Anutu obêc vông susu bêge vô xam hixôn.

Kiyang lec susu nivîha lag puunê
(*Matyu 6:19-21*)

³²“Xam kidu nipwo tya ga, xam xona ên i ma. Ên Mag Anutu xovô pyap nêb xam ob tu xomxo levac hixôn i vac i ben lag puunê. ³³Om xam vông susu wê xam vông ge mi tibii i kisuu, dêc xam vông mone vô tibii wê nên susu maên ge ên i vô nivîha vô he. Dêc xam kituc susu nivîhaviha i loc yêp lag puunê i tiyi xocbê mone yêp vac kilong nivîha ge. Ên susu wê yêp lag puunê ge, tibii yôdac ti obêc vun lêm, di gwaakivac yuu susu nipipaa ti obêc vông i vô nipaên lêm. ³⁴Ên vigwe wê susu nivîhaviha wê xam vông ge la dô vac ge, xam ob vông nilôm la vô vigwe tige.

Nue yuac i le maviha

³⁵“Xam viac xam dêc xam vêx let lec di byêx ngwax vac lam, ³⁶di xam dô i tiyi xocbê tibii yuac wê dô bin xomxo levac wê ob vena vac vizid ge,

ên xomxo tyo obêc vena hi vigê lec vuayen ge od he i tax xumac lutibed. ³⁷Om xomxo levac tyo obêc vena yê wê nue yuac dô maviha di yêpên ma ge od ob hi vixa pec ên he. A ob nêl hixôn nôn vô xam bê xomxo levac tyo obêc vên nivimihi tiyi wê nue yuac mi vinyum ge di vông he dô kidu ti dêc ici va obêc titang yaên vô he. ³⁸Di xomxo levac tyo obêc vena vô vivuaên mahigun me obêc vô kwabo lec wê kokilêx ob vô vya ge, lêc nue yuac obêc dô di yêpên ma ge od ob hi vixa ên he.

³⁹“Xam xovô lê. Xomxo ti wê i xumac ge obêc xovô buc wê tibii yôdac ob val lec ge od ob dô maviha mi bin i xumac êdêc tibii i o lêc loc vac i ben nilô mi vun i susu lêm. ⁴⁰Om xam êno viac xam mi dô bin buc wê a Xomxo Nu obêc vena lec ge, ên buc wê xam obêc xovô lêm ge wê a obêc vena lec ge.”

Kiyang pilepacên lec nue yuac nivihâ yuu nipaên
(*Matyu 24:45-51*)

⁴¹Pita kinêg vô Yesu ên nêbê, “Apumtau, ông nêl kiyang pilepacên ga vô xecxe va, me ông nêl vô xomxo vihâti?” ⁴²Lêc Yesu nêl ên nêbê, “Xomxo yuac letya wê viac yuac hixôn piyôp nivihâ ge? Xomxo levac obêc vînoo i ên nêb i viac lie yuac vihâti di vông yaên vô he i tiyi buc vihâti. ⁴³Om xomxo levac tyo obêc vena yê wê nu yuac tige viac yuac wê i vông ge nivihâ ge od ob hi vixa ên i. ⁴⁴A ob nêl hixôn nôn vô xam bê xomxo levac tige obêc vông nu yuac tyo tu levac mi viac susu wê i vông ge vihâti. ⁴⁵Lêc nu yuac tige obêc xo bêga vac nilô bê, ‘Tibii levac la dô ilatikwê di o vena lutibed lêm’, om loc hi lie yuac vên yuu vux, di ya di num levac di mav ge ⁴⁶od xomxo levac obêc vena lec buc wê nu yuac tige lungên di o dô bin i lec ge lêm, om xomxo levac obêc vông myaviwen vô i di vông i la dô hixôn tibii wê o vông i vin lêm ge.

⁴⁷“Tibii yuac ti obêc xovô môt wê i tibii levac vông vô i ge lêc o viac mi vông i vô nôn lec lêm ge od levac tyo obêc pisa i vô nipaên. ⁴⁸Lêc tibii yuac ti obêc lungên môt wê i tibii levac nêb i vông ge, dêc vông ti so tiyi wê ob kô myaviwen nipaên lec ge od tibii tyo obêc vông myaviwen nipwo tya vô di hiên i luu vêlên ob ma. Ên xomxo wê kô susu tibeac vô Anutu ge, ge wê Anutu nêb i vông myaviwen tibeac vac. Di xomxo obêc vông susu tibeac vô xomxo ti ên nêb i vông yuac ya ge od he obêc nêl nêbê, ‘Ông vông susu vô xe i luu vêl vac.’”

Yesu yuac obêc hibû xomxo la yuu
(*Matyu 10:34-36*)

⁴⁹Yesu nêl bêga ên nêbê, “A lam ên a nêb a ob lii ngwax i yêp kibun ga, om a nilôg xo ên a nêbê i tum lutibed. ⁵⁰Mêlêc viyin ti vô kwabo lec wê a ob kilê ge, lêc gên o val lêm, om a ob dô hixôn nilôg viyin levac di i miloc vô buc wê viyin tyo obêc lam la vêl ge lê. ⁵¹Xam xo ên xam nêb

a lam ên a nêb a ob vông kiyang malehe i yêp gê kibun ga, me? Ma vêl, a lam ên a nêb xomxo i hibû he sea lec a. ⁵²Om gwêbaga di obêc buc timuên hixôn ge od obêc môm bêga bê xomxo vigê vilu vac xumac ti obêc hibuma sea lec a lêg, lêc yuu dô kidu ngwe di yon dô kidu ngwe. ⁵³Om he obêc hibuma, di ma yuu nu vux ob yêma nipaên, di ta yuu nu vêx ob yêma nipaên, di vêxta yuu yen vêx ob yêma nipaên.”

Môm wê il ob xovô susu wê ob val timuên ge
(*Matyu 16:2-3*)

⁵⁴Pyap dêc Yesu nêl vô xomxo gee vihati ên nêbê, “Xam obêc wê mapitoc ti le vac viyobtoc ge od xam mi nêl ên xam nêbê lun ob val, dêc vixôhilôg, lun val tiyi xocbê xam nêl ge. ⁵⁵Di buc wê lea ob val ge od xam nêl ên xam nêbê hiyôv ob linac nivihâ, dêc vixôhilôg, hiyôv linac i tiyi wê xam nêl ge. ⁵⁶Lêcom xam tibii kityooên, ên xam wê susu wê dô vac lag ge lê, lêc xovô nivihâ, di bêna lêc xam dilungên môm wê Anutu vông gwêbaga vô xam mamnôn ge?”

Il ob titô nêd kiyang
(*Matyu 5:25-26*)

⁵⁷Yesu nêl ên nêbê, “Bêna lêc xam o vyac xovô môm nivihâ mô lê? ⁵⁸Xomxo ti obêc kô ông mi muu la kiyang ge od muu hi kiyang i yib lutibed vac môm wê muu gên loc ge, êdêc i o lêc vông ông loc le vô hizap manôn dêc hizap i vông ông loc vô xêhipu mi xêhipu i vông ông loc kalabuhu lêm. ⁵⁹A ob nêl vô ông bê ông ob la dô vac kalabuhu di hi myaviwen vihati i ma vêl lê.”

Xomxo wê o pilepac he lêm ge obêc yib

13 ¹Vô buc tige xomxo ya val vô Yesu mi val nêl xomxo Galili kitong vô i. Ge nêl lec he Galili ti wê he dihi bwoc sipsip ên he nêb ob si i tu daa vô Anutu lê, lêc gavman levac Pailat vông nue lam hi he di kipyax he hi sea hixôn bwoc hi. ²Mêgem Yesu nêl vô he ên nêbê, “Xam xo ên xam nêbê Galili tige, he vông nipaên luu lie Galili vêl om he yib lec he nêb nipaên. ³Lêcom a ob nêl vô xam bê he o yib lec ngwe bêge lêm. Lêcom xam xovô bê xam obêc pilepac xam lêm ge od xam obêc wib bêge êno. ⁴Di xomxo Jerusalem vigê yuu di vixa vilu di sec yon (18) wê xumac vixa dia kipê mi hi he yib gê Siloam ge, xam xo ên xam nêbê he vông nipaên luu lie Jerusalem baba vêl om he yib lec he nêb nipaên. ⁵Lêcom a ob nêl vô xam bê he o yib lec kehe bêge lêm. Lêcom xam xovô bê xam obêc pilepac xam lêm ge od xam obêc wib bêge êno mê.”

Kiyang pilepacên lec xax ti wê nôb ma ge

⁶Yesu nêl kiyang pilepacên ti vô he ên nêbê, “Xax kwacsung ti le vac xomxo ti yuac om xomxo tyo la yê ên nêb ob la yul nôb, lêc nôb ma,

7om nêl vô xomxo ti wê mi viac i yuac ge ên nêbê, ‘Ngô lê. A lam ga tiyi kliskas yon ên a nêb a ob yul kwacsung tiga nôn lê, lêc nôn ti o yux lec lêm. Om ông vuv vêl ên i o vô kibun hizi vêl vaxvax lêm.’⁸ Lêc xomxo viacên tige nêl vô i ên nêbê, ‘Vông i le kliskas ngwe ga hixôn di a den kibun yuu kô bwoc yaa mi tung vac kehe mi xê lê.’⁹ Di kliskas ngwe timuên u ob xê lê, lêc vuac ge od i le, lêc vuacên ma ge od ông nêl di a vuv vêl.’ ”

Yesu vông vêx ti vô nivaha lec vô buc sabat

¹⁰ Vô buc sabat ti Yesu nêl xolac vô xomxo vac xumac lilo ti. ¹¹ Lêc vêx ti dô hixôn he, di vimwo nipaên dô vac i nilô di vông yidac vô i tiyi kliskas vigê yuu di vixa vilu di sec yon (18). Om vêx tyo nimi kizêc len gec om o tiyi wê ob le bôbac ge lêm. ¹² Lêc Yesu yê vêx tyo om keac i lam di nêl vô i ên nêbê, “Vêx, a vông ông yidac la vêl.” ¹³ Mêgem vyax vigê lec i di lutibed vêx tyo le bôbac di pimil Anutu.

¹⁴ Lêc xomxo levac ti wê viac xumac lilo ge ni nyag vô Yesu ên wê vông vêx tige vô nivaha lec vô buc sabat ge, om nêl vô xomxo tibeac gee ên nêbê, “Buc vigê vilu di sec ti yêp wê il ob vông yuac lec ge om xam ti obêc vông yidac ge od xam lam lec buc yuac ên xomxo i vông xam vô nimvaha lec, di xam o lêc lam lec buc sabat lêm.” ¹⁵ Lêc Apumtau Yesu luu i vya ên nêbê, “Xam tibii kityooên, ên xam mi la vac bwoc ben di la piwelac xam kau yuu donki lec buc sabat di didii he mi la vô mia ên xam nêb he i num. ¹⁶ Lêc vêx tiga Eblaham bue ti, lêc Seten ku i xôn tiyi kliskas vigê yuu di vixa vilu di sec yon (18), om a piwelac viyin tige vêl ên i lec buc sabat. Lêc mêd xam wê ên xam nêb môt tibêge o nivaha lêm?” ¹⁷ Yesu nêl bêge om xomxo wê yê i nipaên ge ni yoc ên he, di xomxo vihati gee he xêyaa vô nivaha ên do levac vihati wê Yesu vông ge.

Kiyang pilepacên lec vixô yuu yis (Matyu 13:31-33; Mak 4:30-32)

¹⁸ Yesu nêl ên nêbê, “Anutu ben kehe ge tiyi vatya? A ob tixuu lec kiyang ti. ¹⁹ Ge tiyi xocbê vixô nôn nulen wê nipwo lee tya, lêc xomxo ti kô mi la nêx vac yuac mêd nôn tyo tyip mi vô levac di menac viyang viyang lam vông liwihi lec ngen mi dô lec.”

²⁰ Nang dêc Yesu nêl ên nêbê, “Anutu ben kehe ge, a ob tixuu lec va? ²¹ Ge tiyi xocbê yis nipwo tya wê vêx ti pilepac hixôn plaua levac om vông plaua vuac mi vô levac ge.”

Kiyang lec môt wê xomxo ob la vac Anutu ben ge (Matyu 7:13-14, 21-23)

²² Yesu la ên nêb ob la Jerusalem, lêc la vac vigwe levac yuu nipwo toto mi la nêl xolac vô xomxo. ²³ Lêc xomxo ti kinêg i ên nêbê, “Apumtau,

xomxo wê Anutu obêc kô he mi he la dô maviha ge, obêc yuu tya, me?” Om Yesu nêl vô he ên nêbê, ²⁴“Xam vông yuac xêkizêc êdêc vac loc vac vuayen nipwo. Ên xomxo tibeac obêc xo ên nêb he ob la vac vuayen nipwo tige lê, lêc tiyiên ma wê he ob la vac ge. ²⁵Ên xomxo wê i xumac ge obêc kidi mi lam tung xumac lec, om xam ob le vixun di kituu vuayen di nêl bêga bê, ‘Apumtau, tax vuayen ên xe.’ Lêc obêc nêl vô xam bêga bê, ‘Xam lam gê na? Xam ge a lungên xam.’ ²⁶Lêc xam obêc luu i vya bêga bê, ‘Xe ga wê il mi xa mi mi dô, di ông mi nêl xolac vô xe vac xe bom ge.’ ²⁷Lêc obêc nêl vô xam bêga bê, ‘Xam ge a lungên xam. Xam ge tibii nipaên, om xam loc vêl ên a magnôn.’ ²⁸Om xam obêc wê bume Eblaham yuu Aisak di Jekop hixôn plopete vihati wê he la dô vac Anutu ben, dom xam ge wê Anutu obêc tii xam la dô vixun, di xam obêc byag di kic nivum lecma. ²⁹Di tibii obêc kidi vac vigwe ninya vilu vilu di viwen wê hiyôv tyip lam ge di viwen wê hiyôv hoo la ge, mi la ya di dô vac Anutu ben. ³⁰Om xam wê lê. Tibii wê xam nêb he timuên ge ya ob lam la mugên, di xomxo wê mugên ge ya obêc lôm la timuên.”

Yesu xo vigwe pisiv ên xomxo Jerusalem
(*Matyu 23:37-39*)

³¹Vô buc mahigun tige Palisi ya val nêl vô Yesu ên nêbê, “Ông sea vigwe ga di lam loc bangwe, ên Helot nêb ob hi ông wib.” ³²Lêc Yesu nêl vô he ên nêbê, “Xam loc nêl vô tibii kityooên tige bêga bê gwêbaga di titige wê a obêc tii vimwo nipaên vêl ên xomxo di vông xomxo yidac i vô nivaha lec, di duuma ge wê a obêc tiyôô yuac. ³³Lêc gwêbaga di titige di duuma ge wê a ob la, ên plopete wê xomxo hi he yib ge, he o yib vac vigwe ya lêm. Nge, he yib vac vigwe Jerusalem tibeac.

³⁴“Di xam Jerusalem, xam ge wê xam hi plopete yib, di xomxo wê Anutu vông i loc vô xam ge, od xam nêx he ya ngidax. Buc tibeac ge a vông ên a nêb a ob kituc xam lôm vô a tiyi xocbê kokilêx wê mi kituc nue lax vac vinihi ngibi ge, lêc xam nêb a vôngên i ma. ³⁵Om xam ngô lê. Anutu obêc sea xam bom i dô xel. Di a ob nêl vô xam bê xam ob wê a i tii vac nang lêm, di i miloc vô buc wê xam obêc nêl bêga bê ‘Il ob pimil xomxo ti wê tu Apumtau manôn mi val ge.’ ”

Yesu vông xomxo yidac ti vô nivaha lec

14 ¹Buc sabbat ti Yesu la vac Palisi levac ti xumac mi la ya hixôn i, lêc xomxo wê dô gee diyê i xôn. ²He dô lê, lêc xomxo wê ninivi vô vuac vuac ge ti val vô Yesu, ³om Yesu kinêg he wê xovô Moses xolac gee yuu he Palisi wê dô gee ên nêbê, “Tiyi wê il ob vông xomxo wê yidac ge i vô nivaha lec vô sabbat, me?” ⁴Lêc he o luu kiyang ti lax vô i lêm, om Yesu la hôm xomxo yidac tyo di vông i vô nivaha lec di vông i loc mi la. ⁵Mêgem Yesu nêl vô xomxo gee ên nêbê, “Xam nume ti me bwoc ti obêc

tô lôva madia lec buc sabat ge od tiyiên ma wê xam ob pul i lôm lutibed lec sabat ge, me?” ⁶Lêc he o luu kiyang ti lax vô Yesu lêm.

Xomxo i o léc yong he bê he xomxo levac lêm

⁷Yesu yê xomxo wê lam ya vac Palisi tyo ben ge, léc yê wê he ya yong he nêb he ob dô lec sia nivihã wê xomxo levac mi dô lec gee, om Yesu nêl kiyang pilepacên ti vô he ên nêbê, ⁸“Xomxo ti obêc nêl ông la vac vizid ti ge od ông o léc yong ông mi loc dô lec sia nivihã wê xomxo levac ob dô lec ge lêm. Ên xomxo levac ngwe obêc val ge ⁹od xomxo ti wê myêl vizid tige obêc nêl vô ông bê, ‘Kidi lec mi loc dô ganê di vông sia vô xomxo levac tige mi i dô lec,’ di ông nim obêc yoc ên wê ông la dô timuên.

¹⁰“Om xomxo ti obêc nêl ông la vac vizid ti ge od ông loc dô timuên ti lê, léc xomxo ti wê myêl vizid tige obêc nêl vô ông ên nêbê, ‘Ngidêg, lam dô lec sia nivihã ga’ od ông obêc tu xomxo levac ti vô xomxo gee manôn. ¹¹Ên xomxo ti obêc yong i nêb i xomxo levac ge od Anutu obêc yê i xocbê xomxo pileva, léc xomxo ti obêc vông i vô nipwo ge od Anutu obêc pimil i di vông i lê vô levac.”

¹²Pyap dêc Yesu nêl vô Palisi ti wê myêl vizid tige ên nêbê, “Ông obêc myêl vizid ge od ông o léc nêl tame mame lime ngidême, me xomxo wê susu tibeac ge i lam lêm, ên he ge wê he obêc myêl vizid nang mi vông myaviwen vac vô ông. ¹³Nge, ông obêc myêl vizid ge od ông tyuc xomxo wê nêl susu maên hixôn he wê o xêkizêc lêm di he wê vixa nipaên hixôn he wê ma tocên gee i lam. ¹⁴Xomxo tige o tiyi wê ob vông myaviwen vac vô ông ge lêm, léc Anutu ob vông myaviwen nivihã vô ông vô buc timuên wê xomxo nivihã ob kidi lec vac yibên ge om ông ob dô hixôn xêmyaa nivihã.”

Kiyang pilepacên lec vizid

(Matyu 22:1-10)

¹⁵He gên ya mi dô vac Palisi tyo ben, léc xomxo ti vac he mahigun ngô kiyang wê Yesu nêl lec vizid ge om nêl vô Yesu ên nêbê, “Xomxo wê ob la ya mi dô vac Anutu ben lag puunê ge obêc dô hixôn xêyaa nivihã.” ¹⁶Lêc Yesu nêl kiyang pilepacên vô i bêga ên nêbê, “Xomxo ti nêb ob myêl vizid levac ti om vông kiyang la vô xomxo tibeac ên nêb he i lam ya. ¹⁷Om buc wê ob ya yaên ge od vông nu yuac ti la nêl vô xomxo wê ob lam vac vizid ge ên nêbê, ‘Yaên noc pyap, om xam lam ên lam wa.’

¹⁸“Lêc he toto nêl lax vô i ên nêbê he laên ob ma. Om ti nêl vô i ên nêbê, ‘A kisuu kibun ti, om a ob la xê, om ông lôc nêl vô tibii levac bê o tiyi wê a ob loc ge lêm.’ ¹⁹Di ti nêl vô i ên nêbê, ‘A kisuu bwoc kau vigê yuu om a ob la tixuu mi xê bêc obêc vông yuac nivihã, om ông lôc nêl vô xomxo levac bê o tiyi wê a ob loc ge lêm.’ ²⁰Di ti nêl ên nêbê, ‘A kô vêx paha ti om a locên ob ma.’

21 “Mêgem nu yuac tyo lax mi la nêl kitong vô i xomxo levac, mêd xomxo levac tyo ngô di xêyaa vô myavinê di i nêl vô nu yuac tyo ên nêbê, ‘Ông loc tup vô môp levac yuu nipwo vihati vac vîgwe levac ga di tyuc xomxo wê nêl susu maên hixôn he wê o xêkizêc lêm ge di he wê vixa nipaên hixôn he wê manôn tocên gee vihati i lam.’ 22 Om nu tyo la vông i tîyi dêc lôm nêl vô i ên nêbê, ‘A vông i tîyi wê ông nêl ge lê, lêc vîgwe gên o pup lec lêm.’

23 “Mêgem xomxo levac tyo nêl vô i ên nêbê, ‘Om ông loc vô môp nipwopwo wê la vac yuac ge vihati di loc kidu xomxo vihati ên he i lam pup lec a xumac. 24 Lêc a nêl vô ông bê xomxo wê a tyuc he taxlee lêc he o lam lêm ge, ti ob ya vizid wê a vông ge hixôn lêm.’ ”

Kiyang lec xomxo wê nêb ob timu vô Yesu ge
(*Matyu 10:37-38*)

25 Xomxo tibeac hiwocên timu vô Yesu vixa mi he la, lêc Yesu pop i di nêl vô he ên nêbê, 26 “Xomxo ti obêc nêb timu vô a xolac, lêc vông nilô lax vô tae mae lie di vinêe nue di ici va, di o vông nilô la diluhu vô a lêm ge od o tîyi wê ob tu a nug ge lêm. 27 Di xomxo wê o kilê viyin lec tîyi xocbê kilê xax pola ge mi timu vô a lêm ge, ge o tîyi wê ob tu a nug ge lêm.

28 “Om xam ngô lê. Xam ti obêc xo ên xam nêb xam ob lox xumac vixa dia ti ge od i dô mi xovô bê mone dô i tîyi wê ob lox xumac tige ya di i pyap ge, me? 29 Obêc xovô bêge tax lêm ge od obêc yev teac vac pyap, lêc o tîyi wê ob lox xumac tige pyap ge lêm, di xomxo vihati ob yê di so vya vô ông 30 di nêl bêga nêbê, ‘Xomxo tige nêb ob lox xumac lê, lêc o lox i pyap lêm.’

31 “Di kiyang ngwe, king ti wê nue vevac 10,000 ge nêb ob la vông vevac vô king ngwe wê nue vevac 20,000 ge od i dô mi xovô bêga bê xêkizêc wê nue vông ge tîyi wê obêc nginoo king ngwe wê nue 20,000 ge vêl ge, me he tîyiên ma. 32 Lêc obêc xovô bê tîyiên ma ge od king ngwe ge i gên dô teva di i vông xomxo mangwe i loc ên he i viac kiyang bê vevac obêc ma.

33 “Kiyang bêge, mêgem xam xovô bê xam ti obêc vô nimim vô susu wê i vông ge vihati lêm ge od o tîyi wê ob tu a nug ge lêm.

Kiyang pilepacên lec sol
(*Matyu 5:13; Mak 9:50*)

34 “Sol ge nivîha, lêc obêc vô nyen maên ge od il obêc vông bêna vô ên i vô nyen i tii vac nangê? 35 Ên sol wê nyen maên ge o nivîha tîyi wê il ob vông yuac ya ge lêm, om il ob nêx i la xel. Xam ninyam obêc yêp ge od xam ngô di xovô.”

Kiyang pilepacên lec bwoc sipsip ti
(*Matyu 18:12-14*)

15 ¹Tîbii nipaên wê mi kô takis gee hixôn tîbii nipaên yaya, he tibeac la vô Yesu ên nêb ob ngô i vya. ²Lêc he Palisi yuu xomxo

wê xovô Moses xolac gee yê di vô mya nipaên vô di nêl ên nêbê, “Xomxo tya ganê kô tibii nipaên lec di ya mi dô hixôn he.”

³Mêgem Yesu nêl kiyang pilepacên ti vô he ên nêbê, ⁴“Xam ti obêc viac bwoc sipsip 100 lêc ti xôa obêc ma ge od obêc sea sipsip 99 gee i le di lax myag ti wê xôa ma ge. ⁵Di obêc yêvô ge od obêc kilê lec kidiac di lax mi la ben hixôn xêyaa nivihã, ⁶di lax nêl lie hixôn nipipu ya lam di nêl vô he ên nêbê, ‘Xam lam ên il xôn ob dô hixôn xêdyaa nivihã di pimil a bwoc, ên a bwoc ga xôa ma lê, lêc a la xêvô mi kô mi vena nang.’ ⁷Kiyang bêge mêgem a ob nêl vô xam bê xomxo wê vông nipaên ge ti obêc pilepac i ge od he wê dô kisii ganê obêc hi vixa ên i, nginoo xomxo 99 wê he nêb he vô nivihã lec pyap om he ob pilepac he lêm ge.”

Kiyang pilepacên lec mone wê xôa ma ge

⁸Yesu nêl ên nêbê, “Vêx ti mone vigê yuu, lêc ti xôa ma om byêx ngwax vac lam di pityep xumac nilô di myag. ⁹Myag lêc yêvô om nêl lie hixôn nipipu ya lam di nêl vô he ên nêbê, ‘Xam xêmyaa i vô nivihã hixôn a, ên a mone xôa ma, lêc a xêvô i tii vac nang.’ ¹⁰Kiyang bêge om a ob nêl vô xam bê xomxo wê vông nipaên ge ti obêc pilepac i ge od Anutu nue angela obêc hi vixa ên i tiyi xocbê vêx tige hi vixa ên mone wê yêvô ge.”

Kiyang pilepacên lec nu ngivihi ti wê sea ma di la ge

¹¹Yesu nêl vô he ên nêbê, “Xomxo ti do, di i nu tuc yuu nu môn. ¹²Lêc nu môn nêl vô ma ên nêbê, ‘Mag, kibun yuu mone wê ông nêl a lêg lec ge, a ob kô vihati.’ Om ma vông byed vô susu vô yuu, om nu tuc kô wiwen di nu môn kô wiwen. ¹³He o dô buc xuhu dia lêm. Nge, dô nipwo tya, lêc nu môn viduba i susu hixôn mone wê ma vông vô i ge vihati di loc mi la vigwe teva ti, di la nêx mone la sea lec môp nipaên. ¹⁴I nêl mone ma vêl, di vip mabu yêp vac vigwe tige di susu ma ên i. ¹⁵Om la vông yuac vô tibii viyang tige ti, lêc tibii tyo vông i la bwoc ben ên nêb i loc viac i bwoc. ¹⁶Mêlêc vip den i mabu om xo ên nêb ob ya xax nôl wê bwoc mi ya ge ên i den i, lêc xomxo ti o vông yaên ti vô i mi i ya lêm.

¹⁷“Mêd i piyôp vô nivihã di i xovô nang, om xo ên nêbê, ‘Nue yuac wê mag vông ge, yaên tibeac dô vô he, dom a va ga, vip obêc den a xib mê. ¹⁸Mêgem a ob kidi mi lax mi la vô mag, mi lax nêl vô bê, ‘Mag, a vông i so vô Anutu di vông i so vô ông hixôn, ¹⁹di a o nigvihã tiyi wê ông ob nêl bê ông num a ge lêm. Om ông vông a tu ông num yuac ti.’”

²⁰“Nêl kiyang bêge pyap, mêd kidi mi la ên nêb ob lax mi la vô ma, lêc gên mîla teva di ma yê ma la wê nu môn val ge, om xo vigwe pisiv ên di tup mi la di mîla kiva xôn. ²¹Mêd nu môn nêl vô ma ên nêbê, ‘Mag, a vông i so vô Anutu di vông i so vô ông hixôn, om a o nigvihã tiyi wê ông ob nêl bê ông num a ge lêm.’ ²²Ma ngô lê, lêc nêl vô nue yuac ên nêbê, ‘Xam loc kô ngakwi dia nivihã ti mi lam vinyum lec môn. Di xam kô ling

ti mi lam su lec i vigê di kô su mi lam su lec i vixa xôn. ²³Di loc kô bwoc kau nu wê gên ligên nivihâ ge ti mi lam hi, ên il ob xa hixôn xêdyaa nivihâ, ²⁴ên a nug tiga xocbê la yib ila lê, lêc gwêbaga dô mavihâ, di xôa ma ila lê, lêc gwêbaga il xêvô i nang.’ Om he myêl vizid mi ya di dô hixôn xêyaa nivihâ.

²⁵“Di nu tuc la dô vac yuac di val vô kwabo vô xumac lêc val ngô wê he yoo ge, ²⁶om keac nu yuac ti lam di kinêg vô i ên nêbê, ‘Xam vô va?’ ²⁷Lêc nu yuac tige nêl ên nêbê, ‘Lim môn val gwêba, om mam hi bwoc kau nu wê gên ligên nivihâ ge ti mi myêl vô lim môn ên wê la dô lê, lêc vena nivihâ vô i ge.’ ²⁸Li tuc ngô lêc xêyaa vô myavinê om nêb ob la vô ma yuu li môn vac xumac lôma lêm. Om ma lop mi lam vixun di lam viac kiyang vô nu tuc. ²⁹Lêc nu tuc nêl lax vô ma ên nêbê, ‘A ga wê a vông yuac levac vô ông tiyi klismas tibeac di a o pwoo ông vyam ti vac lêm, lêc ông o nêl a lêg lec bwoc vimek nu ti ên xe lige myêl mi xa di dô hixôn xêmyaa nivihâ lêm. ³⁰Di num môn ge wê kô ông mone mi la vông i la lec vêx yôdac lê, lêc gwêbaga vena om ông hi bwoc levac wê lig nivihâ ge ti vô i.’

³¹“Mêd ma nêl vô nu tuc ên nêbê, ‘Tuc, u mi dô ga luta, om susu wê a vông ge vihati tu ông xe. ³²Di gwêbaga il vihati ob dô hixôn xêdyaa nivihâ ên wê lim môn vena ge, ên xôa ma ila om il xê xocbê la yib ge, lêc la dô mavihâ om vena gwêbaga di il xê i manôn nang.’ ”

Kiyang pilepacên lec tibii yuac nipaên ti

16 ¹Nang dêc Yesu nêl vô nue ngivihî ên nêbê, “Xomxo susu tibeac ti dô, di nu yuac ti viac i susu, lêc xomxo ya la nêl kitong vô xomxo levac tyo ên nêbê, ‘Num ti wê bin ông yuac ge mi vông ông susu yuu mone la vax vax.’ ²Om xomxo levac tige keac nu yuac tyo lam di kinêg vô i ên nêbê, ‘Ông vông bêna lêc a ngô xocbê kiyang yêp vô ôngê? Ông loc kivuu a susu wê ông viac ge vihati lec kipihac ti dêc vông i lam ên a xê, ên ông ob viac a yuac i tii vac lêm.’

³“Om nu yuac tyo xo bêga ên nêbê, ‘Om a ob vông bêna? Ên xomxo levac obêc tii a vêl ên i yuac gwêbaga, lêc xêkizêc wê a vông ge tiyiên ma wê a ob kiden kibun ge, di a nig yoc ên wê a ob kitaa susu vaxvax vô xomxo ya ge. ⁴Lêcom ga a xovô môt wê a ob vông ge ti, êdêc buc wê xomxo levac obêc tii a vêl ên i yuac ge od xomxo ya i kô a mi loc vac ben di viac a.’ ⁵Om môt wê xovô ge bêga ên nêbê keac tibii wê i xomxo levac myaviwen yêp vô ge he toto lam, dêc kinêg ti wê val taxlee ge ên nêbê, ‘Ông kô susu vaba vô xomxo levac lêc myaviwen gên yêpê?’ ⁶Om xomxo tyo nêl vô i ên nêbê, ‘Ge a kô wel vac dlam 100.’ Om nu yuac tyo nêl vô i ên nêbê, ‘Hôm kipihac wê ông myaviwen yêp lec ge di kivuu ông myaviwen i tô mi loc xocbê dlam wel 50.’ ⁷Nang dêc xomxo ngwe val om nu yuac tyo kinêg i ên nêbê, ‘Ông myaviwen vaba yêpê?’ Lêc xomxo

tyo nêl ên nêbê, 'Pidi yul 100.' Om nu yuac tyo nêl vô i ên nêbê, 'Hôm kipihac ga di kivuu ông myaviwen bê pidi yul 80.'

⁸"Om xomxo levac tyo yê môt nipaên wê nu yuac tige vông ge, lêc pimil nu yuac tige ên wê vông môt hixôn piyôp nivihã ge. Ên xomxo wê vông nilô la vô susu kibun ga ge, he kô piyôp levac lec môt yuu yuac kibun ga luu xomxo wê dô vac xêseac ge vêl.

⁹"Om a ob nêl vô xam bê xam ngidu xomxo xôn ya mone yuu susu kibun ga ên he xêyaa i vô nivihã vô xam, di buc timuên wê xam vigêm obêc sea mone ge od Anutu i kô xam mi xam loc dô vac i ben luta lêc luta.

¹⁰"Xomxo ti obêc viac yuac nipwopwo wê xomxo nêb i vông ge nivihã ge od obêc viac yuac levac nivihã êno bêge, lêc xomxo ti obêc viac yuac nipwopwo nivihã lêm ge od obêc viac yuac levac êno nivihã lêm. ¹¹Mone yuu susu kibun ga, ge susu pileva, lêc xam obêc viac nivihã lêm ge od letya obêc vông vizid wê nôñ nivihã ge ti vac xam vigêmê? ¹²Di xam obêc viac xomxo ngwe susu nivihã lêm ge od letya ob vông susu vô xam ên nêb i tu xam nêmê?

¹³"Xomxo ti o tiyi wê ob vông yuac vô xomxo levac yuu ge lêm, ên xêyaa obêc vin lec ngwe di ob yê ngwe nipaên, me obêc vông nilô la vô ngwe di vô nimi vô ngwe. Om o tiyi wê xam ob vông nilôm i loc vô Anutu yuu xôn mone ge lêm."

Yesu kiyang lec môt yaya

¹⁴Palisi ngô kiyang wê Yesu nêl ge lêc vô mya nipipaa vô, ên he xêyaa vin lec mone luu vêl. ¹⁵Om Yesu nêl vô he ên nêbê, "Xam ge wê xam yong xam ên xam nêbê xomxo i yê xam nêbê xam nivihã, lêc Anutu xovô xam nilôm nêb nipaên, ên môt wê xomxo yê nêb nivihã ge, ge wê Anutu yê ên nêb juda juda nipaên.

¹⁶"Moses xolac hixôn plopete kiyang yêp di i val tyip vô buc wê Jon lipac xomxo ge, di vô buc wê Jon vông ge di i val gwêbaga, a nêl xolac paha wê Anutu ben ge vô xomxo, mêgem xomxo tibeac nilô kidu he nêb he ob tu Anutu nue mi la dô vac i ben. ¹⁷Lag yuu kibun obêc la xôa ma, lêc Moses xolac bo ti obêc la xôa ma hixôn lêm.

¹⁸"Xomxo ti obêc sea vinê di la kô vêx bangwe ge od ge vông yôdac vêx yuu vux, di xomxo ti obêc kô vêx ti wê liya sea i di la ge od ge vông môt yôdac vêx yuu vux."

Xomxo wê susu tibeac ge ti yuu Lasalas

¹⁹Nang dêc Yesu nêl ên nêbê, "Xomxo susu tibeac ti dô dêc vinyum ngakwi nivihãviha di ya yaên nivihãviha tiyi buc vihati. ²⁰⁻²¹Dêc xomxo susu maên ge ti dô lêngêbê Lasalas, lêc mi yêp vô xomxo susu tibeac tyo vuayen, ên nêb ob ya yaên myapipu wê tô mi la vac tevol kwa ngibi ge, lêc kityax dô lec Lasalas ninivi vihati om noo lam mi tep lec.

22 “Yuu mi dô di buc ti lê, lêc Lasalas yib di angela lam kô i mi la tung i hixôn Eblaham vac Anutu ben lag puunê. Nang dêc xomxo susu tibeac tyo yib nang mi lie yev, 23 di i la dô vac vigwe nipaên di kô myavinê levac mi dô, dêc yê ma la kisii lêc yê Eblaham wê dô tevabanê di Lasalas dô hixôn i ge. 24 Mêgem tyuc vya levac ên nêbê, ‘Mag Eblaham, ông xo vigwe pisiv ên a, di vông Lasalas i lam tinyum vigê liyihi vac mia di kô mi lam kitiv lec a get ên i vô ningigooên vô a, ên ngwax ya a nignivi vô myavinê levac.’

25 “Lêc Eblaham nêl vô i ên nêbê, ‘Nuge, ông xovô lê. Ên buc wê ông dô kibun ge, od ông dô vac nivaha hixôn susu nivaha, di Lasalas dô vac nipaên nô, lêc gwêbaga Lasalas dô vac nivaha yuu malehe di ông va dô vac nipaên yuu myavinê. 26 Di kiyang ti yêp bêga nêbê vun madia ti yêp kisuu xe di xam lec, om xomxo ti obêc nêb kidi vac ga di loc vô xam ge od tiyiên ob ma, di ngwe obêc nêb kidi vac xam mi lam vô xe ge od tiyiên ob ma.’

27 “Mêd xomxo susu tibeac tyo nêl ên nêbê, ‘Mag Eblaham, a kitaa ông bê ông vông Lasalas i lôc mi loc mag ben, 28 ên a lige vux vigê vilu dô, om a nêb i loc nêl vô he bê he i sea môp nipaên êdêc he i o lêc lam kô myavinê nipaên hixôn a lêm.’

29 “Lêc Eblaham nêl vô i ên nêbê, ‘Kiyang wê Moses he plopete kivuu ge yêp pyap, om he i ngô.’ 30 Lêc xomxo tyo nêl ên nêbê, ‘Mag, ge tiyiên ma, lêc xomxo ti obêc kidi lec vac yibên mi la nêl kiyang vô he ge od he obêc pilepac he.’ 31 Lêc Eblaham nêl ên nêbê, ‘He ob ngô Moses he plopete kiyang mi vông i vin lêm ge od xomxo ti obêc kidi lec vac yibên mi lax ge od he obêc vông i vin xomxo tige vya êno lêm.’ ”

Môp wê ob vông xomxo vô nipaên ge
(*Matyu 18:6-7,21-22; Mak 9:42*)

17 1 Yesu nêl vô nue ngivihi ên nêbê, “Môp nipaên toto yêp wê ob vông xomxo vô nipaên ge, lêc xomxo ti wê didii xomxo vac nipaên ge obêc kô myaviwen levac lec. 2 Xomxo tibêge, xomxo ob nux ngidax viyin lec i kwa di nêx i la vac gwec madia ge od nivaha, êdêc i o lêc vông xomxo wê xovôên ma ge ti i vô nipaên lêm. 3 Om xam viac xam nivaha. Di lime ti obêc vông i so ge od ông nêl i nên soên vô i, di obêc pilepac i ge od ông kitya i nên nipaên vêl. 4 Di lim tyo obêc vông i so vô ông lu vigê vilu di sec yuu lec buc ti, di lam vô ông lu vigê vilu di sec yuu lêc nêl ên nêbê, ‘A vông i so vô ông’ ge od ông kitya i nên nipaên tige vihati vêl.”

Môp vông vinên

5 Apumtau Yesu nue ngivihi nêl vô i ên nêbê, “Xe nêb ông vông xe nêm vông vinên i vô levac.” 6 Lêc Apumtau nêl vô he ên nêbê, “Xam nêm vông

vinên obêc nipwo tya tiyi xocbê vixôô nôn nulen ge od xam tiyi wê xam ob nêl vô xax levac tige bê, ‘Ông pul ông vêl ên kibun di loc ên loc yev ông vac gwec’ ge od obêc vô ninya lehe vô xam.”

Môp wê nue yuac ob vông ge

⁷Yesu nêl ên nêbê, “Xam nume yuac ti obêc sap kibun me viac bwoc di vena ge od ông ob nêl bêna vô i? Ông ob nêl vô bê, ‘Ông lam tô mi dô kibun mi wa yaên?’ ⁸Ông ob nêl tibêge lêm. Nge, ông ob nêl vô bê, ‘Ông viac ông di myêl yaên mi duu, di kô mi lam ên a ob xa di num tax, dèc ông wa di num timuên.’ ⁹Di num yuac tige obêc nêl bêna vô ông? Ôbêc nêl bê ông pimil i ên wê vông yuac wê ông nêl ge, me? Ob nêl tibêge lêm, ên ge i yuac wê mi vông ge. ¹⁰Om xam êno, xam obêc vông yuac vihati tiyi xocbê Anutu nêl vô xam ge od xam o lèc nêl bê Anutu i pimil xam lêm. Nge, xam nêl bêga bê, ‘Xe tibii yuac pileva. Xe o tiyi wê xe ob nêl bê Anutu i pimil xe ge lêm. Ên yuac wê xe vông ge, Anutu vông vac xe vigêm om xe vông.’”

Yesu vông xomxo kityax mahizihizi vigê yuu vô nivihalec

¹¹Yesu la ên nêb ob la Jelusalem, lèc la vac Samelia yuu Galili ben yôg, ¹²mi la vac vigwe ti, lèc xomxo kityax mahizihizi vigê yuu yê i, lèc le teva ¹³di tyuc vya levac ên nêbê, “Apumtau Yesu, xo vigwe pisiv ên xe.” ¹⁴Om Yesu yê he di nêl vô he ên nêbê, “Xam loc ên loc hilung nimnivi vô xomxo wê mi dô vac xumac ngibua ge lê ên he i yê bê xam nimnivi vô nivihalec.” Om he dila vô môp lèc he ninivi vô nivihalec. ¹⁵Om he yê wê ninivi vô nivihalec ge, lèc he ti pop mi lax mi la vô Yesu di pimil Anutu ya vya levac, ¹⁶di yev vixa kitu vac di kipôm manôn vô Yesu vixa kwa ngibi di pimil i ên wê vông i vô nivihalec ge. Xomxo tige tibii Samelia ti. ¹⁷Mêd Yesu nêl ên nêbê, “A vông xomxo vigê yuu vô nivihalec lê, lèc he vigê vilu di sec yuudiyuu la na? ¹⁸Tibii tived ga wê vena pimil Anutu ge, dom he baba wê Yuda ge ti o vena lêm.” ¹⁹Mêd Yesu nêl vô tibii Samelia tyo ên nêbê, “Kidi lec mi lôc bom, ên vông vinên wê ông vông ge wê vông vông nimnivi vô nivihalec.”

Yesu buc wê ob lop mi lôm ge

(Matyu 24:23-28,37-41)

²⁰Palisi ya val kinêg vô Yesu ên nêbê, “Buc wê Anutu obêc lam tu king mi xomxo la vac i kwa ngibi ge obêc yelacna?” Lèc Yesu nêl ên nêbê, “Xam ob wê do ti lê lèc xovô bê Anutu buc wê ob tu king ge val ge lêm. ²¹Di xomxo tiyiên ma wê ob yê mi nêl bê, ‘Wê, tyo val ga’ me ‘Tyo dô ganê’. Xam ngô lê. Anutu lam tu king vac xam mahigun pyap.”

²²Mêd Yesu nêl vô nue ngivihi ên nêbê, “Obêc buc timuên ge od xam obêc zid bê Xomxo Nu buc i vena lutibed ên xam wê, lêcom xam wêên

ob ma. ²³Di xomxo ya obêc nêl vô xam bê, 'Wê, tyo dô ganê,' me 'Tyo val ga.' Lêc xam o lêc loc vô he vixa lêm. ²⁴Ên buc wê Xomxo Nu obêc vena ge od obêc vena tiyi xocbê deac hixelac lutibed di xêseac linac la vac vigwe vihati ge. ²⁵Mêlêc Xomxo Nu obêc kô myavinê levac tax di xomxo wê dô gwêbaga obêc vô nimi vô i.

²⁶"Lêc buc timuên wê Xomxo Nu obêc vena ge od xomxo obêc dô i tiyi xocbê xomxo dô vô Nôa buc ilage di Xomxo Nu ob vena. ²⁷Ên xomxo ilage ya di num di iima mi dô, di i mila tyip lec buc wê Nôa la dô vac sip nilô ge lê, lêc lutibed mia butac mabu di lam hi xomxo vihati yib mima vêl.

²⁸"Di Lot buc bêge êno, ên xomxo ya di num di kisuu susu vôma di vông yuac lec yaên di lox xumac mi dô, ²⁹lêc buc wê Lot kidi gê Sodom mi la ge od ngwax yuu ngidax myavinê tô gê lag puunê tiyi xocbê lun val ge mi lam hi xomxo gee yib mima vêl. ³⁰Om buc wê Xomxo Nu obêc vena le seac ge od xomxo obêc dô mi vông bêge êno.

³¹"Obêc buc tige lêc xomxo ti dô lec xumac kisii ge od i o lêc lop mi lax kô i susu vac xumac lôma lêm, me xomxo ti obêc la dô vac yuac ge od i o lêc lax mi la ben lêm. Nge, susu i dô di xomxo i loc nêl mô. ³²Xam xovô Lot vinê wê tu ngidax mi le vac môp ge. ³³Ên xomxo ti obêc nêb viac ninivi ên viyin yuu yibên ge od maviha wê i vông ge obêc yib. Lêc xomxo ti obêc sea i ninivi lec a lêg ge od obêc dô maviha yuu nihiha.

³⁴"A ob nêl vô xam bê obêc buc tige xomxo yuu ob diyêp lec pêt ti vô bucên, lêc Anutu obêc kô ngwe di sea ngwe dô. ³⁵Di vêx yuu obêc divông yuac ti mi dô, lêc Anutu obêc kô ngwe di sea ngwe dô. ³⁶[Di vux yuu obêc dô vac yuac ti lê, lêc Anutu obêc kô ngwe di sea ngwe.]"

³⁷Mêd nue ngivihi kinêg vô Yesu ên nêbê, "Apumtau, kiyang tige obêc vô nôn lec gê na?" Lêc Yesu nêl vô he ên nêbê, "Xam xovô bê susu wê yib mi pital ge obêc yêp vac vigwe ti ge od menac byang kitucma di la lec vigwe tige."

Kiyang pilepacên lec vêxôv ti yuu hizap nipaên ti

18 ¹Mêd Yesu nêl kiyang pilepacên ti vô nue ngivihi, ên nêb ob vông xovôên vô he bê he i kitaa i tiyi buc vihati di ni ma lecên i ma.

²Om nêl kiyang pilepacên bêga vô he ên nêbê, "Hizap ti dô vac vigwe ti, lêc o xona ên Anutu lêm di yê xomxo vihati tiyi xocbê susu vidaaên ge.

³Di vêxôv ti dô vac vigwe tige, lêc la mi kitaa hizap tige tiyi buc vihati ên nêbê, 'Tibii ti nêb ob vông kiyang vô a, om a nêb ông ngidu a xôn ên a nêg kiyang.' ⁴Lêc hizap o vông i vin i vya lutibed lêm, di buc tibeac la vêl lê, lêc hizap tyo xo bêga ên nêbê, 'A o xona ên Anutu lêm, di a o xona ên xomxo ti lêm. Nge, a xê he tiyi susu vidaaên. ⁵Lêcom vêxôv tige môci lam mi kitaa a nginong om a obêc ngidu i xôn ên i kiyang, ên i o lêc lam nginong nginong mi vông a nig i ma lêm.'"

⁶Mêd Apumtau Yesu nêl vô nue ngivihi ên nêbê, “Xam xovô kiyang wê hizap nipaên tige nêl ge lê. ⁷Om xam xo ên xam nêbê va? Xomxo wê Anutu vinoa he pyap nêb he tu ixê ge, he obêc kiyag vya lec Anutu tiyi bucên yuu vidiiên vihati ge od Anutu obêc ngô he vya lêmê? Di obêc ngidu he xôn lutibed lêmê? ⁸A ob nêl vô xam bê Anutu obêc ngô he vya di ngidu he xôn lutibed. Lêc a ob kinêg vô xam bê buc wê Xomxo Nu obêc lop mi lôm ge od obêc yê bê xomxo vông i vin, me o vông i vin lêm?”

Kiyang pilepacên lec Palisi ti yuu tibii takis kôên ngwe

⁹Yesu nêl kiyang pilepacên tiga vô xomxo ya wê nêb he tibii vông vinên nivihã di yê xomxo baba ên nêb he xomxo vidaaên ge, om nêl bêga vô he ên nêbê, ¹⁰“Xomxo yuu la vac Anutu xumac ngibua ên nêb ob la kitaa, Palisi ngwe di tibii takis kôên ngwe. ¹¹Om Palisi tyo la le di kitaa vac nilô bêga ên nêbê, ‘O Anutu, a pimil ông ên wê a o nipaên tiyi xocbê xomxo baba ge lêm, ên he mi vông môp yôdac susu yuu yôdac vêx yuu vux di môp nipaên yaya. Di a o nipaên tiyi xocbê tibii takis kôên ganê lêm. ¹²Ên a ga wê a mi ngibua yaên lec buc yuu yuu tiyi da vihati, di a mone yuu susu wê a mi kô ge a mi tung vigê yuu yuu, om a mi vông kidu ti vô ông.’ ¹³Di tibii takis kôên ngweo mila le teva, di o lax ma la kisiinê xocbê môp wê xomxo baba mi vông ge lêm. Nge, xovô nêb i tibii nipaên om kituu pikopac di kitaa bêga ên nêbê, ‘O Anutu, ông xo vigwe pisiv ên a di kitya a nêg nipaên vêl, ên a ga tibii nigpaên.’”

¹⁴Om Yesu nêl ên nêbê, “A nêl vô xam bê tibii takis kôên ge Anutu kitya i nên nipaên vêl di yê i nivihã di i lax mi la ben, di Palisi ge Anutu o yê nivihã lêm. Ên xomxo wê ob yong ici va ge, ge wê Anutu obêc vông i vô nipwo lec, di xomxo wê vông ici vô nipwo lec ge, ge wê Anutu ob pimil i di vông i lê vô levac.”

Yesu kitaa lec nipwo

(Matyu 19:13-15; Mak 10:13-16)

¹⁵Xomxo kô nue nipwo mi la vô Yesu, ên nêb i vyax vigê lec he di kitaa lec he, lêc Yesu nue ngivihi yê di vô mya nipaên vô he. ¹⁶Lêc Yesu keac nipwo lam di nêl ên nêbê, “Vông nipwo i lam vô a di xam o le vac he xôn lêm, ên xomxo tibêge wê ob la dô vac Anutu ben ge. ¹⁷A nêl hixôn nôn vô xam bê xomxo ti obêc vông i vin Anutu mi la vac i kwa ngibi tiyi xocbê nipwo mi la vac tae mae kwa ngibi lêm ge od o tiyi wê obêc la dô vac Anutu ben ge lêm.”

Xomxo wê susu yuu mone levac ge

(Matyu 19:16-30; Mak 10:17-31)

¹⁸Xomxo levac ti kinêg vô Yesu ên nêbê, “Xolac kehe nivihã, a obêc vông bêna êdêc dô magviha luta lêc luta?” ¹⁹Lêc Yesu nêl vô i ên nêbê,

“Bêna léc ông nêb a nivihā? Xomxo nivihā ti o dô lêm. Anutu vaci nôn tived wê nivihā. ²⁰Ông xovô xolac wê Anutu nêl vô Moses ên nêbê, Ông o léc vông môp yôdac vêx yuu vux lêm. Ông o léc hi xomxo i yib lêm. Ông o léc vun xomxo ngwe susu lêm. Ông o léc nêl kiyang kityooên lec xomxo ti lêm. Ông loc vac tam yuu mam vya kwa ngibi.” ²¹Om xomxo levac tyo nêl ên nêbê, “Buc wê a gên nipwo di i val tyip gwêbaga, a viac xolac gee vihati mi vông i vô nôn lec.” ²²Yesu ngô tige, di luu i vya ên nêbê, “Môp ti gên yêp wê ông ob vông hixôn bêga bê ông loc vông susu tibeac wê ông vông ge mi tibii i kisuu di ông vông mone vô tibii wê nêl susu maên ge, ên ông obêc kô susu nivihā gê kisii ganê. Pyap dêc ông lôm timu vô a vixag.” ²³Xomxo levac tyo ngô kiyang ge lê, léc kiyang tige vông i nilô vô viyin levac, ên wê i mone levac ge.

²⁴Om Yesu yê i di nêl ên nêbê, “Xomxo wê susu tibeac ge obêc nêb la vac Anutu ben ge od obêc viyin levac vô he. ²⁵Môp wê bwoc kamel ti obêc la vac yin kitu tocên ge, viyin levac lê, léc xomxo susu tibeac obêc nêb la vac Anutu ben ge od obêc viyin levac luu vêl.” ²⁶Mêgem xomxo wê ngô kiyang tige nêl ên nêbê, “Obêc tibêge ge od letya tiyi wê ob la dô mavihā ge?” ²⁷Lêc Yesu nêl ên nêbê, “Môp wê xomxo tiyiên ma wê ob vông ge, ge Anutu ob vông.”

²⁸Mêd Pita nêl vô Yesu ên nêbê, “Wê lê. Xe ga wê xe sea susu wê xe vông ge vihati dô di lam timu vô ông vixam.” ²⁹Lêc Yesu nêl vô he ên nêbê, “Vixôhilôg, a ob nêl vô xam bê xomxo ti obêc sea ben hixôn vinêe nue di tae mae lie lec Anutu xolac yuu ben ge ³⁰od obêc kô myaviwen nivihā luu vêl gê kibun ga, di buc timuên ge od obêc la dô mavihā luta léc luta.”

Yesu nêl kiyang vông lu yon lec myavinê wê ob kô ge
(*Matyu 20:17-19; Mak 10:32-34*)

³¹Yesu kô nue ngivihā vigê yuu di tô mi la yuu mi he la, dêc Yesu nêl vô he ên nêbê, “Xam ngô lê. Il ob la Jelusalem lê, léc kiyang vihati wê plopete kivuu lec Xomxo Nu ilage obêc vô nôn lec. ³²Om xomxo obêc vông i la vac tibii wê o Yuda lêm ge vigê, dêc tibii obêc vô mya nipaên vô i di pisuv myaluc lec, ³³di pisa i ya yihi dêc hi i yib, di buc yon obêc lam la vêl ge od ob kidi lec mavihā nang.” ³⁴Mêgem nue ngivihā ngô kiyang tyo léc he lungên, ên kiyang kehe o yêp seac vô he lêm om he vyac xovôên ma.

Yesu vông xomxo ma tocên ti vô nivihā lec
(*Matyu 20:29-34; Mak 10:46-52*)

³⁵Yesu miła kwabo vô vigwe Jeliko, léc xomxo ma tocên ti dô vô môp ninya di kitaa susu vô tibii, ³⁶lêc ngô kiyang ngena ngena wê lam hixôn Yesu ge om kinêg vô xomxo ya ên nêbê, “Tibii vô nididun ên va?” ³⁷Lêc

xomxo nêl vô i ên nêbê, “Yesu Nasalet valê.” ³⁸Om xomxo ma tocên tyo tyuc ên nêbê, “Yesu, Devit nu, ông xo vigwe vô pisiv ên a.” ³⁹Lêc xomxo wê lam mug ge nêl ên nêbê, “Dô kiyang maên.” Lêc ma tocên tyo tyuc nginong nginong hixôn vya levac ên nêbê, “Ông Devit nu, xo vigwe vô pisiv ên a.” ⁴⁰Mêgem Yesu val le di nêl vô xomxo nêb he i kô xomxo ma tocên tyo mi lam vô i. Om he kô mi val di val lax i le vô Yesu manôn dêc Yesu kinêg vô i ên nêbê, ⁴¹“Ông nêb a vông bêna vô ôngê?” Om xomxo tyo nêl ên nêbê, “A nêb ông vông a magnôn i seac.” ⁴²Om Yesu nêl vô i ên nêbê, “Mamnôn i seac. Vông vinên wê ông vông ge vông ông vô nimviha lec.” ⁴³Mêgem lutibed xomxo tyo manôn seac, di i la hixôn Yesu di pimil Anutu. Di xomxo wê yê ge vihati pimil Anutu ên wê xomxo ma tocên tige manôn seac ge.

Yesu yuu Sakias kiyang

19 ¹Yesu la vac vigwe Jeliko, ²di xomxo ti lê nêbê Sakias dô vac vigwe tige. Sakias ge xomxo takis kôên nêl levac di i mone yuu susu tibeac. ³Sakias nêb ob yê Yesu om la lêc tiyiên ma, ên myabo om xomxo tibeac le vac i manôn xôn, ⁴om tup mi la mug vô môp wê Yesu ob lam vô ge di mila lec xax ti ên nêb ob la dô ên yê Yesu wê i val ge. ⁵Yesu mila vac xax kwa ngibi

wê Sakias dô lec ge di lax ma lec di nêl vô Sakias ên nêbê, “Sakias, lop lutibed ên a ob dô hixôn ông vac ông bom gwêbaga.” ⁶Mêgem Sakias lop lutibed di kô Yesu mi la vac ben hixôn xêyaa nivihã. ⁷Tibii yê wê Yesu la dô vac Sakias ben ge om he ni nyag di nêl ên nêbê, “Bêna lêc xomxo tiganê la dô vac tibii nipaên tiganê ben di la dô hixôn?” ⁸Mêlêc Sakias le vô he vihati manôn di nêl vô Apumtau Yesu ên nêbê, “Apumtau, ngô lê. Susu vihati wê a vông ge a ob vông viwen i loc vô xomxo wê nêl susu maên ge. Di a obêc kityoo xomxo ya di vô he mone vêl ila ge od a ob vông he xe vac i luu vêl, xocbê a obêc kô xomxo ti mone kehe ti ge od a obêc vông kehe yuudiyuu vô i nang.” ⁹Mêgem Yesu nêl vô i ên nêbê, “Gwêbaga Anutu kitya xam xumac tiga nêl nipaên vêl di xam tu Anutu nue, ên ông ge, ông Eblaham tivãe ti êno. ¹⁰Ên a, Xomxo Nu, a lam ên xomxo wê lung la vac nipaên ge, ên a nêb a ob hêm he lec ên he i dô nivihã.”

Kiyang pilepacên lec xomxo vigê yuu wê kô mone ge (Matyu 25:14-30)

¹¹He ngô kiyang ngwe ge vêl, nang dêc Yesu nêl kiyang pilepacên ti vô he, ên he mila kwabo vô Jerusalem lêc tibii wê diloc hixôn i ge so ên nêb mêd he ob mila Jerusalem ge od Yesu ob tu Anutu manôn di tu king, om Yesu nêb he i xovô buc tige bê gên yêp teva, ¹²om nêl kiyang pilepacên bêga vô he ên nêbê, “Xomxo levac ti dô vac vigwe ti, lêc nêb ob la vac

vigwe teva ngwe ên xomxo i vông i tu king ên lôm viac vigwe wê mi dô vac ge. ¹³Om buc wê nêb ob la ge od nêl nue yuac vigê yuu ge lam vô i di vông mone kipihac yuu yuu vô he toto di nêl vô he ên nêbê, ‘Xam vông yuac lec mone tigae di i loc tyip lec buc wê a obêc vena ge.’

¹⁴“Mêd xomxo levac tyo loc mi la, lêc tibii vigwe tige xêyaa vô nipaên vô i, om vông lie ya timu vô i vixa mi la, ên nêb he i loc nêl bê, ‘Xe nêb xomxo tiga ob tu king mi viac xe lêm.’ ¹⁵Lêc xomxo tyo mila kô lê levac pyap di lax mi la vac ben wê ob viac ge. Mêd nêl nue yuac wê vông mone vô he ge lam vô i, ên nêb ob xovô mone wê he vông yuac lec ge bêc he tulec ya hixônê?

¹⁶“Om xomxo ti wê val taxlee ge nêl vô i ên nêbê, ‘Xomxo levac, ông vông mone kipihac yuu vô a, lêc a vông yuac lec om a tulec yul yuu hixôn.’ ¹⁷Om xomxo levac nêl vô xomxo tyo ên nêbê, ‘Ông ge xomxo nivihã wê ông viac a yuac nivihã ge. Ông kô mone nipwo tya lêc ông viac nivihã, om a ob vông ông tu levac di viac vigwe levac vigê yuu.’

¹⁸“Nang dêc nu yuac ngwe wê vông yuu ge val nang di nêl ên nêbê, ‘Xomxo levac, ông vông mone kipihac yuu vô a, lêc a vông yuac lec om a tulec yul ti hixôn.’ ¹⁹Om xomxo levac tyo nêl vô i ên nêbê, ‘Nivihã, om a ob vông ông tu levac di viac vigwe levac vigê vilu.’

²⁰“Nang dêc nu yuac ti wê vông yon ge val nang di nêl ên nêbê, ‘Xomxo levac, ga ông mone kipihac yuu wê ông vông vô a ge, om ông hôm ông xe. Ông mone ga a viyum vac nivimihi mi tung i dô, ²¹ên a xona ên ông, ên a xovô ên a nêbê ông ge xomxo myampilihi, ên susu wê xomxo ngwe ob tung ge od ông ob kô, di yaên wê xomxo ngwe yev he xe ge od ông la mi kô nôn.’

²²“Lêc xomxo levac nêl vô i ên nêbê, ‘Ông ge xomxo nipaên. Ên kiyang wê ông nêl ga hilung ông nêl nipaên, ên ông xovô ên ông nêbê a ga xomxo myagpilihi om susu wê xomxo ngwe tung i dô ge, a la mi kô, di yaên wê xomxo ngwe yev he xe ge od a la mi kô nôn. ²³Ông xovô bêge lê, lêc bêna lêc ông o la lii mone wê a vông ge vac xumac mone êdêc buc wê a vena ge od a kô mone wê a vông ge di kô wê dô lecên ge hixônê?’ ²⁴Mêgem xomxo levac nêl vô xomxo wê he xôn le ge ên nêbê, ‘Xam hôm mone kipihac yuu ge vêl ên xomxo tige vigê di loc vông vô xomxo ngwe wê mone yul yuu ge.’ ²⁵Lêc he nêl ên nêbê, ‘Xomxo levac, xomxo ganê mone levac tiyi yul yuu.’

²⁶“Lêc xomxo levac nêl ên nêbê, ‘A ob nêl vô xam bê xomxo wê he susu dô ge, he ob kô ya hixôn, di xomxo wê susu ma ên he di nipwo tya dô vô he ge od a ob vô vêl ên he. ²⁷Di xomxo wê xêyaa vô nipaên vô a ên nêb a o tu king lêm ge, xam loc kô he mi lam di hi he i yib lec a magnôn.’”

Yesu la Jelusalem lêc tibii pimil i tiyi xocbê king ge
(*Matyu 21:1-11; Mak 11:1-11; Jon 12:12-19*)

²⁸Yesu nêl bêge pyap di loc mi la ên nêb ob la Jelusalem. ²⁹Mêd mila kwabo vô vigwe yuu lê nêbê Betpasi yuu Betani wê yêp kwabo vô kitôn

Oliv ge. Mêd vông nu ngivihi yuu la, ³⁰di nêl vô yuu ên nêbê, “Muu loc vac vigwe tiganê, di muu obêc mila wê donki wê gên ligên ge ti wê tibii vô yihi lec kwa di i dile ge. Donki tige xomxo ti o dô lec ila lêm. Mêgem muu piwelac yihi vêl ên di kô mi lam. ³¹Lêc xomxo ti obêc kinêg muu bê, ‘Muu ob piwelac yihi tige vêl ên va?’ ge od muu nêl vô bê, ‘Apumtau nêb ob vông yuac lec.’ ”

³²Yuu la i tiyi wê Yesu nêl ge di mila tulec donki, ³³om yuu piwelac yihi vêl ên, lêc xomxo wê he donki ge kinêg yuu ên nêbê, “Muu piwelac ge ên va?” ³⁴Lêc yuu nêl ên nêbê, “Apumtau nêb ob vông yuac lec.”

³⁵Mêd yuu kô donki tyo mi lax vô Yesu, di he vax he ngakwi lec kisii dêc Yesu dô lec. ³⁶Yesu dô lec di la vô môt, mêd xomxo ya vax he nivimihi lec môt wê Yesu ob tup vô ge i tiyi xocbê môt wê tibii mi vông vô he king ge. ³⁷Mêd Yesu lop vô môt kitôn Oliv di mila kwabo vô Jelusalem, lêc xomxo vihati wê mi timu vô Yesu kiyang ge, he pimil Anutu hixôn xêyaa nivaha ên do levac wê Yesu vông mi he yê ge, ³⁸di he nêl levac la kisii ên nêbê,

“Il ob hi vixad i pec ên il nêd king wê tu Anutu manôn di lam ge.

Kiyang malehe yêp lag kisiinê, di Anutu wê dô lag kisiinê, il ob vông i lê i vô levac.”

³⁹He nêl bêge, lêc Palisi wê dô hixôn he ge, he ya nêl vô Yesu ên nêbê, “Xolac kehe, ông nêl vô nume bê he i dô kiyang maên.” ⁴⁰Lêc Yesu nêl ên nêbê, “A ob nêl vô xam bê he obêc dô kiyang maên ge od ngidax obêc tyuc di pimil a nang.”

Yesu byag ên tibii Jelusalem

⁴¹Mêd Yesu mila kwabo vô Jelusalem dêc yê ma la di byag, ⁴²di nêl ên nêbê, “Gwêbaga xam obêc xovô môt wê xam ob dô vac malehe ge od obêc nivaha. Lêc ga xam lungên, ên kiyang ga yêp xôpacên om xam o xovô lêm. ⁴³Xam ngô lê. Obêc buc ti lêc tibii wê yê xam nipaên ge obêc val ku xenac kisuu xam xôn di o tiyi wê xam ti ob la ge lêm. ⁴⁴Di he ob hi xam hixôn nume wê xam dô vac vigwe ga vihati vô nipaên, di ngidax wê xam lox xumac ya ge, ngwe ob dô lec ngwe kisii lêm. Kehe bêga bê xam o xovô Anutu wê lam ên nêb ob hôm xam lec ge lêm.”

Yesu tii tibii wê vông vitevac vac Anutu xumac ngibua ge vêl (*Matyu 21:12-17; Mak 11:15-19; Jon 2:13-22*)

⁴⁵Yesu la vac Anutu xumac ngibua di la tii tibii wê vông vitevac vac nilô ge la vêl, ⁴⁶di nêl vô he ên nêbê, “Xolac nêl bêga nêbê, ‘A xumac ga, xumac kitaa vacên,’ lêc xam vông i tiyi xocbê xumac wê tibii yôdac ob kitucma vac ge.”

⁴⁷Yesu mi nêl xolac vac Anutu xumac ngibua tiyi buc vihati. Mêd xomxo levac wê mi si daa gee di xomxo wê xovô Moses xolac gee hixôn

xomxo levac levac ya, he xôn nêb he ob hi Yesu i yib, ⁴⁸lêc he o tulec môp ti wê he ob hi Yesu lec ge lêm, ên xomxo tibeac vô ninya vô kiyang wê Yesu nêl ge di o sea i lêm.

Xomxo kunac Yesu ên nêbê, “Ông kô xêkizêc vô letya?”

(Matyu 21:23-27; Mak 11:27-33)

20 ¹Buc ti lêc Yesu la vac Anutu xumac ngibua di la nêl xolac vô tibii, di xomxo levac wê mi si daa vô Anutu gee di xomxo wê xovô Moses xolac gee hixôn he Yuda levac levac val vô Yesu, ²di val kunac i ên nêbê, “Ông tu letya manôn di lam vông môp tigaê? Letya nêb ông vông môp tibêgaê?” ³Lêc Yesu nêl lax vô he ên nêbê, “A êno ob kinêg kiyang ti vô xam. Om xam nêl vô a bê ⁴letya vông Jon la lipac xomxo? Ge Anutu lag kisiinê vông, me xomxo kibun ga vông?” ⁵Om he nêl vônga bêga ên nêbê, “Il obêc nêl bê Anutu lag kisiinê vông ge od Yesu obêc nêl vô il bê, ‘Lêc bêna lêc xam o vông i vin kiyang wê Jon nêl ge lêmê?’ ⁶Lêc il ob nêl bê xomxo kibun ga vông Jon la yuac tige, od xomxo obêc nêx il ya ngidax, ên he vihati vông i vin ên he nêbê Jon ge plopet wê Anutu vông i la ge ti.” ⁷Om he nêl vô Yesu ên nêbê, “Xe o xovô Jon Lipacên kehe lêm.” ⁸Mêd Yesu nêl vô he ên nêbê, “Om a êno ga, a ob nêl xomxo ti wê vông a lam ge kitong vô xam lêm.”

Kiyang pilepacên lec tibii nipaên wê viac yuac ge

(Matyu 21:33-46; Mak 12:1-12)

⁹Mêd Yesu nêl kiyang pilepacên ti vô xomxo bêga ên nêbê, “Xomxo ti xin wain vac i yuac ti, di vông vô tibii ya nêb he i viac, ên nêb ob la vigwe teva ti di la dô buc xuhu dia. ¹⁰Mêgem loc mi la dô mêd buc wê wain ob huu ge om vông nu yuac ti lax mi la vô tibii wê diviac i yuac ge ên nêbê i loc kô i wain nôn ya, om xomxo tyo mila lêc xomxo wê viacên wain ge hi i di vông i lax mi la pileva. ¹¹Nang dêc xomxo ti wê i yuac ge vông nu yuac ngwe lax vô he nang, lêc tibii yuac viacên pisa i di vô mya nipaên vô i di vông i lax mi la pileva. ¹²Nang dêc xomxo levac tige vông nu yuac ti wê vông yon ge la nang, lêc he hi i vô nipaên di nêx i la ninya. ¹³Om xomxo ti wê i yuac ge xo bêga ên nêbê, ‘A ob vô va? Ga a ob vông a nug tuc wê a xêgyaa vin lec i ge i loc vô he, ên mêd he ob yê i xocbê xomxo levac di la vac kiyang wê i vông ge kwa ngibi.’ ¹⁴Lêc xomxo wê viac i yuac ge yê wê xomxo levac tyo nu mila ge om he nêl vônga ên nêbê, ‘Xomxo ti wê ma obêc nêl i lê lec yuac ga ge val, om il ob hi i yib êdêc yuac ga i tu il xe.’ ¹⁵Om he hôm i xôn di kô mi la vô yuac ninya di hi i yib. Om a ob kinêg vô xam bê xomxo ti wê i yuac ge obêc vô va vô he? ¹⁶Ge obêc hi xomxo tige yib di vông i yuac vô xomxo baba mi he i viac nang.” Xomxo wê ngô kiyang tige nêl ên nêbê, “Le i lêc vông tibêge lêm.”

¹⁷Mêd Yesu yê he di nêl ên nêbê, “Xam nêbê môp bêge i ma, mêlêc kiyang wê plopete kivuu ilage, kehe bêna? Ên plopete ilage kivuu kiyang

mi i yêp bêga ên nêbê, 'Ngidax ti wê xomxo xumac loxên yê léc nêb tiyiên ma ge, ge wê tu ngidax xêkizêc wê ob hôm xumac xôn ge.' ¹⁸A ob nêl vô xam bê xomxo ti obêc tô mi hi i lec ngidax tige ge od ob hi i len vô pipu sea, di ngidax tige obêc tô mi hi xomxo ti ge od obêc hi i pital sea."

¹⁹Yesu nêl bêge dêc xomxo wê xovô Moses xolac gee hixôn xomxo levac wê mi si daa gee, he xovô ên he nêbê Yesu nêl kiyang pilepacên tige lec he, om he nêb he ob hôm Yesu xôn lutibed, léc he xona ên wê xomxo tibeac ge.

Xomxo nêb ob yaxên Yesu kiyang léc Yesu o nêl ti so lêm
(*Matyu 22:15-22; Mak 12:13-17*)

²⁰Mêd xomxo wê xovô Moses xolac gee hixôn xomxo levac wê mi si daa gee yê Yesu xôn di vông xomxo ya la vô i ên nêb he i yê i xôn di yaxên i kiyang bêc obêc nêl ti so ge od he ob vông i loc vac gavman vigê di vông kiyang vô. Xomxo tige kityoo nêb he xomxo nivîha, ²¹om la kinêg vô Yesu ên nêbê, "Xolac kehe, xe xovô ên xe nêbê xolac wê ông nêl vô xomxo ge, ông nêl bôbac di nivîha, di ông o xona ên xomxo ti lêm. Nge, ông mi nêl Anutu kiyang hixôn nôn vô xomxo vihati tiyima. ²²Om xe ob kinêg vô ông bê tiyi wê il Yuda ob vông mone takis vô king Sisa wê tibii madiluhu ge, me il ob vông lêm?" ²³Lêc Yesu xovô kiyang kityooên wê yêp vac he ni lô ge om nêl vô he ên nêbê, ²⁴"Xam hilung mone ti mi a xê. Letya kinu yuu lê wê yêp lec mone ga?" Om he nêl ên nêbê, "Sisa kinu yuu lê." ²⁵Mêgem Yesu nêl vô he ên nêbê, "Mêgem susu wê Sisa xe ge, xam vông i loc vô Sisa, di susu wê Anutu xe ge, xam vông i loc vô Anutu." ²⁶Mêd he o tiyi wê he ob kityoo Yesu ên i nêl kiyang ya so lec xomxo manôn ge lêm, ên he yetac ên kiyang wê Yesu nêl lax vô he ge om he dô kiyang maên.

He kinêg vô Yesu lec môp wê xomxo ob kidi lec vac yibên ge
(*Matyu 22:23-33,41-46; Mak 12:18-27,35-37*)

²⁷Xomxo Sadyusi ya val vô Yesu. He Sadyusi ge, he o vông i vin bê xomxo ob kidi lec vac yibên lêm. ²⁸Om he la nêl vô Yesu ên nêbê, "Xolac kehe, Moses xolac nêl bêga vô il ên nêbê xomxo ti obêc kô vêx ti léc nu ma di i yib di vinê gên dô ge od vux tyo lie ti ob ii vêx tyo nang êdêc vông nue, di nue i tu susu wê ma yibên vông ge kehe. Moses xolac nêl bêge. ²⁹Om wê vux vigê vilu di sec yuu ob dô lec ta yuu ma tibed, mêdêc li tuc obêc kô vêx ti léc yib di nu ma ge, ³⁰⁻³¹od li môn ob ii vêx tige i tii vac nang, léc wê obêc yib di nu ma ge od li gwaa ob ii nang, léc wê li gwaa obêc yib ge od lie timuên vihati ob timu vô môp tibed ge di ii vêx tige, léc wê vihati obêc yib di nue ma, ³²dêc vêx tyo obêc yib timuên ge. ³³Xam nêl ên xam nêbê xomxo obêc kidi lec vac yibên om xe nêb xe ob kinêg vô ông bê buc wê xomxo yibên obêc kidi lec ge, od vêx tige obêc tu

vux tina vinê? Ên vux vigê vilu di sec yuu, he xôn ii vêx tige lec buc wê he dô maviha ge.”

³⁴Mêgem Yesu nêl vô he ên nêbê, “Xomxo wê dô gwêbaga ge, he iima. ³⁵Lêc xomxo wê Anutu nêb he nivihha tiyi wê ob kidi lec vac yibên di la dô maviha timuên ge, he ob iima vô buc timuên lêm. ³⁶Ên he obêc yib i tii vac nang lêm. Nge, he ob dô tiyi xocbê angela ge, ên he kidi lec vac yibên di he tu Anutu nue.

³⁷“Moses kiyang nêl kitong êno ên nêbê xomxo yibên obêc kidi lec i tii vac nang. Ge yêp seac vac kiyang wê Moses kivuu lec xax wê ngwax ditum lec ge bêga ên nêbê, ‘Apumtau Anutu ge Eblaham yuu Aisak yon Jekop Anutu wê yon mi kitaa vô ge.’ ³⁸Yon yib tax dêc Moses kivuu kiyang tige timuên, lêc Moses kivuu i tiyi xocbê yon xeedô ge. Om il ob xovô bê Anutu o tu xomxo yibên nêl Anutu lêm. Nge, Anutu tu xomxo maviha nêl Anutu, ên xomxo wê maviha hixôn he wê yibên ge, Anutu yê he vihati xocbê he dô maviha ge.”

³⁹Yesu nêl bêge dêc xomxo wê xovô Moses xolac gee, he ya nêl ên nêbê, “Xolac kehe, ông nêl ge bôbac la tiyi.” ⁴⁰He nêl bêge, ên he xona om he nêb he ob kinêg kiyang i tii vac vô Yesu lêm.

⁴¹Lêc Yesu nêl vô he ên nêbê, “Bêna lêc xomxo ya nêl ên nêbê Kilisi wê Anutu nêb ob vông i lam ge, ge Devit nu? ⁴²Ên Devit vaci kivuu vac kipihac Sam bêga ên nêbê,

‘Apumtau Anutu nêl vô a Apumtau ên nêbê, Ông dô vô a vigêg hiyôv, ⁴³di a obêc vông tibii wê vông vevac vô ông ge he i dô vac ông vigêm vilu kwa ngibi.’

⁴⁴Devit nêl ên nêbê Kilisi ge Apumtau, om bêna lêc xomxo nêl ên nêbê Kilisi ge Devit bue timuên ti?”

Xomxo wê xovô Moses xolac gee nêl nipaên
(*Maty 23:1-36; Mak 12:38-40; Luk 11:37-54*)

⁴⁵Xomxo tibeac dô om he ngô kiyang wê Yesu nêl vô nue ngivihi bêga ên nêbê, ⁴⁶“Xam viac xam ên môp nipaên wê xomxo wê xovô Moses xolac gee mi vông ge. Ên he xêyaa vin lec môp wê he ob vinyum ngakwi dia nivihha di la vilee vac maket ên he nêb xomxo i yê he di pimil he ya kiyang malehe, di he obêc la vac xumac lilo, me he ob la ya vizid levac ge od he nêb he ob dô lec sia nivihha wê xomxo levac mi dô lec ge. ⁴⁷Lêc he ge wê he mi vô xomxo vêxôn nêl susu yuu xumac vêl ge, di buc wê he ob kitaa ge od he mi vuyum nêl nipaên vac kitaaên dia. Om myaviwen nipaên wê he ob kô ge obêc levac mabu yocên luu vêl.”

Vêxôn wê vông daa vô Anutu ge
(*Mak 12:41-44*)

21 ¹Yesu dô di yê wê tibii wê mone levac gee lam tung mone vac kilong wê tibii mi tung mone daa vac ge. ²Mêd yê wê vêxôn

wê mone ma ge ti val tung mone hi yuu tya vac kilong tyo. ³Mêgem Yesu nêl ên nêbê, “A ob nêl hixôn nôn vô xam bê mone yuutyabed wê vêxôv tiganê tung vac kilong ge nginoo daa wê xomxo baba tung ge vêl. ⁴Ên he mone tibeac dô lê, lêc he vông nipwo tya di he xe levac dô, dom vêx tiganê ge i nêl mone ma di hi yuu tya, lêc vông vihati tu daa, di ti o dô wê ob kisuu xen yaên lec ge lêm.”

Yesu nêl lec viyin wê ob val timuên ge
(*Matyu 24:1-14; Mak 13:1-13*)

⁵Xomxo ya nêl kiyang lec Anutu xumac ngibua ên nêbê, “Xumac tiga, tibii lox ya ngidax nivihaviha di vunac vô ya susu nivihaviha.” Lêc Yesu nêl vô he ên nêbê, ⁶“Susu wê xam wê ga, obêc buc timuên ge od ngidax tigae ob dii sea, di ngwe ob dô lec ngwe kisi lêm.”

⁷Mêd he kinêg vô Yesu ên nêbê, “Xolac kehe, kiyang tige obêc vô nôn lec yelacna? Di do vatya obêc val tax ên xe xê di xovô bê susu tige ob vô nôn lecê?”

⁸Mêgem Yesu nêl ên nêbê, “Xam viac xam niviha êdêc tibii i o lêc kityoo xam lêm. Ên xomxo tibeac obêc val kityoo xam di nêl a lêg di nêl bê he Kilisi, di nêl bê buc vô kwabo lec. Lêc xam o lêc vông i vin he vya di timu vô he lêm. ⁹Di xam obêc ngô kiyang wê nêbê vevac tyip vac vîgwe ya mi xomxo hima ge, od le i lêc yetac di xona lêm. Ên vevac tige obêc val tax, lêc buc myahîpu gên yêp dia.”

¹⁰Nang dêc Yesu nêl vô he ên nêbê, “Vô buc tige tibii viyang ngwe ob vông vevac vô viyang ngwe, di tibii viyang viyang ob dô kidu kidu di vông vevac voma. ¹¹Vac vîgwe viyang viyang ge ngiyêg ob yoc levac di vip levac ob den xomxo di yidac levac ob vông he. Di do levac ya ob lam gê lag kisiinê di vông xomxo xona mabu.

¹²“Vô buc wê susu tige valên gên ma ge, od tibii obêc hôm xam xôn di vông viyin levac vô xam, di vông kiyang vô xam vac xumac lilo wê Yuda vông ge di tung xam la vac kalabuhu. He ob nêb vông a lêg i vô nipaên, mêgem he obêc kô xam mi la di vông xam le vô king yuu gavman levac manôn di vông kiyang vô xam. ¹³Lêc buc tige wê xam ob nêl a xolac kitong vô he, ¹⁴om le i lêc xo kiyang wê xam ob nêl lax vô he ge lêm. ¹⁵Ên a obêc vông xam piyôp yêp seac di xam nêl kiyang niviha, om he wê nêb ob vông vevac vô xam ge, he o tiyi wê he ob pwoô kiyang wê a nêl vô xam ge vac lêm.

¹⁶“Mêd xacxam va tame mame lime ngidême hixôn xam nimpîpu, heche va obêc vông xam vac tibii vevac vîgê di he obêc hi xam ya wib. ¹⁷Di xomxo vihati xêyaa obêc vô nipaên nôn vô xam ên wê xam vông i vin a lêg ge. ¹⁸Lêc xam obêc dô nimviha di bamzub lihi ti tya obêc pul vêl lêm. ¹⁹Om xam le xêkizêc êdêc dô mamviha timuên.

Yesu nêl kiyang lec wê Jelusalem obêc vô nipaên ge
(*Matyu 24:15-21; Mak 13:14-19*)

²⁰“Buc wê tibii vevac obêc lam buu vîgwe Jelusalem xôn ge od xam xovô bê buc wê vîgwe ob vô nipaên ge vô kwabo lec. ²¹Om buc tige,

xomxo wê dô vac vîgwe Judia ge, he i pec mi loc lec vîgwe kitôn, di he wê dô vac vîgwe Jelusalem ge, he i pec mi loc vêl, di he wê dô Jelusalem ninya ge, he i o lêc dilôc vac vîgwe Jelusalem lêm. ²²Ên buc tige wê Anutu ob vông myaviwen nipaên vô xomxo Yuda i tiyi kiyang wê plopete kivuu ilage, om kiyang gee vihati obêc vô nôn lec. ²³Om vêx wê nu dô vac xêyaa hixôn vêx wê divông lul vô nue vô buc tige, he ob dô vac viyin levac. Ên xomxo kibun ga ob dô vac viyin levac di xêyaa myavinê wê Anutu vông ge ob tulec he Yuda vihati. ²⁴Mêd tibii ob hi he ya yib ya yipac di ku he ya xôn di kô he mi la vac tibii ba ben di he la dô di vông yuac kalabuhu. Di tibii wê o Yuda lêm ge ob vông vîgwe Jelusalem vô nipaên di heche va ob tu kehe di viac i tiyi buc wê Anutu nêl ge.

Buc wê Xomxo Nu ob vena ge
(*Matyu 24:29-31; Mak 13:24-27*)

²⁵“Mêd do toto ob val vac hiyôv yuu dentuc di pitua gê lag kisiinê, di xomxo kibun ga vihati nilô ob vô viyin levac di he ob xona ên mia gwec wê vuac di vô didun levac ge. ²⁶Di pitua yuu susu wê lag ge ob yetac di sea vîgwe wê le lec ge di la, om xomxo ob yê di xovô susu nipaên wê ob val kibun ge om he ob xona mabu di vixog mi la kibun. ²⁷⁻²⁸Mêd buc wê susu tigege obêc val ge, od xam nilôm i vô viyin maên di xam wê mam i loc kisii, ên buc wê Anutu ob vô xam vêl ên viyin yuu nipaên ge vô kwabo lec. Mêd ge wê a, Xomxo Nu, a ob lam vac viyobtoc hixôn xêkizêc yuu xêseac di lam kibun, di xomxo vihati ob yê wê a val ge.”

Kiyang pilepacên lec xax wê mi pwoc ge
(*Matyu 24:32-35; Mak 13:28-31*)

²⁹Mêd Yesu nêl kiyang pilepacên ti vô he ên nêbê, “Xam xovô xax wê ob pwoc lihi ge. ³⁰Ên xax lihi obêc pwoc lec ge od xam xovô ên xam nêbê ge buc wê hiyôv ob linac nivihâ ge. ³¹Mêgem xam xovô bêga bê môp wê xam ob xovô Anutu buc ge, tiyi bêge êno. Om xam obêc wê do tigege wê val ge od xam xovô bê buc wê Anutu ob tu king di vông xomxo vihati la vac i kwa ngibi ge vô kwabo lec.

³²“A nêl hixôn nôn vô xam bêga bê xomxo wê dô gwêbaga ge obêc dô di kiyang tigege vihati obêc vô nôn lec lê. ³³Lag yuu kibun xôa obêc ma, lêc kiyang wê a vông ge, bo ti obêc la xôa ma lêm.

Yesu nêl vô nue ngivihi ên nêb he i viac he

³⁴“Xam viac xam nivihâ, di le i lêc num mi vô mavmav lêm, di xam o lêc xo kiyang tibeac lec susu wê nimnivi xe ge di nilôm i vô viyin lec lêm, ên xam obêc viac xam nivihâ lêm ge od Xomxo Nu obêc lop mi lôm lutibed ge od xam ob lungên, tiyi xocbê pulac wê lilii lungên om mila mô, lêc vac ge. ³⁵Ên buc tige obêc val vô xomxo wê dô lec kibun ga vihati

yang. ³⁶Om xam viac xam i tiyi buc vihati, di xam kitaa vô Anutu bê i vông xêkizêc vô xam i tiyi wê xam ob le xêkizêc di kilê viyin wê ob tulec xam ge êdêc le nivaha vô Xomxo Nu manôn wê obêc vena ge.”

³⁷Mêd Yesu la mi nêl xolac vac Anutu xumac ngibua tiyi vidiiên vihati, di bucên ge mi sea Jelusalem di la mi yêp lec kitôn Oliv. ³⁸Mêdêc pitoc yang ge xomxo tibeac mi kidi mi la vac Anutu xumac ngibua ên nêb ob la ngô Yesu kiyang wê nêl ge.

Judas nêb ob vông Yesu vac xomxo levac vigê
(*Matyu 26:1-5,14-16; Mak 14:1-2,10-11; Jon 11:45-53*)

22 ¹Buc wê tibii Yuda ob myêl levac di ya blet xêkizêc wê yis maên ge ên xovô buc Pasova ge vô kwabo lec. ²Mêd xomxo levac wê mi si daa gee hixôn xomxo wê xovô Moses xolac gee he nêb he ob hi Yesu i yib, lêc he xona ên xomxo tibeac, om he myag môp wê he ob hôm i xôn ge.

³Judas Iskaliot ge Yesu nue ngivihi ti lê, lêc Seten la vac i nilô. ⁴Om Judas loc mi la vô xomxo levac wê mi si daa gee hixôn xêhipu levac wê mi viac Anutu xumac ngibua gee, di he keac lec môp wê Judas ob vông Yesu vac he vigê ge. ⁵Om xomxo levac tige nilô vô nivaha di he nêb wê Judas ob vông Yesu vac he vigê ge od he ob vông mone vô i. ⁶Mêgem Judas tyuc lec, mêd myag môp wê ob hôm Yesu xôn ge, lêc xovô wê xomxo tibeac mi dô hixôn Yesu ge om dô bin buc wê Yesu vaci obêc dô tamaên di xomxo ma ge lê.

Pita yuu Jon viac vizid wê he ob ya ge
(*Matyu 26:17-25; Mak 14:12-21; Jon 13:21-30*)

⁷Buc wê tibii Yuda ob ya blet xêkizêc di hi bwoc sipsip mi ya ên xovô buc Pasova ge, ⁸om Yesu nêl vô Pita yuu Jon ên nêbê, “Ga buc Pasova om muu loc myêl vizid ên il ob xa.” ⁹Om yuu kinêg vô i ên nêbê, “Ông nêb xii la myêl vac xumac tina?”

¹⁰Mêgem Yesu nêl vô yuu ên nêbê, “Muu ngô lê. Muu loc vac vigwe Jelusalem di muu obêc wê wê xomxo ti dikilê mia mi la ge, od muu timu vô xomxo tige vixa di loc vac xumac wê xomxo tyo ob la vac ge, ¹¹di nêl vô xomxo ti wê i xumac ge bê, ‘Xolac kehe nêb xii lam kinêg vô ông bê xumac nilô tina wê i hixôn nue ngivihi ob ya vizid vac ge?’ ¹²Muu obêc kinêg bêge vô i ge od obêc hilung xumac nilô levac ti wê yêp kisii ge vô muu. Susu wê il ob dô lec ge le vac xumac tige pyap, om muu loc myêl vizid wê il ob xa ge vac.” ¹³Mêgem Pita yuu Jon loc mi la, di mîla yê i tiyi wê Yesu nêl ge, mêgem yuu la myêl yaên wê he ob ya ge.

Yesu vông pasa vô nue ngivihi
(*Matyu 26:26-30; Mak 14:22-26; 1 Kolin 11:23-25*)

¹⁴Buc wê he ob ya vizid ge om Yesu hixôn nue ngivihi, he xôn dô di ya. ¹⁵Mêd Yesu nêl vô he ên nêbê, “A xovô ên a nêbê a obêc kô myavinê

levac om a nilôg kidu a ên a nêb a ob xa vizid tiga hixôn xam tax lê dêc kô myavinê timuên. ¹⁶A nêl vô xam bêga bê a ob xa vizid tiga i tii vac lêm di i loc tyip vô buc wê vizid tiga obêc vô nôn lec vac Anutu ben.”

¹⁷Mêd Yesu hóm kap ti di kitaa vô Anutu di nêl vô he ên nêbê, “Xam hóm di titang vóma. ¹⁸A ob nêl vô xam bê a obêc num wain bêga i tii vac lêm di i miloc vô buc wê a ob num mia vac Anutu ben ge.” ¹⁹Nang dêc Yesu hóm blet ti di kitaa lec mêd hibú di vông vô he titi di nêl ên nêbê, “Ga a nignivi wê a vông ên a nêb i ngidu xam xôn ge. Xam timu vô móp bêga di xovô a.” ²⁰He ya pyap mêd Yesu vông bêge vô kap wain êno, di nêl ên nêbê, “Mia wain ga a hi wê a ob kipyax sea ên xam ge. Mêgem kiyang paha wê Anutu hilu ge, a obêc vông i vô nôn lec ya a hi.

²¹“Xam wê lê. Xomxo ti wê ob vông a vac tibii vevac vigê ge xeedô di ya hixôn a lec tevol tiga. ²²A, Xomxo Nu, a ob xib i tiyi xocbê kiyang wê Anutu nêl pyap ge lê, léc xomxo ti wê ob vông a la vac he vigê ge obêc kô myaviwen levac lec timuên.” ²³Yesu nêl bêge pyap, mêd nue ngivihi nêl vóma ên nêbê, “Om il tina wê il obêc vông móp tibêge?”

Yesu nue ngivihi ngaênma ên nêb he tina obêc tu levac i luu he baba vêl

²⁴Mêd Yesu nue ngivihi ngaênma ên nêb mêd he tina obêc tu levac i luu he baba vêl. ²⁵Lêc Yesu nêl vô he ên nêbê, “King kibun ga móp wê nêb tibii viyang viyang ge i loc vac he kwa ngibi, di tibii wê tu levac ge nêb xomxo wê pileva ge i pimil he ên yuac wê he vông ge. ²⁶Lêc xam o léc timu vô móp bêge lêm. Nge, xam wê xam kô lêm levac ge, xam dô i tiyi xomxo wê lê maên ge, di xam wê xam tu levac ge, xam dô i tiyi xocbê xomxo wê mi vông yuac vô xam ge. ²⁷A ob kinêg xam bê xomxo ngwe na wê levac ge? Ge xomxo ngwe wê dô di ya ge, me i nu yuac ngwe wê myêl i xen yaên di kô mi lam ge? Ge xam xovô ên xam nêbê ge xomxo ngwe wê dô mi ya ge. Lêc a ga, a lam dô hixôn xam tiyi xocbê xam num yuac ti.

²⁸“Viýin tibeac tulec a, léc xam o sea a lêm. Nge, xam kilê viýin hixôn a. ²⁹Mag Anutu nêb a tu king di kô lêg levac, om a ob vông xam tu king di kô lêm levac hixôn a êno bêge, ³⁰om buc wê a ob tu king ge od xam ob dô hixôn a di il xôn ob xa di num, di xam obêc dô lec sia king di yaxên lime Islel wê xam hipu vigê yuu di tô mi la yuu ge nêl kiyang.”

Yesu nêl ên nêb Pita obêc yax i vun

(Matyú 26:31-35; Mak 14:27-31; Jon 13:36-38)

³¹Yesu nêl vô Saimon Pita ên nêbê, “Saimon, ngô lê. Seten nêl ên nêbê ob yaxên xam, om Anutu tyuc lec ên nêb i yaxên. ³²Lêc a kitaa vô Anutu lec ông ên a nêbê ông o léc sea vông vinên lêm. Di buc wê ông ob pilepac ông mi lax vô Anutu ge od ông ngidu lime nêl vông vinên xôn.”

³³Lêc Pita nêl vô i ên nêbê, “Apumtau, a obêc loc hixôn ông. Wê tibii ob vông ông la vac kalabuhu me hi ông wib ge, od a ob kô myavinê hixôn

ông.”³⁴ Lêc Yesu nêl vô i ên nêbê, “Pita, a ob nêl vô ông bê vô bucên tya ga kokilêx vôên vya obêc gên ma di ông ob yax a vun lu yon bê ông lungên a.”

Kiyang lec susu wê ob ngidu xomxo xôn ge

³⁵ Yesu nêl vô nue ngivihî ên nêbê, “Buc ilage wê a vông xam la vac yuac ge od a nêb xam kôên vixec yuu mone di su i ma. Om a ob kinêg vô xam bê susu ya mi ma ên xam vô buc ya, me?” Lêc he nêl ên nêbê, “Maê, susu ti o ma ên xe buc ti lêm.”³⁶ Mêd Yesu nêl ên nêbê, “Dom gwêbaga, xomxo ob viac xam lêm, om xam vixec mone obêc dô ge, od xam kô hixôn mi loc. Di vixec êno bêge. Di xam ti yipac obêc ma ge od xam vông nêm kolsiot ên tibii i kisuu di xam kô mone mi loc kisuu yipac lec.”³⁷ A nêl bêga vô xam, ên viyin obêc val i tiyi kiyang wê yêp vac xolac bêga ên nêbê, ‘Xomxo nêl nêb i ge tibii nipaên.’ Om a ob nêl vô xam bê kiyang tiga obêc vô nôñ lec vô a, ên kiyang vihati wê he kivuu lec a ilage obêc vô nôñ lec.”³⁸ Om he nêl vô Yesu ên nêbê, “Apumtau, wê. Yipac yuu yêp ga.” Mêd Yesu nêl ên nêbê, “Ge pyap.”

Yesu la kitaa gê Getsemani

(*Matyu 26:36-46; Mak 14:32-42*)

³⁹ Pyap dêc Yesu sea Jelusalem di la lec kitôn Oliv tiyi xocbê mi vông ge, mêd nue ngivihî timu vô i vixa mi he la.⁴⁰ Mêd he mila vigwe tige om Yesu nêl vô he ên nêbê, “Xam dô di kitaa êdêc viyin wê ob yaxên xam ge i o léc vông xam tô lêm.”⁴¹ Mêd Yesu sea he di la teva tya tiyi xocbê xomxo ti ob nêx ngidax la tô ge, dêc la yev vixa kitu vac di kitaa bêga ên nêbê,⁴² “O Mag, ông obêc tyuc lec ge od ông vô viyin tiga vêl ên a. Lêc ông o léc vông i tiyi wê a nêb ông vông ge lêm. Nge, ông vông i tiyi wê ôcông va xovô ge.”

⁴³ [Mêd angela ti lam gê kisiinê di lam ngidu i xôn.⁴⁴ Yesu nilô vô viyin levac di i kitaa xêkizêc di nivinê tyip tiyi xocbê hi ge di yuc la kibun.]

⁴⁵ Yesu kitaa pyap di kidi mi lax vô nue ngivihî, léc yê wê he nilô vô viyin levac om he yêp.⁴⁶ Mêgem Yesu nêl vô he ên nêbê, “Bêna léc xam diwêpê? Xam kidi lec di kitaa êdêc viyin wê ob yaxên xam ge i o léc vông xam tô lêm.”

Judas vông Yesu la vac Yuda levac vigê

(*Matyu 26:47-56; Mak 14:43-50; Jon 18:3-11*)

⁴⁷ Yesu gên dinêl kiyang tige di xomxo tibeac val mi lam. Judas wê Yesu nue ngivihî vigê yuu di tô mi la yuu ge ti kô tibii mi he lam, dêc Judas val le hixôn Yesu ên nêb ob nga lia,⁴⁸ lêc Yesu nêl vô i

ên nêbê, “Judas, bêna léc ông nga Xomxo Nu lia ên ông nêb tibii i lam hôm i xôn?”

⁴⁹Yesu nue ngivih i yê wê tibii tige nêb ob hôm i xôn ge om he kinêg vô i ên nêbê, “Apumtau, ông nêb xe hi he ya yipac, me?” ⁵⁰Lêc lutibed nu ngivih i ti hôm yipac di sap xomxo levac wê mi si daa ge nu yuac ti ninya lihi vilu hiyôv vêl. ⁵¹Lêc Yesu nêl ên nêbê, “Môp bêge i ma.” Mêd vyax vigê lec xomxo tige ninya di i vô nivih i lec.

⁵²Mêd xomxo wê lam ên nêb ob lam hôm Yesu xôn ge, ge he xomxo levac wê mi si daa gee di xêhipu levac wê mi viac Anutu xumac ngibua gee, hixôn he Yuda levac levac ya, om Yesu nêl vô he ên nêbê, “Xam xo ên xam nêbê a tibii yôdac ti om xam lam hixôn yipac yuu vigo?” ⁵³Ilage a mi dô hixôn xam vac Anutu xumac ngibua tiyi buc vihati, lêc xam o hôm a xôn lêm. Lêc gwêbaga buc wê xam vông, om xêkizêc wê mapitoc vông ge vô levac.”

Pita yax Yesu vun nêbê i lungên

(Matyu 26:57-58,69-75; Mak 14:53-54,66-72; Jon 18:12-18,25-27)

⁵⁴He hôm Yesu xôn di kô i mi la vô xomxo ti wê tu xomxo daa siên nêb levac ge om he mila vac xomxo levac tyo ben, di Pita timu vô he vixa lêc le lam teva teva. ⁵⁵Mêd xomxo wê dô vac xomxo levac tige ben ge vev ngwax lec wetôv di nyuu mi dô, di Pita la dô hixôn he. ⁵⁶Mêdêc vêx yuac ti yê Pita wê xeedô di ngwax linac lec ge om yê i kizêc dêc nêl ên nêbê, “Xomxo tya ga wê mi dô hixôn Yesu ge.” ⁵⁷Lêc Pita nêl ên nêbê, “A lungên xomxo tige.” ⁵⁸He dô nipwo tya, nang dêc xomxo ngwe yê Pita nang di nêl vô i ên nêbê, “Ông wê ông mi dô hixôn Yesu he nue.” Lêc Pita nêl ên nêbê, “Maê, o a lêmê.”

⁵⁹Hiyôv manôn ti la vêl, nang dêc xomxo ti nêl xêkizêc nang ên nêbê, “Vixôhilôg, xomxo tiga wê mi dô hixôn Yesu, ên yuu xôn tibii Galili yuu.” ⁶⁰Lêc Pita nêl ên nêbê, “A lungên kiyang wê ông nêl ge.” Pita gên o nêl kiyang tiyôd lêm, di kokilêx hi vya lutibed. ⁶¹Mêd Apumtau Yesu pilepac i di yê Pita, om Pita xovô kiyang wê Yesu nêl vô i ên nêbê, “Vô bucên tiga kokilêx vôn vya obêc gên ma di ông obêc yax a vun lu yon di nêl bê ông lungên a.” ⁶²Pita xovô wê i vông i so ge om sea vigwe tige di la byag levac.

Yesu la le vô tibii Yuda levac levac manôn

(Matyu 26:59-68; Mak 14:55-65; Jon 18:19-24)

⁶³Mêd xomxo wê hôm Yesu xôn ge keac nipaên lec di hi, ⁶⁴di ku i manôn vac nivimih i di nêl vô i ên nêbê, “Ông nêl bê letya hi ôngê.”

⁶⁵Mêd he nêl kiyang nipaên tibêge tibeac lec i.

⁶⁶Vigwe vidii mêd he Yuda levac levac nêb ob kitucma, om xomxo levac wê mi si daa gee di xomxo wê xovô Moses xolac gee hixôn he levac levac ge mangwe, he kitucma mi dô, mêd tibii kô Yesu mi la lax vô he manôn. Mêd he kinêg vô Yesu ên nêbê, ⁶⁷“Nêl vô xe bê ông ge Kilisi ti wê

Anutu nêb ob vông i lam ge, me?” Lêc Yesu nêl vô he ên nêbê, “A obêc nêl kitong vô xam ge od xam ob vông i vin a vyag lêm, ⁶⁸di a obêc kinêg kiyang vô xam ge od xam ob luu a vyag lêm. Nge, xam ob dô kiyang maên. ⁶⁹Viwen wê timuên ge, a, Xomxo Nu, a ob dô vô Anutu wê xêkizêc kehe ge vigê hiyôv.”

⁷⁰Mêd he vihati kinêg ên nêbê, “Ông ge Anutu nu mê?” Mêd Yesu nêl ên nêbê, “Xam nêl i tiyi, ên a ga Anutu nu.” ⁷¹Mêd he nêl vôma ên nêbê, “Pyap om il ob kinêg kiyang ya hixôn lêm. Ên ici va nêl i kitong vac mya mi il ngô pyap.”

Yesu la le vô gavman levac Pailat manôn
(*Matyu 27:1-2,11-14; Mak 15:1-5; Jon 18:28-38*)

23 ¹Xomxo levac vihati kidi lec di kô Yesu mi la di la lax vô Pailat manôn. ²Mêd he nêl kiyang nipaên lec Yesu bêga ên nêbê, “Xecxe xê wê xomxo tiga vô pilepac pilepac vô xe di nêb xe o vông mone takis vô il nêd king Sisa lêm, di kityoo xe ên nêbê i ge Kilisi wê tu king ge.” ³Mêd Pailat kinêg vô Yesu ên nêbê, “Ông ge king wê he Yuda vông ge, me?” Mêd Yesu lee yuu ên nêbê, “Ông nêl i la tiyi.” ⁴Mêd Pailat nêl vô xomxo levac daa siên hixôn xomxo gee vihati ên nêbê, “A yaxên xomxo tiga nêl kiyang, lêc kiyang ti o yêp vô i lêm.” ⁵Lêc xomxo tige nêl kiyang xêkizêc ên nêbê, “Xomxo tige la nêl kiyang vaxvax vô xomxo vac vigwe Galili di i la vac vigwe Judia vihati di val ga hixôn.”

Yesu la le vô gavman levac Helot manôn

⁶Pailat ngô kiyang tige, di kinêg vô he ên nêbê, “Xomxo tiga, tibii Galili ti, me?” ⁷Lêc he nêl ên nêbê Yesu ben Galili wê Helot viac ge, om Pailat vông i loc mi la vô Helot, ên Helot lam dô Jerusalem vô buc tige.

⁸Yesu mila vô Helot mêd Helot yê di xêyaa vô nivîha yang, ên ilage xomxo nêl Yesu kitong vô i om Helot nêb ob yê Yesu di nêb i vông do ti ên i ob yê. ⁹Mêgem Helot kinêg kiyang tibeac vô Yesu, lêc Yesu o nêl kiyang ti lax vô i lêm.

¹⁰Mêd xomxo levac wê mi si daa gee hixôn xomxo wê xovô Moses xolac gee le kwabo di vông kiyang xêkizêc vô Yesu, ¹¹di Helot hixôn nue vevac yê Yesu nipaên di so vya vô i mêd kô ngakwi nivîha ti di lam vinyum lec Yesu. Pyap dêc vông i lax mi la vô Pailat nang. ¹²Ilage Helot yuu Pailat mi yêma nipaên, lêc buc tige yuu xêyaa vin lecma di yuu keac nivîha vôma nang.

Pailat tyuc lec nêb tibii i hi Yesu lec xax pola
(*Matyu 27:15-26; Mak 15:6-15; Jon 18:39-19:16*)

¹³Pailat tyuc xomxo levac wê mi si daa gee hixôn xomxo levac levac di tibii tibeac kituc la vô i, ¹⁴mêd nêl vô he ên nêbê, “Xam kô xomxo tige

mi lam vô a ên xam nêb mi nêl kiyang vaxvax vô xomxo om vông he yê gavman nipaên, om a kinêg kiyang vô i lec xam mamnôn, lêc a o tulec kiyang xocbê xam nêl ge ti vô i lêm. ¹⁵Di Helot êno o tulec kiyang ti lêm, om vông i lôm vô il nang. Xam ngô lê, xomxo tiga o vông ti so tiyi wê il ob hi i yib lec ge lêm. ¹⁶Om a ob pisa i ya yihi di vông i lôc ben.”

¹⁷[Môp wê he Yuda vông ge yêp bêga nêbê buc wê he ob myêl vizid Pasova ge od he mi nêl xomxo wê dô vac kalabuhu ge ti lê vô gavman levac, di gavman levac ob piwelac i vêl.] ¹⁸He môp bêge, mêgem xomxo tibeac tyuc vya levac ên nêbê, “Hi xomxo tiga i yib di vông Balabas i lôm vô xe.” ¹⁹Ilage Balabas hixôn xomxo tibeac vông vevac vô gavman Lom vac vigwe tige di hi xomxo ya yib om he vông i la dô vac kalabuhu. ²⁰Pailat nêb ob piwelac Yesu om nêl bêge vô xomxo tibeac tige nang, ²¹lêc he tyuc vya levac nang ên nêbê, “Hi i yib lec xax pola. Hi i yib lec xax pola.” ²²Mêgem Pailat nêl kiyang ti wê vông yon ge vô he ên nêbê, “Ên xomxo tiga vông nipaên vatya? A o tulec i nêl nipaên ti tiyi wê il ob hi i yib lec ge lêm. Om a ob pisa i ya yihi di vông i lôc nêl.” ²³Lêc he tyuc vya levac nginong ên nêbê, “Hi i lec xax”, om he vya hi Pailat vya tô, ²⁴mêd Pailat timu vô he vya, ²⁵om Balabas wê vông vevac vô gavman di hi xomxo yib ge, Pailat nêb he i piwelac i vêl i tiyi wê he nêl ge, di vông Yesu la vac he vigê ên nêb he i vông i tiyi wê he xovô ge.

He hi Yesu lec xax pola

(*Matyu 27:32-44; Mak 15:21-32; Jon 19:17-27*)

²⁶He kô Yesu mi la vô môp, dêc he yê xomxo ti wê dilam ên nêb ob la Jelusalem ge. Xomxo tyo lê nêbê Saimon di i ben Sailini. Om he hôm i xôn di vông i kilê xax pola wê he ob hi Yesu lec ge di timu vô Yesu vixa.

²⁷Yesu mug mêd xomxo tibeac ditimu vô i vixa, di vêx ya byag di vông tilôt lec i. ²⁸Om Yesu pilepac i di nêl vô he ên nêbê, “Xam vêx Jelusalem, le i lêc byag ên a lêm. Nge, xaxxam va byag ên xam hixôn nume. ²⁹Ên obêc buc timuên ge od tibii ob val vông viyin vô xam, om xam ob nêl bêga bê, ‘Vêx wê le pileva di kôên nu ma ge, me vêx wê o vông lul vô nu lêm ge, he ob dô viyin maên tya.’ ³⁰Mêd vô buc tige xomxo ob nêl vô kitôn bê, ‘Pul mi lam hi xe.’ Di ob nêl vô kitôn nipwo bêga bê, ‘Lam hivun xe xôn.’ ³¹Gwêbaga he vông viyin vô a tiyi xocbê ob vuv xax paha ge. Di xam ge tiyi xocbê xax mupacên om he ob vông bêna vô xam timuên?”

³²Mêd he kô tibii nipaên yuu hixôn, wê ob hi yuu yib hixôn Yesu. ³³Mêd he mi la vac vigwe ti lê nêbê bazub len, mêd he hi Yesu hixôn tibii nipaên yuu ge lec xax pola vac vigwe tige. Yesu yux vac mahigun di tibii nipaên yuuo yux vilu vilu. ³⁴Mêd Yesu nêl ên nêbê, “Mag, ông kitya tibii gae nêl nipaên vêl, ên he lungên om he vông.” Mêd tibii vevac tige nêb ob titang Yesu ngakwi voma om he tide mi yê dêc titang i tiyi. ³⁵Mêd xomxo tibeac dô di yê, mêd Yuda levac levac nêl nipaên lec Yesu ên nêbê,

“Xomxo tige ngidu xomxo ya xôn ilage, om obêc Kilisi wê Anutu vinoo i nôn ge od i ngidu ici va xôn êno.”

³⁶Mêd tibii vevac êno nêl nipaên lec Yesu, di he kô mia wain wê kilin ge mi la le kwabo vô Yesu nêb ob vông mi i num, ³⁷di nêl vô i ên nêbê, “Ông obêc xomxo Yuda nêl king ge od ông ngidu ôcông va xôn.” ³⁸Mêd kiyang ti yêp lec kisii vô Yesu bazub ên nêbê, “XOMXO TIGA, KING WÊ HE YUDA VÔNG GE.”

³⁹Tibii nipaên wê yux lec xax hixôn Yesu ge, ngwe nêl vya nipaên vô Yesu ên nêbê, “Ông Kilisi mê? Od ông ngidu ôcông va xôn di ngidu xii xôn êno.” ⁴⁰Lêc ngwe kunac di nêl ên nêbê, “Ông o xona ên Anutu lêmê? Xon xôn kô myaviwen nipaên tiyima lê, ⁴¹lêc u kô nipaên tiyi môm nipaên wê u vông ge, om ge la tiyi, dom xomxo tiga o vông nipaên ti lêm.” ⁴²Mêd nêl vô Yesu ên nêbê, “Yesu, buc wê ông ob tu king hixôn xêkizêc ge od ông xo a.” ⁴³Mêd Yesu nêl vô i ên nêbê, “A ob nêl hixôn nôn vô ông bê gwêbaga ông ob la dô hixôn a gê paladis.”

Yesu yib

(*Matyu 27:45-56; Mak 15:33-41; Jon 19:28-30*)

⁴⁴Hiyôv tyip kitôn mêd hiyôv linacên ma di vigwe vihati vô mapitoc ta di i la vô hiyôv manôn yon wê hucên ge. ⁴⁵Mêd nivimihi levac ti wê yux vac Anutu xumac ngibua ge lêx la yuu vac mahigun.

⁴⁶Mêd Yesu tyuc vya levac ên nêbê, “O Mag, a kinug i loc vac ông vigêm.” Nêl bêge pyap mêd yib.

⁴⁷Mêd tibii levac wê viac nue vevac ge yê susu tige di pimil Anutu di nêl ên nêbê, “Vixôhilôg, xomxo tiga nivihia di nipaên ti o yêp vô i lêm.”

⁴⁸Mêd xomxo wê val ên nêb ob yê ge, he tibeac le di yê wê Yesu yib ge, pyap dêc he lax mi la ben, lêc he nilô vô viyin om he kituu pikopac di la.

⁴⁹Di xomxo wê Yesu lie gee hixôn vêx wê sea Galili di mi timu vô Yesu vixa gee, he xôn le teva tya di yê susu vihati yang wê tibii vông vô Yesu ge.

He lii Yesu vac lôva

(*Matyu 27:57-61; Mak 15:42-47; Jon 19:38-42*)

⁵⁰⁻⁵¹Xomxo ti dô lê nêbê Josep di i ben Alimatia wê yêp vac vigwe Yuda ge. Josep ge Yuda levac ti wê tu kaunsil di mi dô vac kitucmaên hixôn Yuda levac levac, lêc o tyuc lec kiyang wê kaunsile hilu lec Yesu ge hixôn lêm. Ên Josep ge xomxo nivihia ti wê dô bin buc wê Anutu nu ob lam tu king gê kibun ga. ⁵²Mêd Josep la vô Pailat di la kitaa Pailat ên nêb ob kô Yesu ninivi mi la yev. ⁵³Mêgem Pailat tyuc lec di Josep la kwax Yesu vêl ên xax di la viyum vac nivimihi kwem ti di la lii vac lôva wê he yev vac ngidax ge ti. Lôva tige, he o lii xomxo ti vac ila lêm. Nge, gên paha. ⁵⁴Buc tige, ge buc wê he Yuda ob viac he, ên vigwe obêc huc ge od he buc sabat wê ngibua ge myahipu ob val.

⁵⁵Mêgem vêx wê sea ben Galili di mi timu vô Yesu gee, he timu vô Josep vixa di la yê wê he lii Yesu ninivi vac lôva ge. ⁵⁶Pyap di he lax mi la ben di lax viac wel hixôn susu wê nivivea ge. Pyap dec buc sabat, om he dô seac vêl tiyi môp wê Moses xolac nêl ge.

Yesu kidi lec vac yibên

(*Matyu 28:1-10; Mak 16:1-8; Jon 20:1-10*)

24 ¹Sabat la vêl di da pitoc yang ge vêx tigege kô susu nivivea wê he viac pyap ge mi la. He mila vô lôva wê he lii Yesu vac ge, ²lêc yê ngidax wê tibii lax i le vac vuayen xôn ge vixog la vêl, ³om he vac la vac lôva nilô lêc he o yêvô Apumtau Yesu ninivi lêm. ⁴Mêgem he xo kiyang tibeac tibeac, lêc lutibed vux yuu wê vinyum ngakwi kwem wê teeên ge val le kwabo vô he. ⁵Mêd vêx tigege yê di xona mabu di kilong kibun, lêc xomxo yuu ge nêl vô he ên nêbê, “Bêna lêc xam myag xomxo maviha tige vac xomxo yibên benê? Xomxo tige yêpên ga ma, di i kidi lec maviha mi la. ⁶Xam xovô i lôc vô kiyang wê Yesu nêl vô xam di xam gên dô Galili ge wê i nêl bêga ên nêbê, ⁷‘He obêc vông Xomxo Nu la vac tibii nipaên vigê di he hi i yib, di buc ti wê vông yon ge od obêc kidi lec i tii vac nang i tiyi kiyang wê Anutu nêl pyap ge.’”

⁸Mêgem vêx tigege xovô kiyang wê Yesu nêl ilage nang, ⁹om he sea lôva di lax mi la nêl kiyang tigege vihati kitong vô nue ngivihi vigê yuu di tô mi la ti ge hixôn xomxo yaya. ¹⁰Vêx wê nêl kiyang tige vô nue ngivihi ge, Malia Makdala yuu Joana yon Malia wê Jems ta ge di vêx yaya. ¹¹Lêc nue ngivihi ngô kiyang tige tiyi xocbê kiyang kityooên, om he o vông i vin lêm. ¹²Mêgem Pita kidi lec di tup mi la vô lôva, di mila kilong lôva nilô mi yê, lêc yê wê nivimihi ti wê he viyum Yesu vac ge diyêp pileva, mêgem lax mi la hixôn nilô viyin, ên lungên tige kehe.

Xomxo yuu yê Yesu lec môp

(*Mak 16:12-13*)

¹³Vô buc tige, xomxo wê mi dô hixôn Yesu ge yuu la vô môp ên nêb ob la vigwe ti lê nêbê Emeas. Môp wê ob sea Jerusalem di la Emeas ge tiyi xocbê 11 kilomita. ¹⁴Yuu dila vô môp di keac lec byed wê tibii vông vô Yesu ge. ¹⁵Yuu dikeac, lêc Yesu val vô yuu di yon xôn dila vô môp. ¹⁶Yuu manôn yê Yesu lê, lêc yuu o xovô bê ge Yesu lêm.

¹⁷Mêd Yesu kinêg vô yuu ên nêbê, “Muu dikeac lec vatya di tup vô môpê?” Mêgem yuu le di nilô vô viyin di manôn vô nipaên. ¹⁸Mêd ngwe wê lê nêbê Kliopas ge nêl vô Yesu ên nêbê, “Tibii vac vigwe viyang viyang ge la Jerusalem om he vihati yê di ngô susu wê val vac buc mahigun tiga, dom mêd ông tibed wê ông dilungên?” ¹⁹Mêd Yesu kinêg vô yuu ên nêbê, “Muu nêl lec susu vatya?” Om yuu nêl vô i ên nêbê, “Xii dinêl kiyang lec Yesu Nasalet. Yesu ge plopete ti wê vông yuac xêkizêc di

nêl kiyang hixôn xêkizêc, di Anutu hixôn xomxo vihati yê i nivihâ. ²⁰Lêc xomxo levac wê mi si daa gee hixôn

Yuda levac wê mi viac il gee, he vông i la vô gavman levac di gavman levac tyuc lec nêb i yib om he hi i yib lec xax pola. ²¹Ilage xe vông i vin ên xe nêbê Yesu ge xomxo wê ob vô Islel vêl ên nipaên ge, lêc mad xomxo tyo yib. Di kiyang bo ti hixôn bêga bê xomxo tyo yib nyop, om ga buc wê vông yon ge. ²²Mêd gwêbaga vêx wê xe xôn mi dô ge vông xe yetac mabu, ên he kidi pitoc yang mi la yê lôva ti wê he lii Yesu vac ge, ²³lêc he o tulec Yesu lêm, om he vena nêl vô xe ên nêbê, ‘Xe xê angela ya di he nêl vô xe ên nêbê Yesu kidi lec maviha nang.’ ²⁴Om xomxo wê xe xeedô gee ya kidi di loc mi la yê lôva nang, lêc milâ yê tiyi xocbê vêx tige nêl ge, di he o tulec Yesu lêm.”

²⁵Mêd Yesu nêl vô yuu ên nêbê, “Muu piyôp maên. Bêna lêc muu gên o vông i vin kiyang wê plopete nêl ilage lêmê? ²⁶Ên kiyang yêp bêga nêbê Kilisi wê Anutu nêb ob vông i lam ge obêc kô myavinê, pyap dêc obêc la dô vac xêseac di kô lê levac, lêc mêd muu o xovô tige lêm?” ²⁷Yesu nêl bêge pyap, nang dêc nêl Moses xolac di nêl plopete kiyang ge vihati kehe kitong hixôn vô yuu, ên nêbê kiyang gee vihati nêl lec i.

²⁸Mêd yon milâ kwabo vô vigwe wê yuu ob la ge, lêc Yesu vông xocbê ob luu yuu vêl di loc mi la ge, ²⁹om yuu nêl xôn ên nêbê, “Ông dô hixôn xiiê, ên hiyôv hoo la gwêba om vigwe ob buc.” Om Yesu la hixôn yuu di yon la dô vac yuu ben. ³⁰Mêd yon dô ên nêb ob ya yaên, dêc Yesu hôm blet di kitaa lec di hibû di vông vô yuu. ³¹Mêd yuu yê di xovô nêbê ge Yesu, lêc lutibed Yesu xôa ma di yuu o yê i tii vac nang lêm. ³²Di yuu nêl voma ên nêbê, “Buc wê Yesu keac hixôn u vac môp di nêl xolac kehe vô u ge od kiyang tige tipi vô u nilôd di vông u xêdyaa vô nivihâ.”

³³Mêgem lutibed yuu kidi lec di lax mi la Jêusalem vô nue ngivihî vigê yuu di tô mi la ti hixôn lie ya wê he kitucma mi dô ge, ³⁴mêd he nêl vô yuu ên nêbê, “Vixôhilôg, Apumtau Yesu kidi lec. Ge hilung i vô Saimon Pita gwêba.” ³⁵Mêd yuu nêl kitong vô he lec wê Yesu dila hixôn yuu vô môp ge, di nêl wê Yesu hibû blet di kitaa lec om yuu xovô i.

Yesu hilung i vô nue ngivihî

(*Matyu 28:16-20; Mak 16:14-18; Jon 20:19-23*)

³⁶Yuu gên dinêl kiyang tige, di Yesu val le vac he mahigun di nêl vô he ên nêbê, “Kiyang malehe i hivun xam xôn.” ³⁷He ngô kiyang tige om he yetac di xona mabu, ên he xo ên he nêbê ge xomxo yibên ti kinu. ³⁸Lêc Yesu nêl vô he ên nêbê, “Bêna lêc xam nilôm vô viyin di xam xo kiyang tibeacê? ³⁹Xam wê a vigêg yuu vixag ga di xovô bê ga a, di xam vyax vigêm lec a nignivi mi yaxên, ên xomxo yibên kinu ge od len yuu liyôhô o xocbê a ga lêm.” ⁴⁰[Yesu nêl bêge pyap di hilung vigê yuu vixa vô he.] ⁴¹He yê bêge di nilô vô nivihâ, lêc he gên o vông i vin lêm. Nge, he nilô

vô tibeac. Om Yesu nêb he i xovô bê i o xomxo yibên kinu lêm, om kinêg vô he ên nêbê, “Yaên ya dô vô xamê?” ⁴²Mêgem he vông beac wê he si lec ngwax ge ti vô i, ⁴³mêd i hôm di ya vô he manôn.

⁴⁴Nang dêc Yesu nêl vô he ên nêbê, “Ilage wê a gên dô hixôn xam ge, od a nêl kiyang bêga vô xam ên a nêbê kiyang wê xomxo kivuu lec a mi i yêp vac Moses xolac yuu plopete kiyang di yêp vac kipihac Sam ge, ge vihati obêc vô nôn lec.” ⁴⁵Ge Yesu nêl i kitong vô he om he piyôp xovô kiyang vihati wê yêp vac xolac ge, ⁴⁶di i nêl vô he ên nêbê, “Kiyang yêp bêga nêbê Kîlisi wê Anutu nêb ob vông i lam ge obêc kô myavinê di yib, di buc ti wê vông yon ge od obêc kidi lec maviha vac yibên nang, ⁴⁷di kiyang yêp hixôn bêga nêbê xomxo i loc nêl xolac lec Kîlisi lê vac vigwe vihati bêga bê xomxo i pilepac he êdêc Anutu i kitya he nêl nipaên vêl. Xam vông yuac tige gê Jelusalem tax, ⁴⁸di xam ob nêl kiyang wê xam wê di ngô ge vihati kitong. ⁴⁹Xam ngô lê. Myakilôhông Ngibua wê Mag nêl nêb ob vông i lam ge, a obêc vông i lam vô xam, om xam dô Jelusalem di i loc vô buc wê Anutu ob vông xêkizêc wê kisii ganê i lam hivun xam xôn lê.”

Yesu lec mi lax vô Anutu
(*Mak 16:19-20; Sinale 1:9-12*)

⁵⁰Mêd Yesu kô he di he sea Jelusalem mi la Betani, mêd Yesu vông vigê la kisii di kitaa lec he. ⁵¹Yesu kitaa mi le, di he yê wê Anutu kô i di i lec mi la kisii ge. ⁵²Mêd he lax hixôn xêyaa nivaha mi la Jelusalem, ⁵³mêd tiyi buc vihati ge he la pimil Anutu vac xumac ngibua.